

蜀  
上  
人  
唱  
和  
詩  
集  
集  
雅



貴州省圖書館  
中文書書



雅 蜀

J  
17.8  
1,1795

選元調李

叢書集成初編

(補印本)

蜀雅及其他二種

一九三九年十二月初版

一九六〇年五月補印

商務印書館出版

上海大東集成聯合印刷廠印刷

# 蜀雅序

今之論人文者。皆以爲取材必於鄧林。視鳥必於藪澤。固已。然而閬風元圃。不借高於坵垤。懸黎結綠。不假觀於瓊珉。何者。拘井谷之隘。不知辰極之高也。澄秋毫之視。不見寥天之闊也。吾蜀詩亦然。自漢唐以來。百家騰躍。指不勝屈。最著者。如漢司馬相如。揚雄。唐李白。陳子昂。宋蘇洵父子。元虞集。明楊慎。作爲文章。類皆沉博絕麗。雄視百代。構深璋之風。立騷壇之表。洵古今來文雅之淵藪也。殘膏餘馥。不知沾丐後人幾許。而賤目貴耳者。顧謂今不如古。方隅之別也。豈不悖乎。慨自明末獻賊之亂。衣冠文物。半委青羊。我朝定鼎休息。百餘年來。英才蔚起。而岷峨之氣。又磅礴而鬱積之。故往往轢古切今。不少鴻章巨製。軒翥奮飛。和聲以鳴。太平之盛。而以巴爲耀。多不入採風之聽。則是鍾期亡而伯牙之絃絕。獲人歿而匠氏之斤輟。非作之難。知之難也。若不爲之網羅而表張之。有不泯於荒烟蔓草者。幾何。余束髮授書來。卽矢此志。廣搜遠探。靡不收錄。披沙揀金。閱有歲時。彙爲一冊。統名曰蜀雅。大半理不空綺。清麗居宗。句不賈奇。渾潤爲上。登大雅而刊淫哇。此中具費苦心也。雖丹幃接蔭。醜姿可翳。朱漆錯塗。枯木或隱。然而出汙泥者。要皆寶光劍氣。譬之止水之修鱗。必現名之美者。實必歸也。司馬楊雄之徒。去今未遠。風雅之道。豈遂墜乎。若夫覽此篇者。存町眇之分。索吹毛之垢。則所謂播塵埃於白珪。生瘡瘡於玉肌者。亦聽之而已。吾安能以人人之性情。爲我之性情哉。是爲序。

蜀雅序

乾隆四十六年歲次辛丑孟冬月羅江李調元雨村撰。

本館據函海本排  
印初編各叢書僅  
有此本

蜀  
雅

蜀雅卷一

清 羅江李調元雨村選

呂大器

大器字儼若。號東川。遂寧人。崇正戊辰進士。官至吏部尙書大學士。入國朝。自稱東川老人。有塞

上草。王滿洋。鳥華組。呂公蜀人。明末。總督江楚。駐九江。會左良玉。濞賊鋒。遣遙江上。以病自託。楚撫王樞。甚至臥內視之。良玉使二婢。搥脚。僱養自如。呂公至。不即起謁。命子孟庚代參。呂公叱之曰。而

父病。軍事不可曠。軍中有可代者。以名來。吾立疏以聞。即統遊擊盧鼎。各將上之。良玉怒。史公可法移書勉以文武和衷。大器以一扇遺左。款書東川老人四字而已。未幾朝議改宣。繼成爲督。大器以兵書內召。儼若有

才。督江西時。密布方略。遣將於衝。袁萬戰。萍漫諸路。撰賊殆盡。然善避事。見天下方亂。上疏自言好酒色財。不可用。科臣馬嘉植劾之。事見明史。以艱歸。哀毀。入本朝。未幾卒。詩多橫槊之氣。時露粗服。然秀

拔堅渾。終是唐人格調。不羨宋元以下。蹊徑。靜忘屠詩話。公驅隴南北。盡瘁行間。五言如野寺依巖立。官衙傍水開。孤燈寒殿壁。落月映山城。土瘠蟬吟屋。林疏月上扉。野狐衝馬立。山鬼伺人驕。精衛悲銜土。鷓鴣

啼滿山。雲烟春尙在。烽火晝相連。淚盡銅駝棘。歌殘玉樹花。豈無丹闕戀。終抱白雲思。忠孝之誠。溢于言表。

晚至閩州

一葉嘉陵下水心。對綠漪。豈無丹闕戀。終抱白雲思。輕艇星前導。微波天暗移。南池千萬折。懷古一增悲。

昭化縣

不堪百戰後。寥落兩三家。白骨堆荒草。青燐亂晚霞。高城行鳥雀。古廟困叢葭。羣盜中原徧。愁心未有涯。

音旨俱極凄壯。逼似少陵。

泊陽下灘

祇爭一帶水，尙枕小溪眠。漁火穿江出，村烽帶月傳。孤城還屹爾，白叟半蕭然。回憶垂陰處，森森俯大川。

寧遠唐帝故里

唐代新豐市，千年霸業非。誰從歌鳳德，相對有鶉衣。土瘠蟬吟屋，人疎月上扉。傷心興廢地，落葉不堪飛。

蘧江

孤身行萬里，驛路怯星軺。樹密烟邨小，沙平水岸遙。野狐衝馬立，山鬼伺人驕。漸喜南州地，猶看聚晚潮。

潭市

曲澗涵秋雨，人家水鏡中。蜂房綠石竇，虬樹繞花叢。農事悲荒土，鄉心寄暮鴻。徘徊萬里路，何日到春風。

湘潭道中

世路原多險，況經巖礪行。日從嘗午見，雲向漏天生。果熟猿朝暮，花深鳥送迎。何時出暗谷，一望大江平。

閒居

好山當面出，知我在幽軒。煨芋聊充飯，烹泉不問源。譚元藏史李，學稼小人樊。數得林間趣，花開鳥亦言。

晚次江門

世事何年定，江臯且振衣。樹紅橙子熟，瀉白鯉魚肥。獨鳥衝烟去，殘霞壓岸飛。邨醪無處得，空對月光輝。

舟中聞笛



夢餘猶枕午風涼。野笛何心欲斷腸。萬里一身秦塞柳，扁舟五月玉門霜。故園去去雲山盡，白髮穆穆道  
路長。不比笳聲頻入耳，擬邀子野到征航。

陽平關酬友人席仲材

山河百二劍鋒摧。漢上猶思召父來。短綆終無弭亂策，中流空詡濟川才。子遺聊與鷓枝寄，大力還須鵬  
背回。春築當年亦細事，漫將涕淚灑荒萊。公築陽平關以撫流移，惜後無  
有葺之者，結語聲淚俱下。

渡臯蘭作

相隨洮水渡臯蘭。高柳垂條麥浪勻。玉塞西馳尊八極，黃河逆轉壯三秦。應教滴博歸荒服，更遣輪臺置  
守臣。此日神州煩擘畫，且從徼外洗烟塵。

雪山

光搖旌旆五涼平。天外羣峯玉削成。瀚海欲空青見月，燕支未染白如瓊。飛鴻已度長城窟，勒馬還歌出  
塞行。朱夏重裘猶不解，崆峒倚劍自崢嶸。

鎮羌道上有感

鷹眼何堪秋草枯。姑臧清節至今無。籌邊不肯空談虎，策國豈容先問狐。已許此身嚼塞雪，那教家夢到  
江鱸。雄風歌罷秋聲壯，古驛亭前倚湛盧。時甘帥不法，甫入境，  
即行論奏，具見丰稜。

早發古浪

水剩山殘接大川。平沙一望不分天。何從去覓金屠澤。且喜來無鐵箭傳。秋草正肥驕塞馬。寒膠可折勁霜弦。孤城昨夜隄防密。鼓角聲高壓遠邊。

雙塔道上

七月柳青麥未黃。江南花盡塞西霜。一灣清玉流殘磧。萬里寒沙築大荒。劍舞明星綠露淬。弓灣新月倚風強。白狼西去烟初靜。莫唱涼州客思傷。

靖邊作

鳴沙萬里憶芙蓉。午夢猶酣客思慵。戍卒秋新將飲馬。將軍歲久不傳烽。停車無計綢桑戶。乘傳頻勞進午囊。獨坐帳中驚白髮。何堪砌下響秋蛩。

五涼郊行

旌旗畫捲出城闔。緩帶無妨步塞塵。石列魚鱗能次序。山垂瑪瑙自嶙峋。玉川宛轉歸王國。金塔高嚴類古人。莫謂黃沙春不度。朔雲邊柳自芳辰。

落索河有感

百折波濤險。一泓山澗清。天高雲黯淡。巖老石崢嶸。古洞都成穴。諸峯盡築城。版圖猶蜀界。風土半秦聲。杜宇啼方歇。銅駝歎未傾。旌幢連赤縣。烽火到神京。嫠婦徒存恤。羣臣孰請纓。傷予才略淺。深媿李西平。

黑松嶺

漠漠濃烟罩萬松。逶迤秋嶺盡成龍。聲寒鐵騎千軍肅。一線遙看古戍峯。

采石磯晚眺

磯頭誰忍坐垂綸。天送閒緣一葉身。烟護萬松三月雨。水圍千舍六朝人。

胡世安

世安號菊潭。井研人。崇正戊辰進士。入國朝。官至大學士。著有秀巖集。石芝軒偶存。容竹居偶存。

譯峨嶺異魚圖贊補箋

和陳實菴同年續峨遊夢

昔年禳噩夢。曾賦憶峨行。天假烟霞供。人寒猿鶴盟。詩瓢雖早辨。斗室未垂成。忽覺移文至。慚余伴俗情。  
三遊有譯籟。夙締亦殷勤。靈稱非私我。幽探若待君。陰晴山態易。黑白水情分。到者無他侶。逢迎只素雲。  
勝峯雲海涌。培塿赤城標。騎殺方追葛。騖鸞亦遇蕭。春遲巖北秀。夏減日南驕。旅夢依青岫。評題總寤描。  
鹵嶠乘風便。寒潭濯魄澄。山朝聞靜籟。樹古引蒼藤。蜥蜴充龍號。貔貅學狃登。同人隨降陟。濟勝具偏增。

李鑑

鑑字涵白。安縣人。崇正戊辰進士。累官宣雲巡撫。入國朝。陞總督宣大三鎮。再總督河道。奉

寄桃源陳器之明府

龍淵白鶴不易知。切玉追風乃見奇。古來神物多自闕。觚稜炫耀徒區區。陳侯落落原靜者。十年投分支

山下抱兒當戶不聞聲。桐陰深巷無車馬。海門浪蹴樓船湧。黑雲壓城山欲動。日日兵前喘息微。輿臺攘臂誇拳勇。是時陳侯方閉關。予亦跼蹐闌堵間。投詩引我入勝地。得酒時為破愁顏。風塵一別年來久。顏色常思別離後。飛龍天上不可攀。空向童峯回白首。湖南清絕古今稱。羨君臥理稱神明。到日已聞齊買犢。至今還似未經兵。始知才大成常晚。汗血霜翎終一展。丈夫騰蹕亦有時。未擬蹉跎嗟歲晏。君不見白頭浪高涔陽深。九嶷綿亘青楓林。側身南望思公子。沅芷澧蘭知我心。

柳寅東

寅東字鳳瞻。梓潼人。崇正辛未進士。官至僉都御史。入國朝。寓居維揚。有來鶴堂詩集。鄧孝威云。解職。僑居維揚。與諸大老相倡和。詩在眉山。劍南間。而造意命格。有游于盛唐闡域處。

和胡宗伯菊潭夢遊峨眉山

三峨不可卽。遠在西南偏。白日迷歸路。青天上睡僊。鉢馴龍子蟄。樹闔定僧禪。栩栩遽然後。逍遙再著篇。八十四盤道。懸崖撒手行。將迴西日馭。欲踐北山盟。見雪知盤古。因風問廣成。緬懷王逸少。未至已馳情。家山十載別。客路半生勤。處世覺同夢。入林吾與君。深溪憑虎渡。聖水自龍分。想見詩囊裏。兜羅上界雲。

望泰山

邃古誰開闢。東維奠與區。廢興輪日月。封禪遞唐虞。山呼去聲。今天子。松傳古大夫。長生如可學。應有白雲都。

王範

範字慕吉。內江人。崇正辛未進士。官至巡按浙江御史。蜀亂不仕。國朝寓居丹陽。

慕吉先知丹陽。清勤有能聲。公。

餘曠處。屏後一室。三年未嘗入內。丹人素德之。寓居時。贈送薪米不絕云。

崇正宮詞

水殿風搖楊柳絲。先皇朝罷獨憂時。抽毫却寫賢臣頌。面勅中涓賜主兒。

自注。故宮人左氏。今為民國院衣婦。能言掖庭舊事。云宮中稱皇太

子曰主兒。

慈寧宮禁老莓苔。元日驚傳法從來。上下隔簾遙拜畢。六龍飛輅一時回。

慈安張后居慈寧宮。帝朝后不相見。於簾內答兩拜。

宗教一

敦一字凌霄。宜賓人。崇正辛未進士。歷官江南巡按。督學御史。入國朝。進通政使。督學順天。

卽事

寒夜挑燈檢敝囊。客心無奈轉旁皇。只存一幅胡威絹。拭得酬恩淚幾行。



蜀雅卷二

費經虞

經虞字仲若號鮮民新繁人崇正己卯舉人官至雲南昆明令遷廣西知府入國朝卒有荷衣集

仲若父嘉語。明末以明經授大竹教諭。善詩詞。生四子。仲若其季也。事親以孝聞。令昆明時。廉潔端謹。民愛戴之。土官吳必奎反。討平之。獻閱武定浮民。全活甚衆。擢雲南同知。再遷知府。不之官。歸里著書。人

服其高介。事見通志。仲若當蜀亂之後。獨能以詩學世其家。其子密。其孫錫際。錫璜。俱以詩鳴蜀。再傳不替。可謂有鳳毛矣。

往定軍山下潘氏授徒崇正年作

國亂民生蹙西南久困兵流離心不定鄉塾事猶清花啓新蓬戶書傳舊讀聲一官如夢斷垂老只諸生

喜張象狎至揚州話舊

吾子何時至鄉音入耳新久爲吳地客終是蜀山人沽酒坐中夜看花到暮春百年才論定只恐媿芳隣

所聞

共傳徐元直尙在南山雲我欲從之去高峯麋鹿羣溼寒留古響松老亂羅文別有閒田宅種花無夕曛

上梅花嶺

傳說隋朝苑蒼茫煙樹空殘陽迷野寺古驛向江東一代高原後孤墳亂草中逢人求故事何客號于嵩

揚州北郭有史相公墓。

遣兒密往褒城授徒

送汝出門去。高堂淚黯然。病來今更瘦。亂後久無錢。斑白來千里。全家食一編。艱難宜力學。大父是先賢。

定軍山下村居

倦起披衣獨上臺。白雲紅樹一重開。石泉香透花長落。木葉聲乾雨乍來。觀物未能忘舊事。避人稍欲著新裁。耆年何處歌商調。扶病相從聽上哀。

自漢中攜家往江南

蕭條故國賦東征。白首攜家萬里行。珠樹有禽隨我隱。玉山無地傍誰暱。餘生已覺羞錢柄。舊曲何堪更羽聲。夜起呼兒同玩月。老夫不是爲多情。

雪

高城臨水浩無涯。雪片飛來奪月華。天上遂教殘玉樹。人間重與種瓊花。丁年絕域迷歸路。寒夜孤舟未抵家。吳越乍聞歌楚調。空流老淚向琵琶。

思蜀

垂老無家只自憐。不堪往事益淒然。當門慈竹八千里。昨日疎梅二十年。旣使丁男安稼穡。遂無姓氏到風烟。春時更覺傷人意。寒食青青麥滿田。

揚州春日



緩步西郊日欲曛。水流花發又春分。久無弟子傳秋駕。空有佳人隔暮雲。沒盡雙鴻聲尚在。飛來小鳥食爲羣。興酣思續蕪城賦。老大悲傷不好文。

歸田吟

出山未達便無家。結屋青城上紫霞。手版何曾成一事。幾年辜負碧桃花。家破猶餘半畝塘。杜鵑啼處柳絲長。騎牛不到人間去。白髮蕭蕭晒夕陽。

王新命

新命字純嘏。潼川人。官至河道總督。有東山集。

詩最純。嘏年甫十二。賊目張獻忠攻潼。潼陷。一家七十餘口皆被害。公匿文昌廟土穴中。乃免。風鶴驚惶。東西

奔竄。大兵入蜀時。公年十五矣。艱苦流離。難更僕數。後以諸生補筆帖式。旋授中書舍人。量移柏府都事。尋轉樞部車駕司員外郎。出使滇南。逆藩攝之。不屈。還朝。未幾即有巡撫湖北之命。政聲茂著。君相稱賢。尋陞河東總督。聖寵特隆。細按其平生。少習帖括。長閱經史。以及天文、地理、方輿、象數、兵農、理學之書。靡不究覽。居官時以坦容養性。以恬適怡情。休休乎有房杜之風焉。

使演

祇命來南服。馳驅輕萬里。聖治洽寰區。滇池跋扈起。元濟爲戎首。干戈懾天使。我徒烈丈夫。成仁取義耳。從容誓天日。慷慨存廉恥。上以壯國威。下以光青史。幽拘夢寐清。惟礪睢陽齒。

別江右

昔來南浦日。此地只孤城。驅勉行吾拙。艱難任世情。有心籌國用。無力贍民生。贏得清風好。飄然兩袖輕。

險少

纔見烽烟靖。災荒又疊聞。按圖稽戶口。曠野少耕耘。下詔憐餘子。獨租出聖君。不才慚賈傅。宵旦獨慙慙。已知民力竭。仰屋強持籌。到處分銅虎。誰能運木牛。檄書頻夜至。輪輓幾時休。幸荷皇天眷。無貽覆餗憂。

己未仲春。俞都閩。招同李觀察。李大參。黃憲副游青雲。

雲璣鳳管啓瓊筵。領袖恆沙八百仙。冠蓋雲龍追此日。瘡痍風鶴想當年。公餘偶問烟霞地。亂後重逢花柳天。山水從來饒逸興。寧須行樂看鞦韆。

龔懋賢

懋賢內江人。官至光祿寺卿。

下峨從雲中行

海氣如雲一抹空。洞雲醉殺白猿公。臨行却贈山中物。幾簇寒烟裏雪風。

楊世珍

世珍眉州人。

白龍池

避盡人間垂釣叟。優遊來到翠微巔。天懸藤線花爲餌。地湧池盆月作筵。幾片瑩瑩高下石。一泓湛湛古今天。饒伊不逐風雲會。好學驪龍自在眠。

饒桂陽

桂陽、眉州人。

大峨山

名勝日相親。吾家在山下。譬如居寶所。得寶不論價。髫年走雲巒。壯焉未曾謝。探奇詩窮幽。觀變知元化。烟霞分晦明。氣候無春夏。陰崖千古雪。石室萬年舍。彩光現晴嵐。星燈燭昏夜。

李實

實字如石。遂寧人。崇正癸未進士。官至江蘇吳縣令。國朝寓蘇州。所著有蜀語、吳語。如石爲人方正不讓。鼎革後遂寓於蘇市。隱居三十年。著述甚富。子仙根。以鼎甲官少司農。終身方巾布袍。如未有祿養者。年八十卒。事見說鈴。清潔。於書無

春閨曲

碧玉堂前柳絮飛。白狼河外信音稀。征夫不及營巢燕。歲歲春風一度歸。

呂潛

潛字半隱。別號石山農。遂寧人。大器子。崇正癸未進士。入國朝未仕。卒有懷歸草堂、課耕堂等集。揚州府志本傳。潛工詩文書畫。人得其尺幅。皆珍之。嘗遊宮氏春雨草堂。與姜孩。梁以璋酬倡甚多。傳爲盛事。流洋感舊集載牛隱望江詩一首。未盡所長也。茲從集中選入。方不沒其善。

上元日懷兩弟

已斷江南夢。荒園勝事增。遠灘春社鼓。寒月草堂燈。濁酒因鄰得。嘉蔬近圃登。佳時兄弟隔。愁思獨難勝。

送友蒼大師住水西

飄笠歎無定。名山久待公。雪殘春路滑。雲過晚江空。道力馴岩虎。鄉心折塞鴻。還憎多慧業。詩句滿南中。

秋水園卽事

近午過重溪。亭空春草齊。幾家團市小。一寺背山低。花隱漁人路。香留燕子泥。前賢遺澤在。五夜尙聞鷄。

邗江夏夜懷史赤豹蕭寺

飛鳥不知處。孤城生暮雲。吟邊誰最苦。鐘畔爾先聞。月冷空王閣。風號故相墳。蜀岡有歸路。吾亦戀斜曛。

吳園次罷守吳興感贈

不悔無家計。蕭條傍雪村。經宵焚栢子。向月倚桐孫。楚塞煙波闊。吳船洞壑尊。有時念漁父。短服過柴門。

江陰晤年友張四若志感

二十年前別。重逢白髮生。登堂如有淚。對面各無聲。多難惟存骨。居貧不墮名。天涯兄弟少。淒絕動江城。

夜登君山

日與山相對。追涼上晚磯。月沉江樹暗。風急浦燈微。舊壘逢僧指。荒祠到客稀。登臨期更盡。徐趁野螢歸。

夜登句是

大水渡泗州

浩浩春濤闊。孤城一葉浮。烟波淮水暮。風雨泗陵秋。戍壘存官渡。蘆花伴客舟。年年涉江渚。愁絕此中流。

登開元塔北宋築以望契丹一名科敵塔

漠漠河山盡朔州。紺宮曾與作邊籌。驚看白日憑飛屨。絕少黃塵到敝裘。唐世何人分鴈塞。宋家此地割

鴻溝。州有唐城。宋興遠分界處。于今北望休乘幘。獨寄征人萬里愁。

上谷感懷先司馬以崇正矣未嘗總督保陽。距今三十四年矣。重到賦此。

趨庭猶記少年遊。大纛威名易世留。上谷峰沉青海月。中原魂斷白雲秋。麒麟臥宿三川草。蝴蝶驚回八渡溝。華表不歸遺老盡。斜陽立馬淚難收。

石亭寺樓與友人話舊

江濤如雪亂飛鴉。客裏逢人漫憶家。杜宇叫殘巫峽夢。鷓鴣聲斷嶺南花。天涯寄食無耕土。世外藏名有釣車。試看滕王遺跡盡。西山空對晚煙斜。

奉寄李制府

滄浪嶽崎四百灘。從今蜀道不言難。艤舳風駛波聲動。蛇鳥雲高陣氣寒。父老久煩司馬節。西南再築武侯壇。懸知儉府多奇士。倘許歸來廁騶冠。雄傑

汁梁

魚龍去後息兵爭。萬井依然禹甸清。望裏遺宮春草沒。吟邊古戍夕陽平。遊梁詞賦慚司馬。入洛年華異賈生。欲問夷門栖隱處。荒堤衰柳不勝情。

成都雜感

陸海塵飛井絡昏。錦城茅屋類江邨。摩挲但有支機石。尙共銅駝臥草根。  
繁華闐闐重詩書。賦就朋箋錦不如。萬里橋頭吟社散。枇杷花下更誰居。  
前朝婦女皆  
有詩社。

客中逢梅溪侍御爲作畫

往事已隨春夢斷。故人相見說林巒。岷峨歸思濃於酒。只把家山作畫看。  
半隱蜀人。  
家于巷。

江望

橫江閣外數帆檣。立盡西風鬢漸霜。只有鄉心不東去。早隨煙月上瞿塘。

遣興

烟中白鶴獨飛還。相伴孤雲盡日閒。落日放舡湖水上。一簾秋色看青山。  
暮靄霏霏捲翠峯。透籬落葉有形踪。杖藜獨自行吟去。不是尋松定看松。

呂溥

溥字卿藻。遂寧人。潛之弟。

成都道中感懷

老大苦奔波。人憐亦自知。蕭條家計拙。潦倒壯心違。按劍星辰動。狂歌日月馳。丈夫悲慷慨。莫訝鬢成絲。

李永周

永周字完冲。成都人。

旅中望月


獨有秋中月。何人不喜看。久留滄海影。遠共錦江寒。戎馬家難問。他鄉淚未乾。欲將數行信。無處寄平安。

潘絨

絨字來朱。大足人。遺民集。來朱老女吟云。少小蓋聞戶外言。不知媒妁幾寒暄。無端忽聽隣人語。笑整荆釵獨閉門。可以想其貞志矣。詩亦清拔自適。

游元嶽

名嶽匪寰區。茲山冠靈牘。上懸萬仞梯。下瞰無底谷。九州奔轅同。一往心神肅。婚嫁向平舉。仰止子長篤。瞻矚情已欣。躋攀徑如熟。乍喜脫塵襟。況得返初服。屢憩叩天關。羣趨撼地軸。紛綸螳尋埳。險絕猿升木。盡縮俯壑蹊。懷凍懸崖屋。更多素心人。栖真傍巖麓。攬勝眺難周。結隱隣堪卜。愷悌神所勞。不回敢求福。





# 蜀雅卷三

費 密

密字此度。號燕峯。新繁人。經虞子。有鹿峯燕峯等集。王漁洋他北偶談。此度少遇逆獻之亂。窺身四城不

流寓泰州。州守為除徭役。予曾見友人几上一卷。偶取視之。其首篇云。大江流漢水。孤艇接殘春。聞之。乃

密句也。遂賦詩與訂交。密跛一足。後往蘇門調孫重元先生。稱弟子。吾蜀詩人。自楊升庵、趙文廟、任少海、

古意

久已歷艱辛。人情今始解。五日織疋布。估客嫌不買。  
東隣女如花。西隣女如葉。東隣人作妻。西隣人作妾。  
看花莫看葉。夢物莫夢水。遠姨同我年。今年生一子。  
掃地得餘光。所見何咫尺。繫桑有餓人。報恩逾金石。

詠史

山東無足事。連衡欲用秦。咸陽方逐客。歸作大梁人。  
少年縱飲博。任俠顯諸侯。無人求劇孟。藏劍宿娼樓。

北征

邦國遇塗炭。歲已八九徂。展轉山澤間。因鬱意不舒。壬辰十一月。始發自成都。于時正凜烈。北風傷肌膚。老父方多病。乘牛取長途。官道畏遊兵。山徑暗崎嶇。所賴多戚屬。恩愛相將扶。敗絮惡且棄。天寒不可無。荒絕驛路亭。但尋人跡下。或復鬼神祠。或復殘廬舍。過水寒侵骨。登山泥沒腓。行行無所止。日暮粗得息。筋力已困疲。伐薪具炊食。野燒周四圍。慮爲猛獸得。腸胃如枯土。稀羹潤顏色。茆乾刺同刃。刈拔偃終夕。低頭就火視。流血浸肘腋。長松勢百尋。巨石橫一里。寒草藏開花。枯藤留結子。花開色何皎。子結味何旨。人力徒辛勞。天地物皆美。沿邊苦荏苒。除夕至綿州。烽火正擾攘。秣馬隔江流。出檄示軍官。呼人爲濟梓。一鼓入城中。破屋何所求。士卒感苦辛。各出飯一盆。嗟嘆令強食。毋以飢煩冤。苦深精力消。皮肉皆血痕。親戚在閬州。可以救朝昏。作書一尺紙。爲報家人存。綿州城何大。中川之要津。舳艫接南楚。車馬通西秦。勢重控部落。赫奕鎮文臣。濟濟數萬家。一旦化荆榛。狼狐白日走。魍魎哭城闔。全蜀盡枯骨。陰晦聚災屯。害氣久不絕。耕鑿困遺民。親戚自遠道。來迎當春天。乞假各數騎。背瘡深可憐。大馬一無轡。小馬一無韉。雙臂牽藤蔓。聊束褥與氈。馬力亦何少。相易出長道。曠遠憂意外。馬飢嘗嚼草。婦女艱難行。痛哭心慘哀。負物置宿莽。喘息還復來。藏身匿村樹。狙伺人歸逋。畏恐驚舍去。同伴不敢呼。日暮至一家。炊飲若珍珠。老人置上座。再拜謝荒蕪。我顏如僮僕。食我堂之隅。飢人歎一飽。寧問禮意麤。往往官長間。亦復相餽餉。累月至閬山。毛髮悉焦枯。古時蜀道難。棧閣下方軌。葭萌諸郡縣。桑蠶遂生齒。後世割褒中。恐滋羣盜壘。利園爲門戶。大軍嘗麾指。東川旣已沒。西川旋不守。捍關一夫當。賊入如摧朽。始知遠畫策。不在險與否。

因頓留十日買舟意欲東倉皇奉老親出此蛟螭中江漢幾卅年衰弱病成翁媪然翻飛意不復故豪雄  
衆庶罹喪亂我復爲勞人一朝辭墳墓相望若崐崙卽此眼中路皆可成海濱汨落如黃河舊事痛不已  
寸心思無窮隱忍未能舉茫茫者天涯微身曷所止二三骨肉親居處各異里當此無家別安能不傷毀  
天地固無情人生豈終否棲遲田野間白首佳山水我自種梧桐遣妻樹蘭芷村釀亦已熟歡笑偕稚子  
俯仰旣無憾旦夕肆樂只歲晏茆屋寬狂歌從此始

豐城安漢看梅同徐時俊

天陰幕遠霧山沒青隱隱江平沙逕幽春草發岡嶺舍舟循斷岸禾黍秀里井叢竹鬱勃深村樓列舊畚  
依垣老花樹微香散寒影樹下逢一翁言簡氣尤渾亦欲卜山居間出耕半頃

章柳外另  
一種

鬪鷄行

輕衫樂鬪鷄各抱一隻來地潔無蔓草坦坦鬪場開大鷄冠五寸小鷄脚一尺脚稜精鐵闔冠老珊瑚赤  
此鷄產何處良種從西川高山大澤聚靈氣生爲殊物如鷹鷂出巖勢與衆鷄異不徒飽食供烹煎獨立  
一聲天地轉起張雙翼精神展寧止可慰兒曹心亦堪迴却君王聲兩鷄立鬪場氣勢互相當風捲雷轟  
百十合四圍觀者眼生光怒色蓬蓬裂雙目昏疲不肯甘雌伏亂毛滿地血淋頭長頸靡靡少完肉一鷄  
晚出勢猶陡衆鷄見之皆却走狂童盛氣快所言共嘆此鷄齊拍手賭取青銅錢抱鷄歸飲酒明日重來  
鬪一場君輩來看古無有

紡車口

七日五縣路。三百六十灘。山深無人至。好鳥相繇蠻。松樹大十圍。霜葉如渥丹。此中有隱者。抱朴髣毛斑。

贛州

宗子稱兵出。中丞捕反時。廟謨資節鉞。亂卒倒旌旗。往事餘烟樹。新愁倒玉卮。南行弔楊僕。春水遠迷離。

僊霞嶺

野寺無僧住。蝸涎四壁乾。人家移絕壁。馬跡亂空壇。山色侵苔滑。松聲夾路寒。遠行猶百舍。處處向南看。

真奧

冬菊

九日已陳事。黃花未改妍。寒枝當北牖。野色耐霜天。酒凍徵君側。冰流故老前。蕙蘭無數好。春雨各娟娟。

聽解二彈琴

自我傷寥落。空懷大雅音。忽從遷客指。重見故人心。谿溜濕春雪。松風出暮林。秋鴻休再鼓。幽怨已難禁。

移家定軍山下

移家接村舍。地僻好烟光。藏此新圖籍。仍歸舊草堂。白來蟠冢雨。青入陸渾莊。久住隨風俗。悠悠野興長。

杜宇

霸業一時盡。哀聲萬古傳。哺雛依百鳥。流血濕青天。瘴雨離人酒。春風估客船。此時來耳畔。何處不潸然。

北岸山盡

山勢巖崑盡空濛。平原開白日。羣雁掠青霄。一月舟爲宅。千峯雪未消。故鄉從此遠。揮涕向蕭條。

朝天峽

一過朝天峽。巴山斷入秦。大江流漢水。孤艇接殘春。暮色偏悲客。風光易感人。明年在何處。妻子共沾巾。

三四進洋  
梅贊。

山中

采藥不知還。偶來身即閒。月過燒葉處。雪滿起雲山。猿欲寒藏果。熊熊老見斑。菖蒲石上節。久餌駐朱顏。

隱者

老翁久深隱。結屋巖石閒。春日采芳芷。夕陽行亂山。無事入城郭。獨負壺樽還。便欲隨芒屨。白雲相與閒。

可畫。

別友

既來不甚數。去亦無乃輕。吾且行鼓瑟。子何多遠情。山寒滴竹露。屋靜聞松聲。幸有石間在。四時禽鳥鳴。

贈客

屏跡屠沽內。常懷一飯恩。鐵錐報公子。寶玦贈高人。抗手自茲別。悲歌西入秦。可詢王景略。捫虱向誰論。

江夜

復載騷人夢。烟波異縣行。老禽爲蚌蛤。野鴨護鴛鴦。且自從容去。無妨淺淡裝。相思在何處。幽鬱意偏長。

涇縣雜詩

故人無禽慶。五嶽何時行。共道黟山好。能娛隱者情。權歌起清夜。野服過秋城。卻慮逢邨女。猶存賣藥名。吳境絕塵俗。從容到寂寥。市人羣鹿豕。村路出烟霄。溪水胡麻飯。寒蠶細藥苗。邱隅聞好鳥。乘興石欄橋。

浮溪

日暮入邨落。松杉客坐新。雞豚散在野。兒女聚觀人。禮樂餘二代。藤花隔四鄰。家山獨烽火。流蕩至今貧。

村景可繪。

棧中

棧閣通秦道。青天未易行。盡過奇絕處。不負有平生。白馬巖中出。黃牛壁上耕。野花埋犖跡。幸蜀只空名。

確奇。

客

負釜出巴蜀。饑殮類賦狙。那能隨北雁。長自客南徐。春事賈人早。幽棲僻好愚。閒來掃落葉。席地坐開書。

沔縣村居

故國不可到。春風吹閉門。雲移峯頂寺。花落雨中邨。事簡人過少。山深褐自尊。無書傳弟子。耕鑿任乾坤。

似阮亭集

霍邨

二客乘秋艇。翩然過古邨。不緣喪家久。勝地足銷魂。水族甘魚蟹。山居長子孫。此中忘貴賤。來往霍公門。更欲求佳處。何能勝此山。田園當畫裏。婚嫁遠人間。灌口峯千疊。彭門水一灣。江南無屋住。吾意亦須還。

夢中作

勞心望春水。春水載孤舟。載此孤舟去。江南江北流。有時取美酒。獨上最高樓。高樓何所見。歷歷是神州。

江晚

昏氣滿孤嶼。此時途尙遙。天寒將作雪。風急欲收潮。棲鳥黃雲樹。歸人白版橋。酒家隨意宿。明日進蘭橈。

同蔡治田金游西山登祕魔崖望石壁

絕壁幾人到。虛崖一望收。秋聲生衆木。日氣射殘樓。僧少不鳴鼓。簾稀只挂鈎。却愁山雨重。賦杼捲溪流。

雨

急雨占紅色。遙青入望微。水寒雲不絮。雁大濕能飛。早汲愁高岸。遲還畏薄衣。瀟湘何處屋。開戶待人歸。

高郵遇故人

相逢多難後。只此是天涯。與子躬耕處。蒼生尙幾家。朱門齊牧馬。白骨亂開花。耆舊何人在。行吟感暮鴉。

厚。感概深。

阻風三江口

晚泊孤洲葦荻傍。襄樊估客嘆淒涼。三江水下金陵霧。百草春乾赤壁霜。寒氣不開從伏枕。鱸魚多買當  
攜糧。自有長風行萬里。人間豈畏路蒼茫。

送姚曼之鹽城

淮南旅舍暫相逢。便放扁舟過海東。未有男兒長袴下。不曾賓客處囊中。萬山月色孤筇路。十載秋思一  
笛風。別後新詩應滿篋。重來爲我詠飛鴻。

元夕雨中見雁

野雲片片接橋西。可惜年華負柳堤。江上雨來催晝暝。沙中雁起覺城低。寒邊無信傳春鬪。荒圃宜歸理  
舊畦。濁酒一盃和淚灑。看燈誰在浣花溪。

小仄

放船直入深山去。無路青林有數家。烟裏人聲呼伐木。巖邊鳥跡亂開花。殘民未死征徭在。新戍頻增驛  
路譁。時見秦中官長過。不知何以慰三巴。

亂後入青原山

遠郭寒峯野霧昏。殘僧遙指舊軍屯。河山百戰埋金甲。煙月三年度玉門。兵氣累朝猶未解。吾生已老更  
何論。不將酒灑黃師塹。拋滿蘆花當一樽。

送劉與生還廣元兼呈王嶽



送爾西歸意惘然。吾家山水復誰憐。雲邊短杖看梅樹，雪裏微燈夢杜鵑。一郡更思新市後，千峯長在故人前。王郎舊有江湖約，爲寄芝臺詩幾篇。

西鄉縣

雨餘春樹百花稀，好處來游却似歸。貧賤已甘人盡笑，顛狂未解客何爲。長隄白日眠牛馬，官路青峯放鹿麋。八十老翁居住僻，相逢只說太平時。

蕪湖

城北淒迷水霧浮，行人懷古到千秋。空餘鐵券殉芳草，不見箜篌止亂流。十里桃花春社酒，一天明月大江樓。久無蕩子思鄉淚，幾度鶯聲起暮愁。五六名句。

金陵懷古

一聲殘籟旅魂消，柳暗花飛過六朝。甲第雲霞開壯麗，樓船鼓吹擁逍遙。石壇有路生春草，商女無端泣夜潮。極目可憐鍾阜外，長江空鎖水迢迢。應爲此題出色。

呂太常潛自歸安移家海陵

銅龍宮闕邈山河，臺笠穿雲就薜蘿。天近南徐開霧氣，人從西塞狎烟波。倉荒歲遠成遺老，草木人稀發浩歌。可許相邀尋舊約，江魚村釀共婆娑。

春晚

頽垣見舊閣。佳處在鄰西。欲買畫眉鳥。非春亦自啼。

洋縣二首

春山青復青。春水綠復綠。花開不見人。何處滄浪曲。  
微風度城上。滿城花盡開。閒攜一壺酒。花落滿蒼苔。

鄱陽湖

昔去湖水深。來日湖水變。湖水無定流。搖出湖口縣。

古琴

古琴久不理。塵積斷痕斑。爲君彈一曲。明月滿江山。

空宅

春氣生寒。月色微。蟠龍繡鳳隱雙扉。主人一去空留宅。花落苔深。蝙蝠飛。凄涼可想。

識舟亭

漁舸夾岸。浪花腥。烟樹霏微。草自青。春去何人記踪跡。故衣重到識舟亭。

題畫

百株春樹隱茅居。畫裏人家似敝廬。小鳥斷橋啼曉色。落花晴日炤山書。

江曉


寒月無人守釣磯。秋風兩岸曉星微。渡口鴛鴦避舟楫。野鴻羣向荻花飛。  
飲友人家夜歸

岸幘歸來酒半消。月中頻望短牆遙。耕夫久斷繁華事。猶取春燈照版橋。  
遊紅橋

女堞飛烏趁曉昏。火攻猶見舊燒痕。春游畫舫都年少。一路簫聲進水門。  
塞上

塞上冰流綠玉莎。邊人吹篴向南歌。平沙大磧迷春雁。千里雲昏雪片多。  
古意

芳艸沿隄春楚楚。花枝開遍清江渚。一羣無數鳥飛來。恐有兒家白鸚鵡。



蜀雅卷四

王朝桓

朝桓字植夫。巫山人。植夫入費氏詩社。而自出機杼。可謂人杰。

費滋衡移家入城。同人過訪。即事。

村居亦已久。忽復來城闈。言念素心侶。遠道感離羣。卜廬古巷側。窈窕絕羈塵。閒門杖履集。列坐杯盃陳。鬚鬢皆老蒼。喜無榮利人。介性違俗尚。狂吟信天真。侵墉周氏草。壓架李侯芸。慙予近市居。願結河渚鄰。

黃山松歌 鷺鉅軒社集為程若菴賦。

雲海峯巔鐵作枝。蟠根絡石鬚倒垂。身幹特小心貌古。連蜷抑塞蒼虬姿。程君曠懷真好事。不憚巉巖遠羅致。輦來衆本多零落。惟有四株長蔽芾。哦詩酌酒興會佳。菁蔥掩映園林花。四時自不改柯葉。雖離泉石含烟霞。嗟乎汝四松。誠不能干霄蔽日。峨千丈。樵蘇斤斧知無恙。嚴霜密霰曾飽經。雕闌玉砌欣相傍。浣花翁愁蔓草纏。今汝托根盆沼邊。還如梁孟依臯廡。不害清風萬古傳。

范文茆

文茆字仲闇。號兩石。內江縣舉人。官戶部主事。著有石鼓山房詩集。鄂孝威云。范兩石在金陵時。刻運蜀後。所著亦不少。其長君。孫尚幼。果經兵火。皆散失矣。為之慨然。

峨眉山萬年寺送費此度往榮經省觀

敝衣猶賸老萊斑。負米雖歸不是還。世到亂時都作客。途當險處更開關。幾年草檄伸孤憤。累月移家近百蠻。瓦屋峨眉俱歷遍。滿頭風雪當游山。

題華嶽圖

上山看山形。下山看山影。色相誰能傳。妙應山靈省。此詩有二首。余過華陰廟。於石碣得之。爲登其一。

鄧子儀

子儀字伯鴻。巴縣人。有劍閣芳華集。

九日荒署寄杜思曠

無復龍山對孟嘉。詩成徒自感年華。江南佳麗空回首。不信官衙盡野花。

趙司鉞

司鉞字翼黃。號退公。彭縣人。崇正舉人。官至四川建昌兵備道。

拜將臺和費此度韻

高臺遙指碧流斜。何處東陵可種瓜。砌下百蟲啼夜雨。江邊一雁落殘霞。登臺事已成千古。守塚人誰置萬家。曾向淮陰尋釣址。斷堤衰柳宿寒鴉。

劉道開

道開字非眼。號丁菴。巴縣人有各夢草。丁菴有巴令王子美死節傳。可補史氏之遺。詩亦有豪邁之氣。

白帝城歌

白帝城。古人築。今人增。古人築之兮。險不可升。今人增之兮。賊來便焚。噫。歎歎乎。人有古今兮。城有古今。

疇昔

疇昔干戈裏。飄零剩此身。一生九死客。兩代六朝人。路未通新朔。歸應少舊鄰。鑿山與字水。回首一傷神。

宿栢林驛

古殿臨官道。淒涼落日斜。山荒多虎跡。驛廢少人家。昔駐君王蹕。今開野草花。珍收殘瓦片。製硯亦堪誇。

此在廣元閣中之交。古殿前閣也。

華陰萬壽閣望嶽

危樓新雨過。凭眺亦奇哉。迭見三峰出。遙知十丈開。關收山勢斷。河抱水聲來。搔首茅龍客。深慚混俗埃。

亂後初至成都

錦城絲管地。桑柘綵縱橫。露下銅駝泣。春歸杜宇驚。相逢無故友。獨坐愧餘生。却訪支機石。殷勤問舊盟。

和費此度雜詩

聞說吾生亦有涯。野人微尙在煙霞。墻東便是君王宅。谷口原宜鄭子家。無事焚香當讀易。有時擔水自烹茶。柴門晝掩容誰叩。只許風來掃落花。

岳廟

君臣無意復輿圖。唾手燕雲豈廟謨。才過張韓天若忌。心同龍比主難孚。金戈鐵馬公生氣。綠水青山宋舊都。畫舫不須經廟下。忠魂最恨是西湖。特識名言。不讓前人作。

馬嵬驛過楊妃墓

延秋門外馬嘶哀。玉碎珠沉土一堆。聽雨無人同棧閣。御風有客問蓬萊。行權定變中誅妲。怙寵戕身悔妒梅。謂江探。最是傷心烽燧日。人亡猶進荔枝來。言外有與廢之感。

鷄頭關

曲折如登天。幽深如覷井。近年流賊過。更比康莊穩。豈不可恨。

陳盟

盟字雪灘。成都人。雪灘生於明季。遭亂後。故多激昂之音。

大造行

大造具罽韞。冶鑄資羣生。融液循氣化。天地豈容情。嚶嚶千古士。振袂長盱衡。東海有男子。寧甘蹈滄瀛。夸父不量力。死欲追炎精。人生論成敗。天地無豪英。星漢久喪色。山川徒縱橫。美人香已杳。卷阿復誰鳴。瞻彼赤烏景。日夕無停征。

與親友話舊



江流日夜度高安。亂後同人老釣竿。天下晨星餘幾點。枝頭碩果未全殘。班班蘭笋抽香玉。隱隱雲煙護葉欄。所願故鄉歸有路。披襟重話再生歡。

趙燿

燿字方開。安縣人。獻賦屠城。安邑諸生二百人。一時殆盡。方開知難先遁。承平後。遂著書不出。

江上晚望

一片水光秋。中有愁來處。却笑晚行人。悠悠此中去。遠。

余价

价字君維。巫山人。

題山水停舟觀雁圖

萬壑層巒映日暉。停舟遙望翠成圍。千章嘉樹叢斜谷。百丈清流紀釣磯。身外功名誰料得。眼前世局要知幾。雲間雁字家書杳。何日田園舞彩衣。

冷時中

時中字心汾。號梅菴。內江人。有雪碗集。

漢中東費此度

偃仰他鄉客。君無一草堂。青年甘隱逸。白雪見文章。歸計貧難定。孤懷醉易傷。暇時須過我。暫得慰愁腸。

王璉

璉字子京廣安人

蕪湖宴集

園樹鶯來熟山池鷺過腥暑堪逃僻塢暮亦上孤亭鳥定猶驚月螢高欲亂星雨多知歲稔柴戶不須扃

晚唐人佳句

趙適

適字子明彭縣人

雨中秋日費滋衡外甥省墓卽事

避秦先世去無聞省墓秋來尙有君故國江山新入眼幾家烟姪舊同羣  
穎邊流寓思蘇轍吳下詞人壓陸雲猶有前朝碑碣在明年誰到薦春芹

郭奎先

奎先字汾又羅江人

丁未人日東江式繩

連朝礎潤凍雲屯此際晴霞湧瑞暎遠樹含烟如欲吐幽禽弄日漸爭喧君多逸藻花生穎我怪狂吟舌莫捫回首錦江春夢冷只餘芳草憶王孫

先著

著字涓求號獨齋瀘州人

涓求詩造句必新遺書必雅亦詞壇中飛將也

晚眺雨花臺

古臺覆秋雲。晚步帶殘酒。西風吹平原。林木失森秀。乘高一環眺。山勢若趨走。江遠天欲吞。寺密地能受。雄城超吾前。峻塔接吾肘。樓殿何鬱盤。岡巒自纏紐。舊都百萬戶。繡錯市廛有。長干諸女兒。曲成今在否。勝溯六朝餘。感從百年後。但覺艸木衰。莫知人骨朽。須臾暮色沉。搔髮立難久。朗然浮金鐙。煙鐘一聲吼。

題出塞圖

萬里邊牆恃堅好。怒馬來時騰蹈倒。當時甌脫少人行。今日春風肥野草。黃卿出塞衣狐皮。烏羊渾脫腰犀毘。手中鞭絲搖落日。心雄欲赴和林西。四十八家犬牙地。廓落蕭條舊三衛。琵琶一曲海東青。帳下胭脂插花醉。腐儒衰謝不勝思。朔漠中華此一時。因君出塞圖中意。感激翻成入塞悲。

薄暮燕子磯獨眺

雲沉日已隱。倍覺水天宜。興自一人發。狂真千載奇。空堪邀鳥過。幽獨許龍知。今古傷天塹。如何運又移。

再題永興紅梅

客盡爲香至。花如愁屢尋。僧扉不能隱。人跡遂相侵。幽獨傷於是。春風悔未深。繁紅因豔目。聊復寓微吟。

薄暮看衛基桃花

不堪苦雨困林芳。裹足橋東滑路長。酒伴忽來茅屋下。晴光初射竹籬旁。二分春色隨流水。千樹桃花澹夕陽。更約心閒方外侶。飯蔬清曉過山岡。似嚴滄

尋秋借雲辨樹南兩上人

老懷非不愛尋秋。怕向秋原易觸愁。小艇乍搖西郭路。故人追感北邱邱。過陶戴故居。殘山剩水憐江左。廢壘荒城話石頭。靜侶相攜能盡日。多年無復有茲遊。

段朝偉

朝偉字敬亭。簡州人。

得家書

無數鄉關語。欣從雁足來。披函經再讀。入篋又重開。勸勉憐清苦。平安慰溯洄。欲將珍重意。呼僕進殘盃。

余 齋

齋字生生。號鈍菴。青神人。有增益軒草

施愚山集余生生過吳門客舍。自言為梅花作主人。酒間得三絕句云云。詩最。鈍菴為大司馬肅敏公裔。值流寇亂。黃冠羽衣。

通難江東。賈古文詩字自給。不喜入富貴門。亦不喜贈富貴人詩。詩工漢魏及六朝。唐近體不屑也。嘗過江都。與野人高士遊。康熙乙丑仲夏。卒於瓊花觀中。時年七十有九。有五七古詩凡若干卷。易簣時。屬甥焦氏付其友張譜石選輯。佛竟失其稿。今新安姚綸如于扇頭壁上搜錄遺詩十餘首入集。不能窺其全。通國傳為恨事云。倪永清云。鈍菴詩。閒情逸致。超然塵表。真魯仲連陶元亮一流人。

除夕前二首

放浪無終極。看看歲又更。貧懷生倉卒。心事一無徵。促酒不成酌。斂衣空復情。蕭械無人知。振策倚前楹。孤衷原有屬。雙眼未全青。汗漫肆情志。暫遣憂思屏。回首念妻孥。豈禁心鬱憎。悲來不可遏。我生胡營營。營營亦何爲。悽惻不擬道。幸恃心潔清。可以對蒼昊。一身經百折。堅貞聊自保。偏側履荒途。何暇計溫飽。昔也居京華。有如魚在藻。今者嘆流離。不及安枝鳥。有酒且賦詩。塵氛迹如掃。不學裴晉公。擁爐嘆衰老。

辛酉元日

今晨氣宜朗。檐次透曙光。春風扇和柔。悠悠襲我裳。道院自幽靜。中庭焚異香。香氣何氤氳。隨風泛長廊。我本羈旅人。感此歲月長。孤蹤謝塵事。靜坐閱班揚。濡毫改舊詩。開樽引巨觴。踴躍無拘束。頽然入醉鄉。天地氣候改。陽和易冰霜。草木漸勾萌。梅花何處芳。幾欲探消息。林水空蒼茫。翹首憶江南。雲霞蔚相望。

題張諧石雪巢隱居

志士多雅操。援古以迄今。懷才與時異。志乃在山林。張子我故交。相知日已深。卜隱邗江邊。花木何陰森。堂名以雪巢。高爽豁夙襟。制度自精雅。良朋日招尋。可以賦新詩。可以彈素琴。門映城闔碧。池倒浮屠陰。觀望何幽杳。氣象自嶽岑。羨子經濟才。而不希華簪。胡爲養恬淡。殊有高士風。分叶幽居洵足樂。時共采芝吟。

簡友

歲暮增無那。而又簷陰雨。隙風入我懷。氣咽不能語。探囊無長物。枵腹待懸釜。衰殘畏奔走。晏眠恆至午。

人情近反側。誰能更古處。知己言在耳。德音燦可數。倘終願盼情。且夕臨江渚。

獨酌

友人惠我酒。竟日延清歡。閉戶無人來。好鳥伴我閒。初旭下窈窕。小窗明可觀。興來聊復酌。藉影相盤桓。幽寂性所好。瓶梅香未殘。卽此無拘束。境靜神亦安。未暝倏復醉。餘情盡可刪。

賞梅

連來雨不歇。淒風日飛颺。庭梅斂光彩。生意何微茫。天地忽開朗。靜院飛晴香。玉色映朝旭。疏影風迴翔。陰極陽自靜。氣運不可量。百卉亦因時。爛漫雲水鄉。就子營一醉。斜景逗餘光。

夜坐

靜夜正危坐。檠短燈力微。挑燈對雙影。宛若有所依。黝靜不殊致。語默空自知。莊蝶非不幻。蕉鹿非不奇。如何眼前景。奇幻有如斯。人生大化內。誰能不遷移。守一以御變。往復皆天機。靜觀有至理。得失分毫釐。

新晴得月

雲靜天益高。微風起庭樹。接葉望猶濕。塔草已多露。半規出東井。光彩異平素。涼夕豁人襟。靜對生遠慕。風竹碎流影。烟林平帶霧。安得同心友。清樹展良晤。徘徊夜漏殘。鷄聲忽交互。

廣陵季春十有三日憶沈子禹甸生日對酒懷之

虎邱何鬱葱。雲霞望如綺。中有抱道人。時在雲霞裏。三春景物繁。花氣香流水。詩歌陶逸興。琴尊延近理。

別來歲未周。絨情缺雙鯉。遙憶子初度。馳懷更依依。爲子歌斗酒。獨坐開雙扉。微風起將夕。園景澄清輝。醉臥不知曙。迢迢星漢微。

壬子春仲同家不遠遊焦山

猛風蓬勃來千里。凌晨吹立長江水。我曹乘興約同遊。衝風側立烟橋裏。招招舟子駕一葉。牽衣欲渡意還怯。乘危忍觸河伯宮。波翻濤湧驚魚龍。片帆飛渡任鼓側。頃之足與山涯接。向時驚悸今得寧。扶筇拾級相兢行。天光冥冥海氣白。羣山細縑成一色。憑高下視鶯背飛。轉眼忽見松濤碧。砥柱中流既有年。孤高直與溟渤連。上有金山中北固。三山鼎峙撐南天。古來大隱傳焦子。今時高邁孰與比。我來瞻眺起遐風。風濤萬頃雲霞東。

壬戌孟夏聽琴

孟夏之吉風景清。庭除瑟瑟涼風生。碧天如洗雲氣淨。張籊設酌招羣英。靜院東西分兩序。琴清月朗方持觥。須臾皓魄出東井。孤光照耀通宵明。撫絃動操出古調。洗耳不願聽新聲。座客無譁酒頻瀉。揮杯不覺玉山傾。人生樂事亦何有。今夕歡情差不負。六街寂寂更聲長。竹爐諸火香悠颺。

候月歌

老夫候月夜不寢。披衣獨坐凌霄寒。月亦有情鑒幽獨。飛光直射浮雲端。碧霄澄徹玉宇靜。流輝澹宕河山影。河山影燭寰區白。烟林古木晶光永。噫嘻月有圓缺人盡知。千年萬年恆如斯。今人不見百年月生。

老病死須臾期。此時對月卽無酒。徘徊無語徒搔首。長歌一曲憂思攢。星殘斗挹更聲闌。

新灘觀捕魚歌

君不見新灘奇險天下聞。驚濤怒浪如山立。上下舟行實畏途。放舟須仗灘人力。上灘牽挽終日勞。逆流直上百餘尺。束舟委浪下更難。撇漩擊波如箭疾。灘際洄流急且深。承流鼓浪魚競集。漁人舉罟百不失。烝然罩之如俯拾。傷鱗破額委泥沙。慘淡腥風起朝日。跳波脫漏時有之。潛跡江潭祕呼吸。灘人竹篋滿背歸。戶戶門前盈百十。霜刀直下亂雪飛。棄置頭顱人不食。乾魚家家掛滿壁。腥臭漫漫氣難息。誰云烹鮮世所珍。見之悲惻情罔極。嗚呼。廿年殺戮人民空。今復毒流鱗介中。

蜀都行

自我之成都。十日九日雨。浣花草堂益蕭瑟。青羊石犀但環堵。生民百萬同時盡。眼前耆舊存無幾。訪問難禁泣淚流。故宮荒廢連禾黍。萬里橋邊陽氣微。錦官城中野雉飛。經商半是秦人集。四郊廓落農人稀。整頓凋殘豈無術。日生日月養誠可。但得夫耕婦織無所擾。桑麻樹畜隨所宜。數十年後看生聚。庶幾天命有轉移。成都被獻寇殺刈。生靈盡。此篇逼真詩史。

卜居

臥隱仍無定。途窮數卜莊。有家何日到。老病滯瀟湘。道遠音書少。秋深客夢長。桃源今有路。恣意樂他鄉。

元日遊下鍾山卽事



上日淹留客。登臨興幾長。無人覺來往。半晌對湖光。烟際雲相接。匡廬屬渺茫。浦中帆片片。望裏應春陽。  
此律做古。

梅花三首

市上何人識故侯。青鞵皂帽稱心遊。相逢頭白留詩別。細雨孤帆下虎邱。  
邇歸見說為梅花。鄧尉風光滿眼誇。我夢相隨便東去。一天花壓帽簷斜。  
花時歸客怕花殘。烽火漫漫道路難。斷送春風多少恨。憑誰留寄一枝看。

官舍

葳蕤鎖下雙青銅。盡日無人官舍中。花落花開春已晚。流鶯啼過女牆東。  
晚唐妙語。

費錫琮

錫琮字厚蕃。密長子。新繁人。著有白鶴樓詩。別裁集。厚蕃克傳家學。五言亦有大江流漢水。孤艇接殘春。白鶴樓稿。才氣略下滋

衡。而聲調獨絕。品格在皇甫曾上。

綵雲曲

畫欄曲室珠簾垂。翠幌紅樓春滿幃。紅樓夜夜聞歌舞。窻前日日綵雲飛。綵雲飛。飛來飛去飛何處。飛入園中百花路。清晝香生睡鴨斜。美人歌起鶯聲住。

少年行

少年出入羽林中。自矜力能挽雙弓。金錯寶刀耀寒日。玉環絲帶繫盤龍。橫戈走馬河西去。九月榆黃瀚海路。只圖報恩決生死。寧知骸骨葬何處。

織婦詞

吳娘小袖新上機。金綿如絲孔雀飛。五年三丈織成匹。歲輸內府裁爲衣。葢宮鷄鳴夜未央。鼎彝微燕龍團香。帶結西玉破天碧。翠輦春移覩百王。吳江江水清如雪。女兒濯絲對明月。江風夜吹江水寒。明月照絲復照妾。妾起抱絲入洞房。回看殘月淚沾裳。山龍皆妾手中出。那得辛勤動尙方。

潁州道中

策騎入長林。村幽耐客尋。秋晴紅葉潤。山遠暮烟深。江館寒潮斷。河橋蔓草侵。古人殘跡在。空使候蟲吟。

放鶴亭

鶴去孤亭在。人歸往事移。可憐斷橋上。不是看花時。雲閣春潮冷。湖平午雁低。孤山梅尙在。殘雪凍南枝。

黃河


靈脈來天上。渾流晝夜奔。縱橫穿套口。曲折下龍門。地入滎陰斷。山臨華嶽尊。何須逢漢使。便擬溯崑崙。

登北固山

絕嶺橫江岸。登樓望渺然。潮來徐福島。山出寄奴泉。境界分吳楚。波濤混海天。千秋爭戰地。今喜靖烽煙。

邊辭

新拜元戎寵命嬌。寶鞍橫坐出中朝。活恩壯士輕生死。奮取昆彌帽上貂。  
繡甲羣來襯短衣。雕弓駿馬疾如飛。山前射取黃狼子。笑擁將軍罷獵歸。



蜀雅卷五

費錫璜

錫璜字滋衡。密次子。新繁人。著有掣鯨堂詩集。

別裁集。滋衡熟古樂府。詩中蒼莽莽。時有古音。然亦不無粗率處。淘汰之。取其古而近雅者。迥異時流。

滋衡遵父命。自揚州還鄉省祖墓。時兵燹甫定。道路險。與密嘗事相同。父子稱孝。尤為難得。本朝蜀詩自此度後。滋衡當推為一大宗。生平善放不羈。嘗登之。投其詩於海中。痛哭而還。蓋悲其才之不過。而求交於天吳陽侯也。其好奇如此。詩有至情。而根柢亦極深厚。古樂府直接漢魏。五

七律絕。亦在李頎崔顥之間。雖遭際明末。時露飢餓。然其言忠厚。絕無乖張之氣。識者當諒其時。惜其才。而去其疵可也。張雲谷云。滋衡樂府。上逼二陸。下揖三晁。陳石村云。古體奇葩。是揚馬之小友。

有所思

有所思。不知在何所。出門望四方。四方何遙遙。天生粟地生毛。海水蕩蕩白日搖。思之不見。望之煩勞。願為大鵬翼。飛到大海東。飛到大海西。飛到大海南。飛到大海北。

君馬黃

君馬黃。非君馬之為黃。黃獨良。去家門。行遨遊。則有十日五日之道。千里萬里之鄉。與君並轡參翺翔。君馬在前。我馬在後。君馬苦肥。我馬苦瘦。我馬噉其君馬噉豆。兩馬不齊。人心則一。馳驅天路。毋相讒疾。飲酒愷歌樂何極。但願君馬為龍上青天。我乘黃犢歸野田。有典有則

惜哉志士行

惜哉志士亦何愚。死亦何愚。死無以為名。亦何愚。吁。解一誰無室家。棄之如遺。誰不畏死。甘之如飴。惜哉

志士兮。解二海內豪傑。知與不知。聞志士死。鮮不哀之。惜哉志士兮。解三敗舟浮海。不可載兮。沅湘細流。

不可大兮。惜哉志士兮。解四

豔歌行

同心漆與膠。黑白雙綫維。竊恐君心變。日夕結在腰。日夕結在腰。雙綫補襠條。君去不復來。結亦不復開。

太白逸句雙燕參差飛。新紅成故衣。聞說君心變。扯碎燒成灰。心果松縱堅。此灰當復鮮。結意新

賣兒行

人生貧。慎勿賣兒。賣兒不若殺之。請告丈人。天寒無衣。腹中苦饑。有兒安得不賣兒。人生貧。但當夫婦兒女同賣。他作家奴。慎勿賣兒。賣兒不若殺之。兒有過。主人當笞。兒無過。主人當笞。兒早行出門。為主人擔水。擔水歸。辦飯煮糜。又為主人網鹿豕與糜。兒日午為主人收羊牧牛。兒腹飢。主人不知。兒離牛羊十步。五步。主人知之。主人笞兒。兒急呼重復笞之。主人笞兒。兒不敢啼。謂兒伴死。重復笞之。兒呼亦笞。兒不呼亦笞。兒無大罪過。何用笞兒為。兒頭無毛。臂無皮。臂如黃瓜。面如青梨。兒是爺娘心頭肉。頭髮是爺娘心中絲。親爺見兒。淚下如綆。多謝丈人。人生貧。慎勿賣兒。賣兒不若殺之。讀之為之淚下

高句麗

河伯外孫日之子。被髮東走。遇大水。魚鼈為梁。踏海日。追者不及。投弓矢。建國樂浪。由此始。黃裙赤袴。烏

皮靴金花高帽垂袖紫。爲君翩翩舞不止。大國勿笑小國衰。襜褕傳來漢時製。

### 枯魚過河泣

枯魚過河勿復泣。亦勿復悔。亦勿復寄書。前有網畢。後有網罟。下有網罟。上有網罟。大魚吞膾。目爲明珠。小魚啖沙。曲鐵生須。出不得與樂。入不得與居。法令如繭絲。安能伯叔兄弟長相呼。

### 來日當遠犇行

來日當遠犇。囑咐兒三兩言。兒生不辰。逢此大艱。今當犇命逃。懼兒不獲全。爲兒作布袋。緊着兒身邊。中有菜蕪大豆牛肩。兒渴食菜蕪。兒飢噉豆及牛肩。慎無啼哭漣漣。哭於中野。阿母不得爲兒憐。囑咐未及終。淚出如流泉。倉皇入山口。賊勢如風煙。烏鳥一分飛。渺若天與淵。三覓終不得。痛哭大河邊。昨日囑咐兒言。舍置勿重宣。

### 夜黃

河中綠頭鴨。百雌共一雄。一男娶五女。迫窄不相容。

### 估客樂

歡爲千里別。妾止一里送。寸心長江水。千里與郎共。

### 長樂佳

紅綠鴛鴦絲。頭在中央接。不與儂同心。何用親手結。

諸陵哭

南陵哭。北陵續。紅燈滅。磷火綠。爲語長陵且勿哭。建文無陵亦無木。

黃囊

黃囊黃囊。天降不祥。前言天啓。後言福王。歷數有定。後及滅亡。鬼神幽譎。不可測。沅洲又出五尺石。

將軍起

哀揚閣部不能制左師也。

將軍起。賊破襄矣。將軍急起。將軍不起。奈爾何。報言丞相。老夫有罪。丞相慎勿生怒。嗔國家承平。視壯士如牛毛。輕一日有事。誰能萬死一生。供他人驅。如牛毛。輕丞相自愛千金軀。臣守臣職。不敢踰。

兒語

摸魚摸蝦。蝦有利。刀魚有牙。不如袖手早還家。

攙郎攙郎。郎跌無妨。郎真跌倒。誰肯攙郎。

鷄鷹搏雞。雞有母護。離親出門。心寒行路。

食魚去乙。食李去核。治國去賊。

禽言

阿公阿婆。阿公渡河。淪死阿公。氣死阿婆。即脫却破袴也。

姑惡姑惡。爲君作婦。不見姑喜。但見姑怒。



蟲言

推車客脚應斷。既解推郎去。何不推郎轉。  
曹婆婆同貨。合本爾賣胭脂。我賣胡粉。

九夏

始皇濊羣雄。晏然天下清。收取六國珍。貯之咸陽城。鑄金人十二。誇胡示銷兵。奢淫棄聖道。王業無足稱。虛想神人至。跨海接蓬瀛。魯連且東蹈。何況安期生。鸞棲必瑤樹。安得求一安。鳳食必琅玕。安得飽一餐。所以大聖賢。在世多飢寒。聖賢且如此。無爲空長嘆。

天狐被九尾。豐毛炳霜雪。夜半戴鬪髀。深山拜明月。化爲美婦人。丹唇渥如血。少年爲蠱惑。終身不得決。援劍欲斬之。飛光已電滅。邪士能害正。藏身亦何捷。

李廣射石虎。石虎飲金鏃。錢鏐射江湖。江湖爲退縮。人心致精誠。鬼神猶懼伏。西風掃林柯。桂華落如粟。弦弧信在手。何畏天狼毒。

狡狴出西城。倉尾多威儀。顧盼一憑陵。百獸爲之靡。猛虎且乞憐。安問狐與狸。一入樊籠中。猛氣何所施。狼狽處崇柯。顛危不自知。崇柯有時折。去之亦已遲。鴛馬戀棧豆。臨事多狐疑。介石不終日。勇退在及時。嶢然雲間鶴。千秋長不鏹。

孤鴻飛天首。冥冥若有無。楚人以爲乙。越人以爲鳧。睇視未得真。辨論徒區區。萬物起毫端。能令智者愚。

所以赤水上。可以困離朱。

佩帶雙金鑲帽上大東珠。窄袖回鶻裝。輕便隨轉舒。招呼千里至。行坐百夫趨。吳娃手如玉。跪進黃羊酥。節使仰鼻息。何論鄙薄軀。借問此爲誰。乃是侯家奴。文皇開北都。表裏河山固。關口如犄角。飛鳥不敢度。黃旗與紫蓋。鬱鬱環相顧。中葉何遽衰。將爲文字誤。當其立國初。嗜殺亦何故。朔風利如刀。先刮長陵樹。

水後寄城中故人

老翁夜呼婦。欲語未開口。迸淚落如珠。血痕漬襟袖。飢餓迫就死。破壁一何有。惟此膝下子。尙可易升斗。念昔生兒時。四鄰致鷄酒。懸弧射四方。正始寧敢苟。生長雖貧家。未嘗離左右。凶年事齟齬。骨肉難聚首。今忽棄之去。心痛如割割。答辱知不免。翻更執兒手。不久當贖歸。且暫忍恥垢。老婦默低頭。但聞吞聲久。  
不堪本讀。

怪樹

海中有怪樹。不傳樹何名。樹根蟠九地。樹梢撐兩輪。苞英歷幾劫。開花象赤城。一枝當曠日。燭燄瑩光晶。一枝照海水。蛟蜃潛其形。一枝向中國。國人疑海噉。香氣尤迅烈。椒桂謝不能。草木盡萎黃。爲觸其芳辛。伯禹聞此樹。開山會百神。穆王聞此樹。翠龍來東征。嬴皇聞此樹。跨海駕長鯨。將界以尺繩。將斷以鋸斤。此樹如不知。柯葉日夜生。南海帝儻忽。往謂樹之靈。汝枝太訝杪。恐礙日月行。汝根太深結。恐截潮汐根。

汝形太醜。僂恐觸雷與霆。萬形未鏤削。破露元氣淳。圓則包九重。毋乃旁午根。胡不斂汝光。胡不藏汝精。此樹大解悟。再拜謝殷勤。縮花僅如豆。收葉才如針。減色入空寂。散香歸杳冥。回頭看此樹。若與衆草并。  
凡自負不

泛舟紅橋因至觀音閣

繡槳盪長波。春城千柳影。水靈三十六。捲簾落紅粉。佛閣絳仙宮。胭脂沉廢井。鬼唱念家山。桃花淚如綆。  
古音聲

火耗行

去年火耗增。今年火耗倍。縣令絕廉介。毋乃急公費。公費何所需。使我獨憔悴。唱傳大差來。官私各有備。官家尙未知。私家已爲累。吏役亦何急。窮民亦何戚。昨夜鄭家莊。親聞老翁泣。

送劉德柔入秦兼懷王抱荆彭海客

紫駟卸玉羈。故人來齊安。昂藏河朔氣。兩鬢蕭蕭寒。爲言三載別。岐路各漫漫。燕秦二千里。浮雲會江干。雪堂寂寞秋。傾杯暫盤桓。片言瀉黃河。隨風生波瀾。蛇虺橫江湖。噬螫太無端。湛盧不在握。徒手空長歎。明日東西別。征車不可攀。

河隴多大俠。中多我舊游。往與王仲宣。酣歌昆陽樓。抵掌天下士。傾心第一流。握指彭與馬。謂海客皆古烈士儔。十載結中懷。未得訪鄧州。君今復過此。驅馬魯山頭。倘見彭夫子。爲寫我心憂。二首沈確土極實。

長歌行

短歌聲已急。長歌聲正哀。疾風動河嶽。黃塵西北來。極目古塞垣。封狐正崔嵬。徒手欲搏之。獨立空徘徊。杞人憂天傾。爲算何愚哉。漆室女自歎。安知妾所懷。當門種桂樹。九載花不開。自抱芳菲質。霜風日夜催。盛年能幾何。凋謝玉容衰。故人遺寶劍。中夜吼如雷。鋒鏃未及試。龜鱗生綠苔。奈何絳灌輩。亦惡賈生才。

序數十年流離聚散事。遙寄蜀中趙安叔外舅。敏思表弟。並呈楊周子舅氏。

獻賊屠巴蜀。四姓出漢中。李宅竄信陽。楊費落江東。趙氏客未久。先自歸蠶叢。舅祖佐勤襄。撫蜀大有功。西山餘孽伏。掃滌諸魁雄。二舅早鄉薦。出宰古平鄉。漢亂蜀道阻。棄官來維揚。萍聚四五載。再起倅南康。惜哉未之官。中道遽淪亡。三舅萬里來。暫會東海旁。表弟載父櫬。母子相扶將。返蜀二十載。雲海中蒼茫。吾家與楊氏。江東長寄籍。西望劍門關。如天歸不得。墳墓邈河漢。棄爲狐兔窟。天西落風雨。哀號如有失。痛哭松楸遠。永爲參辰隔。舅家居相近。千護囑勿忽。悲涼一紙書。遙托西飛翼。

王微波

王微波。金陵名妓。桐城孫武公暉之。己卯七夕。大集羣妓。秦淮水閣。梨園子弟三班。駢演院本。名輩品藻花案。以微波爲第一。余澹心贈詩云。月中仙子花中王。第一姮娥第一香。微波繡之帆巾。不去手。後蔡香君以三千金買歸。香君爲廬州太守。張獻忠破廬。擄至營中。甚寵之。俄以事忤獻

忠。蒸其首以享羣賊。錫璜作詩記之。

人間無薛濤。衆女掩面走。秦淮王微波。名壓白門柳。脅襜榴花紅。繡字不去手。可憐鏡中面。血汗佐杯酒。


詠史  
徐市東入海。將訪青霞君。三千童男女。化爲海上雲。神仙定有無。金銀闕氤氳。祖龍如嬰兒。戲弄出塵氛。鴻鵠聲嗚咽。咳下氣悲辛。兩雄成敗異。不能忘婦人。我行邳徐間。悵然涕沾巾。楚漢事已矣。柔情感千春。

古意

莫攬匣中鏡。一照一覺老。背面偷啼紅。淚下滴青艸。妾淚長不止。青艸爲枯死。

入汴

驅馬汴城南。野田多黃粟。執轡路踟躕。馬行何躑躅。汴城高以長。齊趙環相屬。前日城中人。漂沒不可數。宮闕何嵯峨。言是周王府。白骨化成灰。黃金變成土。前人去漸遠。後人生兒女。生兒乘高車。生女嫁外家。往來五城門。車騎何奢華。珠絡繫馬項。金絲借馬鞭。羶鞮兜馬尾。璫璣作鞍韉。車中有美人。逸態何矍娟。織手裹玉釧。廣額貼花鈿。奴子六七人。被服麗且鮮。莫唾地上塵。黃土能笑人。



# 蜀雅卷六

費錫璜二

烏棲曲

城東烏飛日欲低。飛入吳王宮裏棲。吳王宮中夜方半。笑擁如花醉似泥。醉後烏啼君不覺。越兵已破城東角。

楊花曲

江南楊花三月飛。桃花已盡杏花稀。乍起乍落無定處。飛來飛去欲何依。紅樓少婦惜芳春。手綰長條憶故人。乳燕梁間初結壘。香車陌上欲生塵。此際思君未敢言。此時花飛益惘然。飄搖似妾長流落。輕薄逢君早棄捐。香起山爐情宛宛。風吹江水恨綿綿。芍藥欄邊停踏鞠。鴛鴦池上冷鞦韆。學舞腰肢徒自惜。含愁眉黛更誰憐。窻中蛛網千重繫。天外游絲百尺牽。烏鳥更更啼素月。杜鵑夜夜流紅血。方看絲葉細如烟。已有白花飛似雪。

乞巧辭

月烟微青樹烟紫。繡屏雲母凝秋水。誰家女兒隔屏立。瀟湘一曲人千里。年年乞巧拜雙星。袖羅雲翠因風起。不願織錦作迴文。但願嫁郎同生死。

鹽徒行

橫眉廣額何陸梁。居人畏避客人強。闖穿柵破鷄豕失。鹽徒夜過中市場。日持白梃夜刀鎗。邏卒往往遭殺傷。草深地幽龍蛇遁。海關江瀾日月荒。朝廷禁止有明令。何爲十百敢成行。卽憫饑餓死溝壑。積成瘡臂反大創。官府但習苟安計。此輩畜禍亦須防。戢而散之豈無術。徒薪遠慮非更張。不見高黃起鹽澤。旬日之間稱侯王。

昆陽行美葉令呂長在前輩

昆陽城郭忽無色。城門白晝狐狸出。野赤雲腥殺氣深。血肉膏原收不得。城西魯山賊之窟。夜出殺人晝伏匿。其初竊豕與牛羊。婦豎聞之猶避藏。自牽秦寇入昆陽。七十二處烟塵荒。所在皆化爲豺狼。大臣簡偶持戰守。黨議未平心腹傷。那少良策救爾輩。一言出口身受殃。縣中李好尤陸梁。屠戮不亞李與張。崇正己卯至癸未。七次蹂躪爲戰場。澧河以南莽荆棘。白骨捩捩如亂芒。道逢一人似舊識。欲語不出淚浪浪。爾家何在井枯竭。門前巨蒿如門長。今來縣令古召杜。告示四出招流亡。汝寧開封千里間。往往負未來。闌疆荒土插標入版籍。歌功大旗三丈黃。眼看阡陌有起色。黃雲直到謝家莊。牽犬不敢逐走兔。舉步愁踏麥與秧。東鄰晚約西鄰醉。笑指今年春酒香。

大鐵刀歌

關侯廟中大鐵刀。勒字百二十斤重。刀頭上有一鐵環。故老傳來歷唐宋。刀口縱鈍力頗鉅。一夫直當百



夫用自從將軍走麥城。棄置但作祠前奉。萬人血洗都山鐵。萬人。關侯所鑄。刀名。見劍錄。千年斑化辰州汞。風雨時聞

鬼泣聲。精靈猶抱荆襄痛。廟中老僧爲我言。少年數輩時手弄。當場賈勇誇莫比。心傷血嘔如泉迸。蘭楫

鎖殺不敢開。三載如山屹不動。勿謂此刀侯所持。殺人已比他刀衆。安得官府毀此刀。鑄作鑿犁雜畊種。

將進酒

白日如黃金。不肯借分陰。黑髮似春草。朝榮暮枯槁。長安浮塵不可逐。不若閒尋故人好。庭前黃葉晚來深。涼月紛紛白如掃。芙蓉羅袖鸚鵡觴。雙鬢進酒勸君嘗。德且不足貴。名又烏足誇。是堯非桀皆泥沙。千秋萬歲細如麻。李白劉伶稱達士。不對今宵堂上花。花時勸君君不醉。明朝掃地成殘霞。

少年行

十二學擊劍。十五早工文。二十業詩書。西謁武安君。敝裘長揖據上座。傾詞吐氣如浮雲。昨夜秦人出函谷。一騎橫當千人軍。九國逡巡不敢進。但從壁上觀塵氛。戰罷歸來血滿裙。吳姬緩舞勸微醺。自謂玉符當剖券。何愁銅柱表奇勛。空將勇敢名中外。腰間但得黃金帶。男兒三十當封侯。不然歸臥南山頭。

瑤瑟謠

瑤瑟凝霜難割曉。南山夜向秦雲倒。蕭郎白馬莽無蹤。碧蹄亂踏王孫草。錦幄攏瑜蟠鳳紅。壓酒歸來春夢中。翠鬢扶入橫波爛。眼語無聲匿笑工。快刀砍斷生龍子。吳江水赤要離死。

臙脂亂

戰血入土鮮不老。千年邊地生春草。夜露滴破眞珠紅。秋棉嬌點芙蓉小。明君穹帳曉吹笛。紅冰欲結朝霞濕。戎王擊鼓眼斜醉。一點墮花憐不得。自從馬踏騰脂山。三年玉塞無春色。以上二首。神似飛癩。

太清謠

海風吹天蕤藍色。太清靈境高無極。紅雲不到白河低。日光倒上融如炙。太清真人六銖衣。出入八紘一呼吸。九天俯視皆塵壤。鳳腥麟膩不可食。覆盆無朕青無邊。下界人稱是上仙。

朱自觀觀潮圖

紅綃幕海海燈紫。天妃醉跨蒼龍子。忽然倒出雲山來。歎作眞珠幾千里。黃山老儒詩腸瘦。兩眸的的奇光透。神魚撒浪餘青霞。安得偕汝乘古查。

穿珠燈老人歌

穿珠老人抱珠泣。春燈不貴當時物。五色蠟珠的燦光。細如組繡縝如織。老人當年推好手。一燈入市誇無有。百金爭購不易得。疊落青錢日取酒。自從突貴米與包。近來夾絲聲價高。眼前縱復工巧媚。觸手破碎苦不牢。少年愛新動忘故。指穿血出無人顧。世事反覆類如此。今年穿珠眼生霧。

奉贈梁藥亭前輩

昔讀梁公六瑩詩。常恨同時不相見。單車欲度大庾嶺。江城快識梁公面。豐準高顙疎髯白。聲若鐘鏞眼如電。路行萬里輿還賒。年垂八十身猶健。偉哉三家起南海。公與屈陳雄一代。屈力宏博陳冲希。公尤奇。

變窮諸態。真精貫注萬象羅。元氣淋漓百物駭。譬若伯禹鑄九鼎。摺據大荒無不載。十身八首原常物。世人  
不識詫爲怪。直堪鼎足立中原。詎止三分峙嶺外。此日屈陳已九京。正風正雅惟公在。錫璜江湖放浪  
夫。少年亦讀等身書。萬不如人求入幕。百無所就悔爲儒。舊詩一卷等敝帚。每欲摧燒擲太虛。匣中忽作  
蛟龍吼。知已從天來聚首。公愛我詩不釋手。却怪同官未置口。白日江村常閉門。不然饑餓天涯走。十年  
懷刺紙生毛。那不聲名落人後。前輩愛才若饑渴。在于今日曾何有。見公雖晚未爲遲。一語品題足不朽。  
吁嗟屈公不可作。千古神交付冥漠。讀公詩罷送公歸。天地萬里搏羊角。

趙忠毅公南星鐵如意歌

拗鐵塗銀銀線走。百形蟠結蟲書紐。下錯名字署南星。上溯天文懸北斗。繞指難柔烈士心。強項肯俯英  
豪首。芝盤輪困龍頸迴。三尺方廉剛過肘。古人造器必鑄銘。大賢細事亦不苟。豈但出入衣領間。社鼠城  
狐恨未培。東林點將首公名。把此疑聞怒聲吼。戈鋌銷盡烟塵昏。獨炳乾坤垂不朽。邇來八十六年間。不  
知淪落幾人手。塵尾熏爐散何處。前輩風流遺未久。種紙老人開歌筵。滿堂祝客多耆叟。鳩茲杭子偏強  
士。願持此物爲翁壽。倒提壯氣傾座賓。醉舞寒光射杯酒。秦淮翠浪蕩雷電。鍾阜斜暉閃蝌蚪。犀鏤竹節  
不足珍。白角黃金俱在後。往時棄置久塵埃。卽今什襲勝瓊玖。

隴西公子行

贈楊申佩表兄

隴西公子巴川客。天產英奇妙標格。名成江左二十年。鳳皇未奮雲霓翮。相逢授我太元文。三蒼奇字驚

人魄大雅遺聲久闕然。讀此如聞弄古瑟。我方風塵困頓餘。忽覺涼飈生肘掖。長安西去道路賒。五陵年少爭豪華。王孫陌上黃金彈。倡婦門前白鼻驕。公子才技尤殊絕。此行正看長安花。擊刺跳丸戲角觥。妙舞拍彈揮琵琶。白馬青絲花裏濕。銀環烏帽醉中斜。風流便狎誰不見。道旁嘖嘖皆稱羨。南街擲果潘安仁。西園好客曹子建。男兒意氣若黃河。子建安仁烏足多。不見古來劉越石。壯懷終夜枕干戈。

王文安公草書歌

藁書誰人號第一。孟津尙書才傑出。尙書早年得盛名。蔣黃董米無顏色。千載重生王右軍。閣中名字九重聞。順治初年親召見。中官虎賁何紛紛。琉璃研匣豐狐注。尙書受詔開練素。聚神凝氣始落筆。西江之水來奔赴。驚若頑蛇入秋草。猶若長風吹海霧。亂若榮陽紛刀兵。凝若倒薤垂清露。枯藤墜石宛轉來。錯落銀鈎不知數。左側右側飛橫斜。天人吹雨散天花。太白狂歌大娘舞。醉倒仙姝萼綠華。翩儂倚曳傾相向。尙書用筆非一狀。泰山七十二重峯。天台四萬八千丈。來時萬馬向雲中。書罷孤鴻歸海上。獸錦貂裘拜賜歸。道旁觀者生光輝。從此聲名益烜赫。高麗使者求真蹟。君家此卷何年書。丙戌之歲六月初。用筆頗比他本健。同時觀者王與胡。聞帖摹勒舛真態。此作不失古人模。嗚呼尙書之名天下知。傷心誰見老兵詩。文采久爲世所貴。不逢識者兒女嗤。卽今開卷氣生動。何況當年落筆時。

# 蜀雅卷七

費錫璜 三

滄海

滄海難涓滴。黃金易鬼神。馬飢偏戀主。鷹飽不依人。雲別東山暮。花歸西苑春。朝來殘霧淨。如驗物華新。

關山月

獨有關山月。羈人望不同。年年隔隴外。夜夜入閨中。無雲常似晦。不暈亦生風。徒令紅顏損。何當紫塞通。

入房山縣

路入漸幽邃。草深夾岸迴。塢村僧買酒。山縣馬馱煤。石井深難汲。巖花凍不開。此行尋買墓。非爲訪君來。  
三句過其地者始知。

樓觀滄海日

樓出寒星上。牕臨霽海東。潮聲扶日起。殘夜入樓中。銜燭神龍紫。鎔金大冶紅。因悲塵市客。猶隔五更風。  
三四新警。

重別甘涵齋司馬

昔日送君處。春風吹柳花。幾年傾百萬。何地買烟霞。今日別君處。秋江生荻牙。勿嫌沽酒薄。雨雪滿天涯。

板子磯看花

江水樽前綠。桃花戰後紅。王敦聲犯闕。溫嶠泣臨戎。波冷羣鷗聚。山青萬馬空。舟人催不去。貪問釣魚翁。

臨淮

四鎮分屯日。臨淮舊有名。千秋龍種地。十里鳳陽城。草綠彈箏浦。雲寒牧馬營。婦人歌古調。半是楚遺聲。

贈嚴子

欲就巖邊話。閑中負酒過。梅花君自種。春草意如何。卷幔青山見。梳頭白髮多。已忘掛瓢累。時詠采芝歌。

詠帆

平湖杳無際。孤帆去去閑。遠依青草岸。斜映夕陽山。烟裏看疑沒。天涯望不還。乘槎有仙侶。邈矣未能攀。

同宋豫菴先生入西訪天下大師墓。因遍游隆恩善感寶珠諸名刹。

石塔青天闕。金堂靜日閑。綠濃經雨樹。翠重欲晴山。雲暖龍藏骨。花深虎守關。老僧諳舊事。指點亂巖間。

扶溝曉發

今夜扶溝縣。五更風色涼。溪橋沙似雪。村店月如霜。人影追前騎。鈴聲壓後行。蘿衣山鬼立。遠樹正蒼茫。

獵

海色風吹斷。秋聲葉帶歸。日從鷹背落。塵拂馬頭飛。草淨狐難伏。原空兔不肥。前山未深入。更合一重圍。

小塘

小塘不知滿。塘口隘虛沙。時有西溪水。流來北港花。波晴立閑鷺。草暖聚鳴蛙。自可通江海。將浮天漢槎。  
清明

一百五日節。陰花醉柳春。二十四橋夜。吹簫玩月人。粥錫風似舊。桑柘火從新。無食西鄰叟。蕭然岸葛巾。  
送閔山長入都

江浦柳堪折。故人初入燕。春風衣上軟。寒日馬頭圓。雨合青林色。晴分綠嶂烟。不忘塵外侶。應指海雲邊。  
觀海

萬國周靈海。八紘開混茫。蒸雲來十岳。飛雨過三桑。蜃吐樓臺氣。鯨吞日月光。吾將浮一葉。上問古鴻荒。  
日出太平東。桃花射海紅。彩雲飛不住。霽色映成空。龍嘯天妃雨。魚吹少女風。回看落帆處。已在亂烟中。  
陰火煎神灑。陽精灌沃焦。地機互張翕。天道有盈消。白噴千堆雪。黃回萬里潮。勿愁東注溢。大化自然調。  
後觀海

昔登烏目頂。今陟白狼巔。鼇柱難支地。鯨波直到天。江聲思禹力。石勢走秦鞭。萬里仍爲客。憑高涕泗漣。  
文章沉大海。不願世人知。投水非秦璧。懷沙是楚辭。天風吹忽起。雲霧散何之。若化靈虬去。潛淵百媚姿。  
獨往不知處。投空向海濱。江窮東有日。山冷北無春。古塔能爲怪。昏燈欲化燐。松間逢老衲。疑是上皇人。  
古戰場

月冷戰場空。兵戈在眼中。寒沙埋箭鏃。春草哭英雄。聚嘯冤難白。成磷骨尙紅。誰憐寒食近。濕雨雜陰風。

由合肥歸自繁家岡至全椒

落日在山腰。經過百里遙。饑人甘半李。疲馬盼全椒。復嶺莽迴互。重關鏢寂寥。往來能幾日。早見亂紅飄。

野步

野步饒幽趣。田園與水涯。溪浮田字草。路放碗兒花。話舊雲俱散。論詩日易斜。人生老農圃。事業在桑麻。

俠客

長安樊仲子。槐里趙王孫。市馬過沙苑。馱蓐入塞門。破費因結客。學劍爲酬恩。一遇魯句踐。終身不復論。

初夏過高郵

燕乳花間屋。人登水上樓。柳能晴作雪。麥以夏爲秋。新笋甘於蔗。春醅釀似油。扁舟隨處泊。今夕在秦郵。

入涪川山店

午辭卓茂廟。廟在涪川  
有高墩晚入一村孤。山店寒懸兔。野船秋渡驢。橋危橫板折。龕破老僧枯。借問當爐婦。廚中

有火無。

村夜

村夜百機息。桑榆辨渺茫。犬聲一卷月。人語滿船霜。秋遠薔花靜。霄深橘葉香。幽懷無與晤。獨立咏滄浪。

塞下曲

青年隨戰伐。黑塔屢經過。校獵秋燒野。勤王夜渡河。雲昏關月少。風起塞塵多。獨有銘功石。至今猶不磨。



大漠陰霾積寒門日月偏鷹風橫掃地狼糞直薰天馬飲黃泥淖人吞毒草烟斷磚無甲乙只記馬兒年

南樓聞雁

昨過甘寧廟今登庾亮樓九江何處雁萬里一聲秋肅肅將安往哀哀如有求雲霄雖可到吾却慕沙鷗  
目病六七年不痊偶檢近詩見于吟歎者十數處慘然自傷

眼病何時愈燈前暗自傷無錢致苓朮有物據膏肓命在醫何益書成瞽不妨古來誰與友左史與文昌

蜀道難

金牛開九阪陳寶出三秦道絕惟通鳥橋危不度人陰巖春積雪虛壑夜疑神故國終難到題詩淚滿巾

朱仙鎮

寧南侯左良玉  
爲賊困於此

懸軍三十萬千里救孤城舉國無生氣沿河有哭聲朝廷方論法賊勢已難平勿道從來誤哥舒久擅名  
汴梁

河決如奔馬飛來灑大梁萬人同日死雙闕幾年荒桂殿鯨鯢入椒宮鴈鷺翔惟餘頭白父涕淚說周王

鄭縣

督師孫傳庭爲  
賊敗於此

沈賊縱橫日中原正苦兵喪師悲大帥謀國歎書生歲月春風度乾坤秋草平夜深城下過不覺壯心驚  
少年行

臂上角弓強腰間劍似霜舊從李都尉新拜漢中郎愛馬黃金埒調鷹白玉牀平原秋草淺射獵出長楊

江夜

夜景暢餘清。秋光如有情。三更江月起。一片海霞生。山澹入天色。潮歸帶雨聲。此中塵境隔。何處更蓬瀛。

送友人入山

淮南木葉飛。江上早鴻歸。之子去何適。深山行採薇。霜清蒲子履。雲濕薜蘿衣。薄暮不言返。林臯待夕暉。

送李東侯入蜀

蜀國八千里。青天上萬重。臨崖多古蹟。入峽盡奇峯。夏木懸黃狄。秋江走白龍。何當送遠日。野寺恰殘鐘。

婕妤怨

雙燕入宮牆。高栖瑤瑁梁。綺疏侵夜月。紈扇奪秋涼。鳳輦曾辭寵。鸞歌只自傷。昭陽方妬妾。不敢怨君王。

官河晚望

暢然懷野適。容與戀斜曛。遠樹微茫辨。長河曉夜聞。人歸喧渡口。鳥起亂沙文。遠望無終極。秋山橫暮雲。

古廟

斷石迷年月。陰房客過驚。井枯生毒氣。樹老聚羣精。白日無人入。黃昏有虎行。哀蟬將敗葉。故故作秋聲。

山中對月

開軒見山月。照此山上花。細數山花落。不知山月斜。悠然紫巖趣。澹若碧天霞。去去無勞問。東陵已種瓜。

又聽金陵雨。秋聲十二年。人歸萬里外。夢斷一燈前。塵世原雞肋。陰陽似馬鞭。遂初仍未賦。飄泊在江邊。

江月吟

倚杖青林暮。鳴琴綠嶼閒。美人遺珮去。仙妾弄珠還。風定一江月。雲收兩岸山。鄉心何處極。目斷秣陵關。

遲抱雪不至

夕烟杳無際。暫泊數江程。沙雁寒相喚。風燈夜獨明。離情渺河漢。鄉夢隔潮聲。欲賦懷人曲。春洲杜若生。

入鄧城僧寺

浦樹暝蒼蒼。征橈滯大梁。林臯人對雪。蘆荻雁棲霜。破帽尋僧寺。寒沙指戰場。坐愁殘臘盡。何日到南陽。

爲客

隨身磨鏡具。自給賃春錢。複壁藏張儉。悲歌和魯連。藥成將度世。書就有編年。爲弔襄陽叟。留詩漢水邊。

沙隄同呂舟汝晚步

斷岸千層剝。隄分一帶沙。雁行排作印。麀跡聚成花。日射星光碎。風迴篆勢斜。誰憐孤艇客。飄泊向天涯。

雨後過六合諸山

石溜穿沙急。淙淙殊未平。桃花經宿雨。柳色近清明。雲碓喧三舍。風箏動一城。六朝餘舊跡。千載尙關情。

鐘聲

莫打秋鐘動。羈魂久未安。聲中羣鬼立。歇處萬峯寒。雨澈禪心淨。霜清客夢殘。何時最淒切。兩載滯長安。

興體送儲禮執汜雲

濯濯堤邊柳，青青陌上桑。征夫歌雨雪，之子去雲陽。寄興憑毛穎，忘憂得杜康。弟兄皆國彥，鴻雁美同行。

尋秋至江干小村

江北已蕭索，江南木葉稠。一江行幾日，十里不同秋。港曲逢僧問，舟輕得樹留。老懷隨處適，此外不須謀。

吾友

世少真名士，如君始是真。羊皆皮虎豹，驢亦橈麒麟。白眼輕時輩，狂言罵古人。吾將逃大陸，與汝共爲隣。

金山夏日

水逢石暴怒，石插水分流。水石相爭處，龍鼉不敢游。濤聲晴作雨，日氣夏疑秋。灩澦夔門口，何時坐小舟。

京口夜泊

淮海孤燈暝，關河一雁秋。霜催兩鬢改，潮裹衆星流。鐵甕熊罴守，金山神鬼愁。勿矜天下險，王濬下中流。

送蔡樞原先生移家華亭

月鏡臨樽上，風帆度雨開。移家去松浦，結屋近城隈。潮落江聲遠，雲昏海氣來。揚州舊居地，北望幾遲迴。

黃河

宛馬來殊域，河源出大荒。逶迤橫地軸，窈窕象天潢。西繞芙蓉闕，東迎日月光。輿圖從古載，水色至今黃。狐塞城秦帝，龍門鑿夏王。山開五指跡，勢曲九迴腸。蒲海連蔥嶺，潼關接大行。石碑陳聖德，玉策受神方。

一脈襟齊晉千年。衛漢唐天巡。沉璧馬國誓歷興亡。如帶盟空在分符事渺茫。隄防歌瓠子。漕輓奠金湯。祀典班侯服。沈埋薦雅章。焚舟思楚將。列艦想陳倉。霸氣銷金甲。兵威在土囊。篋篋留怨曲。絲竹和清商。香象橫流入。靈鼉暗穴藏。虛沙浮夜月。枯草壓秋霜。潮沒雲中樹。風迴霧裏橋。澄清知有待。飛渡恨無梁。

金陵秋夜

雁度南江木葉黃。美人羅袖拂輕霜。石頭城上西風起。玉笛聲中秋夜長。楚客蘼蕪悲帝子。班姬執扇怨君王。傷心獨有秦淮水。猶繞蕭梁舊粉墻。

久雨

社前社後雨催麥。村北村南水滿溪。綠篠娟娟難自直。斑鳩苦苦爲誰啼。孤帆北去愁沾濕。萬馬西征盡踏泥。野老不知天下計。朝來決溜灌花畦。全學工部

書懷

食肉封侯事已虛。生平二十學孫吳。買刀未試屠牛技。聚米能爲破敵圖。得配才人斲養卒。快騎大馬霍家奴。腐儒窮死原常分。恐負平生萬卷書。

寒燭凝花影乍偏。誰吹筆簞近江邊。登沈螻蠅三更雨。波冷芙蓉十里烟。煨芋殘年留作相。種花餘事可成仙。兒童爲謝安車去。替漫先生正熟眠。

西塞

邊聲雪後震蓬婆。大漠秋高鞞鼓多。白草白沙埋白骨。黃雲黃葉滿黃河。羌兒犀腕調酥酪。番女花鞵踞駱駝。互市不勞都護力。西戎新與漢家和。

元夕登三義閣

昨日人日還苦雪。今宵元宵方解冰。豐年穀賤家家酒。新歲人閑處處燈。士女喧成春一片。魚龍看遍閣三層。誰憐秉禮蘭閨婦。繡罷寒帷也未曾。

送趙敏畏表弟還蜀至蕪湖乃別

關山萬里絕烽烟。海角羈留更幾年。此地已無堪戀處。故鄉猶有未開田。空聞漢使求金馬。剩得遺民拜杜鵑。自種葛山千畝稻。男兒何必乞人憐。

暮春雨中偶書

津亭三月冷于秋。出塞還鄉志未酬。客淚不禁頻夜雨。壯懷無奈是春愁。新聲怕聽黃鸝調。舊事難忘白鳳舟。野老不知新事改。花時猶說少年游。

懷故鄉親友

西蜀東吳萬里思。青春白髮只移時。人分南浦王孫草。家滯東陵聖母祠。天外片帆來渺渺。城邊雙鳥去遲遲。邇來錦里鄉書斷。淚灑長江只自悲。

黃州覽古和王方若

樊城夏口鬱蒼茫。烟樹離離隱武昌。江上靈濤飛白馬。墓前妖梓化紅羊。傷春杜宇啼亡國。映血桃花開戰場。何處風光不堪弔。山河滿目酒盈觴。

銅鼓聲催戰伐頻。女王故跡已成塵。烏飛夜月思名將。蝶化春衣痛美人。斷雨荒汀迷夏隩。斜陽故壘記春申。涉江歌罷芙蓉死。芳草於今不復新。

萬嶺千峯擁大崎。孤城殘堞晚笳悲。青山白骨埋紅粉。碧草黃花怨赤眉。寒月偏于官署照。春風莫近女墻吹。栖烏未定驚三匝。夜夜哀鳴知爲誰。

直北雄關鎖虎頭。東西形勝扼江流。愁聞弱國分南戒。忍見強藩據上游。王謝未銷宣武耻。張韓難復靖康仇。江干到處生春草。閱盡興亡是白鷗。

貪看水鳥戲蒹葭。獨坐山城到日斜。羣盜何心亂江漢。諸公無策靖風沙。秋魂燈火刀頭血。春女胭脂鏡裏花。惆悵千秋衫袖濕。非關月夜聽琵琶。

春江雜述 辛未春日。濟江至長干省父作。

岷山山勢接崑崙。東向荆揚北向秦。白帝黃陵虛有跡。玉書金簡實稱神。海風吹冷堯時月。江水流殘夏后春。天下已平羣盜散。管寧猶是未歸人。

揚州重鎮古城池。南郭清江碧柳垂。桀黠將軍分闕日。倉皇宰相出師時。牧兒還覓宮人草。歸燕難尋玉蘂枝。村舍寄居三十載。乾坤飄泊更何之。

大梁城東

大梁東去陳留縣。枳刺藤花十里春。馬踏還生原上草。風吹不盡道邊塵。侯嬴老作監門客。阮籍窮爲失路人。却怪古來天下士。卑官薄俸亦羈身。

昆陽

平林新市屢兵戈。四十年來事若何。日落悲風餘草木。塵飛戰氣滿山河。中原盜賊皆銅馬。闕外將軍少伏波。回首蒼涼更誰是。汝墳橋上暮雲多。李誠居此最久。

送楊葛山舅氏之官嘉峪關

旅食三年猶未歸。又披繡甲赴戎機。班超謀略留張掖。皇甫勛名著武威。隴上射鵰弓晚勁。城邊牧馬草春肥。鄉關回首知何處。一片寒雲天外飛。秦帝長城沙漠間。衝寒不惜鬢毛斑。邊霜甲上生銀磧。漢月刀頭映寶環。保障難憑金峭隘。功名全在玉門關。故園書信經年斷。誰望春來有雁還。

山家

石谷烟深十里松。柴門斜對兩三峰。春塘蠶月分蝌斗。晴圃牛欄聚蜜蜂。盡日經函依竹曝。誰家藥臼隔雲春。夜來疎雨花狼籍。小徑泥融有鹿踪。



戲藥穿枝故故斜。文章五色未須誇。香中昨夜知何國。夢裏前身是落花。輕似柳綿渾不定。飄如燕子更無家。芳叢別愛東隣好。又趁微風過水涯。

野田怡全堂讀史雜詩

大父辭官歸故廬。但遺清白更無餘。盧家五世專經業。班氏三人續史書。適野自尋巢子菜。當門仍種武侯蔬。舊鄉風景依然是。只少峨帽上碧虛。

老將

挽強超距舊雄圖。短褐長鑊一病夫。老去廉頗思用趙。歸來范蠡未忘吳。劍花夜雨生苔蘚。甲葉秋風繡鷓鴣。欲就青山謀一醉。蘄王墓畔酒堪沽。

泰山墩岳武穆廟

風塵潮海屯兵地。熊虎中原血戰年。斷碣傳來鎮撫蹟。古墩掘出大觀錢。甲戌墩中掘出錢數斗皆有宋年號山河不贖班師恨。草木猶知具獄冤。即使燕雲收復盡。兩宮頭已白烽烟。別立新

黃湓阻雨

白鳥低飛樹影搖。春愁如病酒難銷。雨聲寒入何朝寺。殺氣收爲半夜潮。世事聽來成往劫。驚風定後拔新蕉。憑君莫指黃巢壘。今日孤舟夢六朝。

吾廬

吾廬僻遠多奇跡。跨馬東西路不遙。膜臘荒祠錢武肅。乾坤孤塚魏張遼。未妨祕器通幽邃。豈有精靈揭夜潮。已謝儒冠拚棄置。却將短褐混漁樵。

暮春雨中偶書

疎籬微霽喚班鳩。古寺人稀獨上樓。兩月不舒雲外眼。一春都在雨中愁。蛟螭有意翻雲窟。虎豹無心踞石頭。誰道東南天塹險。長江猶在水空流。

軍中

黃河月皎受降城。幕府春深細柳營。驪駟旗中惟署姓。麒麟閣上不書名。塞垣草綠牛羊散。朔漠風清禾黍平。勿道廟謨資白面。古來大將半儒生。爲讀書人吐氣。

轅門落日淨氛埃。越甲燕函上國材。碧海濤翻金鼓動。黃河雲捲繡旗開。文螺浮白千人醉。畫角吹青萬馬來。近日漁陽無獵火。野花紅遍李陵臺。聲作金石。

# 蜀雅卷八

費錫璜 四

相逢

岐路不相識。一言傾寸心。贈君腰下劍。不在直千金。

南溪

昨夜瓜蔓水。南溪可放槎。雨中燈一點。有艇宿蘆花。

秋江

玉人吹玉笛。一片秋風起。涼夜月微明。芙蓉落江水。

江寺

江水何年綠。江雲自古閑。一聲花裏磬。無數夕陽山。

變歌

東門楊柳枝。早晚遭攀折。今日是相逢。明日是離別。

逢王孫

野寺打昏鐘。相逢路不同。一驢何處去。落葉四山風。

西溪

西溪帶長林。十里行踪絕。時有夜深人。沙中渡寒月。

採蓮曲爲汪聖郊賦

浦上生綠烟。波底蕩紅雲。勿搖雙桂楫。猶恐濕湘裙。  
相約採蓮來。艇子打兩槳。驚起白鷺鷥。飛入橫塘港。  
亦作採蓮人。乘舟向若耶。誰知盪槳意。不是爲蓮花。  
五月採蓮花。六月打蓮葉。七月摘蓮子。八月斷藕節。

楊花

高低渾似雪。上下不因風。借問昭陽燕。珠簾隔幾重。

龍兒河

沙響船頭澀。秋潦落三寸。前灣水淺深。相逢兩相問。

書室

田家桑柘林。春盡綠成陰。亭午讀書歇。時開春鳥音。

邊辭

四月春風不度遼。邊城氣候迥蕭條。黃金臺上花都落。長白山頭雪未消。

十載從軍戍朔方。不知身死在他鄉。秋風易殺原頭草。春酒難消鬢上霜。  
百重犀甲攢成錦。萬隊龍旗動似雲。塞外不知天子貴。邊人但說大將軍。  
渾河流水夜漫漫。燕將長城漢將壇。朔邊明月無冬夏。長照沙場白日寒。  
狹袂輕衣別樣妝。美人酌酒勸君嘗。琵琶一樣清商曲。彈到涼州便斷腸。  
旌旗慘淡照黃雲。細柳營空背夕曛。誰使射鵰人入塞。朝廷自殺李將軍。  
閼氏大獵向蕭關。侍女雙雙白玉環。萬騎飛來不敢度。一齊下馬拜天山。  
猿臂將軍馬上飛。聲名百戰震金微。少卿空負良家子。一沒賢王竟不歸。  
馬上鏡歌不可聽。漢家亭障總凋零。邊城自古無春草。惟有明妃墓獨青。  
黑水流冰夏日寒。白沙如雪晝漫漫。長平老去嬖姚死。銅鼓無人出賀蘭。  
年年鐵騎護邊州。久戍邊人半白頭。但使天朝開絕幕。自甘身老不封侯。

春閨

花謝鶯啼春又歸。玉人睡起不勝衣。前身應是雙栖燕。夢繞盧家梁上飛。

宮辭

禁城南畔御溝斜。樹色瞳瞳映曉霞。珠箔昨開疑是雪。春風吹散白楊花。

江上竹枝辭

隣舟誰唱采蓮聲。秋月淒淒秋露清。一曲未終天已白。不知潮水夜來生。  
銅雀妓

茱萸寶匣貯分香。曾是當年被寵光。壘壘南墳七十二。知從何處哭君王。  
揚州雜詩

朱樓綠樹影參差。芳草沿城水滿池。盡日城南無客到。落花紅滿范公祠。  
居庸關

歲遣良家向北庭。紅顏到此涕交零。回頭勒馬看春色。一出居庸柳不青。  
春夜曲

繡屏雲淨夜堂清。黃月穿花影未明。按罷新翻羅噴曲。別移紅燭教調笙。  
少將

小侯白面領元戎。赤氣橫生玉帳中。十萬旌旗楊柳色。枝枝繡虎颭春風。  
偶成

小雨無妨燕子飛。濕餘野竹蕩斜暉。西塘寒食蘼蕪路。認得兒家白板扉。

# 蜀雅卷九

雷瑛

瑛字笏山。井研人。順治辛卯舉人。官吳縣令。

崆峒巖

爲愛秋痕落碧苔。輕車乘輿載新醅。芙蓉倚漢清如削。薜荔依門翠半開。石斂雲房遠日月。天成洞宇自樓臺。篝燈共向幽巖宿。月下聲寒有鶴來。烹鍊而出。却自嬌逸。

邱履程

履程字鴻漸。號一菴。成都人。順治辛卯科舉人。

寄費二參軍此度嘉州

刀鏃初出骨空存。又曳輕裾上將門。才略自能追越石。旌旗誰復似桓溫。芙蓉麗發新文藻。薜荔衣香舊夢魂。志士何妨聊袖手。空山歸臥聽啼猿。

簡上

上字謙居。號石潭。巴縣人。順治辛卯舉人。官至吏部郎。督學江南。遷廣西左江道。著有彙解四書。

八陳圖

連宵金鼓震。殷殷出河干。峽捲愁雲黑。天沉落日丹。雷霆司石壘。神鬼護烟灘。抱恨無須辨。遺孤在永安。

馮天培

天培字默佑。西充人。順治甲午解元。官福建漳平縣知縣。

春感

香車寶馬去悠悠。載酒尋花陌上遊。借問春光誰賦得。飄零王粲未登樓。

眼前語有風致。

羅爲廣

爲廣字西溪。南充人。順治甲午舉人。官浙江孝豐縣令。擢行人。卒。西溪官孝豐令。有德政。民爲立生祠。詩亦和平。無叫囂氣。

過合州

舟發天未晚。夢醒日初晴。雲繪遠山色。江流急雨聲。岸沙留虎跡。炊竈見荒城。在昔繁華地。如何僅有名。  
三四名句。

李璿

璿字宕山。號梅岑。渠縣人。順治甲午舉人。官鳳陽縣知縣。有片石齋集。梅岑有集句詩一卷。甚工。

歲暮感懷步二兄原韻

蜀山閩海思悠悠。暮角邊笳滿戍樓。泉石近知何處穩。風烟遙接故園愁。投身可得如張儉。洗耳還應似許由。誰念飄零荒瘴地。南冠千里獨羈囚。



聞笛

晚霽江城夜氣清。寂寥孤月對愁明。誰攜羌塞三更笛。吹作吳山十月聲。豈有梅花開更落。自驚楊柳折還生。天邊舊業歸何日。爲爾今宵夢不成。

春日旅懷

春風客思繞郵亭。厭見千門草色青。黃盼眉間空歲歲。白窺鏡裏幾星星。漢庭近詔寬三甲。蜀道何年鑿五丁。但說醉鄉饒樂事。羈心聊欲託沉冥。五六工甚

榕城雜咏

民力東南久驛騷。尙聞飛艦欲凌濤。將軍自許標銅柱。長吏誰曾過石壕。荔草夜呼朝市閉。海田春隔繚垣高。何當借箸籌方略。願罷乘風破浪艘。

別孫無燾

甓社棠陰晚未殘。相逢誰復問南冠。令君座上香三接。公子門前缺幾彈。久客未聞生馬角。累人何止愧豬肝。擬將千尺珠湖水。深比桃花一樣看。

過沔縣謁武侯廟

宗臣遺像千秋在。入廟愀然睹瘁躬。沔水長流心血碧。蜀山高鎖陣雲紅。呂伊伯仲真何忝。管樂才名漫許同。莫訝漢圖終割據。九原餘恨哭秋風。

劉沛先

沛先字棠溪。閬中人。順治甲午舉人。官至兵科掌印給事中。

湖上

湖水尙如昨。樓臺望已稀。可憐相識燕。猶向舊家飛。

金光祖

光祖號念峯。犍爲人。

不得家書

孤影空庭悵旅居。遙遙清漢倍踟蹰。三年寂寞金臺月。萬里浮沈蜀道書。殘笛不堪愁裏聽。顰眉祇向夢中舒。故園今夜應相憶。雁羽迢迢半載餘。

田金

金字子相。閬中人。

春獵曲

雙闕春烟曙。高於遠度城。羽林開輦道。豹尾映車旌。花路前禽起。平原驟馬鳴。君王思講武。不厭鼓鼙聲。

熊天祥

天祥字里未詳。從陶桓四川人。詩的中探入。

秋懷

雲山歷歷雁聲低。秋水潺潺日色西。往日繁華今不見。寒江徹夜老猿啼。

冉存異

存異字同人。南充人。

登增城龜峯

龜峯第一岑。異地獨登臨。髣髴方山勝。依稀果水深。人烟平雉堞。塔影壓江林。風景嘉如許。容無宓子音。

李奕拓

奕拓字麟武。遂寧人。諸生。寓居蘇州。詩有吳風。

生女

生女復何恨。愁時亦解歡。每攜花下坐。偶向月中看。學語聲猶澀。求人乳亦難。左公賦嬌女。三復倍辛酸。

淮上同吳西文步月

同爾耽良夜。臨流興轉清。人行官渡口。月照大河聲。漁屋連波動。邨烟著樹生。劇談身世外。誰耐聽支更。

入夔

一逕瞿塘過。雙崖灑瀨通。亂離夔子國。想像永安宮。人老干戈裏。烟稀邑井中。踟躕看白帝。躍馬意何雄。

張吾瑾

吾瑾字石仙。金堂人。順治乙未進士。官至行人。有鵲符齋集。石仙有鵲突泉和趙松雪詩云。常與江湖同晝夜。不隨春夏問榮枯。

山居

朝雲起山南。暮雲起山北。只有山中人。朝暮看山色。似古樂府。

陳隱雯

隱雯字杲亭。富順人。順治乙未進士。官廣東樂昌令。晚自號破愚子。破愚官樂昌。有循聲詩亦澹遠。似章蘇州。

舟行

晴川曲曲抱沙堤。岸柳依依遠近齊。山色欲開疎雨外。夕陽忽在亂峯西。舟前波浪河流駛。望裏烟嵐樹低。作客乘春何處往。故鄉曾否息征鞮。

張注慶

注慶字元長。號曲山。保寧人。順治乙未進士。官至廣東巡按御史。鄧孝威云。向子廣陵得晤曲江柴丈。極稱其澹懷雅誼。觀其階階一官。

知爲古人無疑。

濯足仙女潭同費此度作

濯足仙女潭。潭水清且潔。輕條出其間。後先悉成列。長此沍塞流。芳餌非所悅。猿啼萬山雲。漁歌兩岸雪。我友醉濁醪。爲探馮夷穴。載詠吳隱詩。不見心如結。

襄字子贊中江人順治乙未進士

書屈陶合刻後

變風以後數靈均彭澤天然見性真對酒不忘書甲子懷沙長自嘆庚寅滋蘭九畹心偏遠采菊東籬句有神五柳三閭異醒醉何妨千載德爲鄰



# 蜀雅卷十

李珣

珣字公執。號鶴汀。渠縣人。順治丁酉舉人。官寧德縣知縣。有說劍齋集。鄧孝威選公執詩只兩首。今從云。巴渝之俗。其人好歌。李生偶爾習氣不除。借此發其塊壘。使巴童蕩漿。費女持節而唱之。亦竹枝欵乃之餘韻耳。讀此可以想其襟懷。

古意

桂生泰山阿。朝露沾其英。馨香遍林莽。高潔可人情。自憐山下池。形影與之迎。深秋沐素月。蕩漾滌塵氛。願爲女蘿花。托根附爾身。常使松栢風。爲我颼颼鳴。峨峨趙城門。直接邯鄲里。里中有少年。意氣爲人死。衆人徒嗷嗷。寧解丈夫志。丈夫常苦悲。感慨日以至。何當騎大鵬。飛過滄溟水。俯謝鸞鳩羣。蠅聲徒細細。雙筆

天涯路

天涯路。年去年來無着處。冉冉斜陽浸綠波。朦朧細雨迷春樹。不知底事係心頭。撥盡鶻絃留不住。一曲離歌唱未終。鳴鞭亂踏紅塵去。去馬匆匆不少留。花邊亭館柳邊樓。水遠山長望不到。十二珠簾懶上鉤。唯有垂陽知別苦。婆婆亂拂去人頭。

東垣道中

君不見遊子心易悲。天寒歲暮霜風吹。溱沔凍合冰如鐵。僵殺侵晨馬上兒。年年臘月漁陽道。十里九里無青草。枯桑海水亦有知。明鏡秋霜那不老。竭來浮食京華春。空教塵土撲烏巾。誰憐盡日高樓上。手捲珠簾望遠人。

沙縣雜詩

屈指河東發。應過函谷關。百年寒食節。萬里越江邊。老眼昏殘水。征途指亂山。青春期汝至。相對破愁顏。風雨沙村路。心悲此滯留。怕驚垂老眼。不上最高樓。客久唯親劍。書來數買舟。方言雖飽聽。觸緒但牽愁。聞官軍收漢中成都。

天險誰終踞。先聲已不支。傳聞收宋建。遂已殢姜維。王者師無戰。流人言可知。翻愁雲棧路。雨雪擔簷遲。已分歸無計。朝來涕淚新。誰傳今日信。吾是再生身。月冷瘡痍色。花殷鼓角春。安危爭撫虐。跋望轉傷神。全從工部脫胎。

登奎樓

樓在高郵城南紫上。先大夫牧郵重建。

城郭參差暮靄收。重來此地不勝愁。王孫前路誰青眼。父執于今半白頭。葉葉棠梨霜後赤。家家楊柳雨中秋。遺碑讀過腸隨折。蔓草寒煙迸淚流。

送王孝先入秦幕

江上相逢春草滿。橋邊送別暮禽鳴。黃雲隴樹千峰隔。落日邊山一劍行。漢時幾年猶置驛。秦關百里未



休兵丈夫還有蒼生志。爲看陳琳草檄文。

丁未下第後同潘遊擊新吾話舊感賦。

帝里黃塵輒敵裘。霜華暗逼鬢毛颯。也知侯印憎猿臂。可耐儒冠誤虎頭。抱璞幾年羞楚別。據鞍三歲哭吳鈞。何當挽起滄溟水。澆盡男兒萬古愁。

三山雜感

珠簾繡柱城西路。父老猶誇未戰前。他日尉陀專璽綬。幾年楊僕擁樓船。春城晝閉飛飛燕。野水晴看跼跼鷺。只有無諸臺畔草。東風依舊綠編芊。似老杜詩將詩。

青絲珠絡散平蕪。二月春郊草上枯。宛馬自來甘苜蓿。魯人今復峙芟菹。空村夜釀傭身值。廣陌晨飛趣市符。蒿目遺民成痛哭。五年剜肉給征輸。

寄周嘉受

渺渺予懷隔水涯。憶曾玉樹倚蒹葭。荀君坐處香三日。潘令行來果一車。屈指秋風摧蕙草。斷腸春信隔梅花。練裙憶得羊欣在。無語挑燈對綠紗。三四巧。驚港極贊之。

九日同恕庵寓西登高

客中時序只堪驚。此日欣逢九日晴。皂帽青鞵何處酒。紫萸黃菊故山情。江湖滿地歸難定。哀樂中年感易生。盡醉不須嗟世路。暮雲無盡是神京。

紅樹青山繞郭斜。連天秋水浸蒹葭。自拚却掃歸馮衍。誰爲欵冠嘲孟嘉。萬里有風遲白雁。一樽無恙就黃花。登臨且鬪身粗健。矯首江天息鼓笳。

題扇頭桃花

元都舊業未全空。幾樹依然綠間紅。恰是武陵溪口望。數聲啼鳥夕陽中。

題館壁哀前宮人之被俘者

景陽烽火竟天紅。馬上琵琶怯曉風。從此盧龍河上月。獨將淚眼盼征鴻。臺城花柳望中迷。夢到陳宮事已非。今日笳吹明日淚。何人爲贖蔡姬歸。

趙弼

弼字子匡。號芙溪。彭縣人。順治丁酉舉人。有半山草堂集。子匡詩逸情雲上。有蓬蓬遠春之意。

出棧

關道衝烟出。迢迢問帝鄉。山深晴亦冷。花密雨皆香。茅店春宜坐。鈴聲夜可傷。欲尋蕭相迹。騎馬獨迴翔。

是棧道中語。

李如泌

如泌字鄴臣。號廉水。井研人。順治丁酉科舉人。有胎仙集。鄴臣詩如百戰健兒。三鼓而氣不竭。

鄉夢

湖北湖南正好秋。故園何處夢悠悠。瞿塘急水流難住。巫峽愁雲結不收。萬里魚書無計得。千羣犀甲幾時休。願看四壁皆沉寂。倘遇仙人葉作舟。與少陵步月看雲。同一慘感。

李蕃

蕃字錫徵。通江人。順治丁酉舉人。官山東黃縣知縣。有雪鴻堂集。

杜牧木蘭有夢裏曾經畫蛾眉之句。時人以爲佳句。余謂李陵以軍中有女子氣。則戰不力。木蘭有畫蛾眉夢。烏能十二年乎。非木蘭本色矣。因爲之咏。

攬轡提戈坐錦鞵。長途無復看花鈿。倘教有夢眉重畫。火伴先驚十二年。

趙宏覽

宏覽字僧照。劍州人。順治戊戌進士。官江南虹縣知縣。

楚王宮

四望荒烟裏。蒼茫野色齊。山猶開躑躅。春自發棠梨。亂石江雲捲。荒藤夜雨迷。一從亡國後。空有鷓鴣啼。五六荒涼。

巴東縣

大江橫楚塞。蜀客問歸程。堦火林間列。人烟亂後生。有巖皆置屋。無地可成城。疏鑿真何意。巴東自古名。

晚歸

雨後衝寒出。山行意轉濃。林藏雲寺火。風渡雪溪鐘。谷靜窺猿飲。村喧警虎踪。此時歸路暝。烟樹鬱重重。

陳璠

璠字虹也。四川人。

從順寧府志採入。未註明何縣人。

初夏種竹

慶雲張永日。澍澤老青筠。點綴心忘苦。遷移日已辛。名園增好友。列卉速嘉賓。幹直蛻爲貫。根盤石作筵。佇看殮鳳粒。原是化龍身。羨茗烟籠夕。披襟露浥晨。蕭蕭增媚媚。謾謾倍精神。削杖嗤貽叟。持竿憶虎臣。不知淇水遠。巧結渭川鄰。細葉鋒疑劍。微痕淚似鱗。徜徉三徑古。笑傲七賢真。勁節同高蹈。孤標迴絕塵。風搖驚倦客。月襲舞騷人。對此寧甘瘦。從今不效顰。吹之詞一律。沃以酒千巡。祗畏此君少。何辭問主頻。伶倫堪取截。雅奏足娛貧。

蜀雅卷十一

李仙根

仙根字子靜。號南津。遂寧人。實之子。順治丁丑進士第二。授翰林院編修。歷官至戶部侍郎。有安

南使事紀要。

康熙六年。安南黎維禧。與高平莫元青構怨。殺。維禧奪高平。元青奔破朝。破朝。瀘界也。廣西總兵王會奏聞。南津以內祕書院侍讀加一品服。充安南正使。奉勅諭黎氏。移元青於廣西。

南甯府。且致書維禧。責安南臣工謾國十節。安南君臣遂帖然奉詔。大發凍然。詩亦典雅。惜所見甚夥。鈕玉樵。鮑騰。少隨其父如石先生官於吳。遇國變。不能歸蜀。傲居錦帆涇側。館於鄉間柴氏。其子世俊。夢已試得

狀元。師得榜眼。以告子靜。子靜私自賀。因拆榜眼二字之中。合為根字。改今名。同籍應舉。辛丑傳臚。果第二。狀元則馬世俊也。柴本姓馬。名偶符耳。

季秋王公武約遊上方山

二十年前望落霞。如今重到似還家。半山紅日迎人出。一徑清烟傍馬斜。鴉勢遠盤孤塔影。漁歌長應轉

帆。獨偶然與會。因同調。欲覓幽閒更覺奢。

張祖詠

祖詠字又益。內江人。有枕江堂選刻詩鈔。

魏惟憲百名家小引。張子以詩鳴。儒寓巢湖。大江南北。名公

焉。得家學於尊甫翠玉先生。近始締交河朔。出所為詩。屬余論定。見其以英雄之氣。練儒雅之才。響中鳴

球。風生玉樹。幾幾乎視黃金白雪。牛鬼蛇神輩皆奴隸之矣。其推獎如此。今觀稿中率多應酬之作。未易低

昂。取有真氣者登之。或不沒其善。

感遇二首

貧賤驕人耳。黃金何足論。寧爲鴻鵠翔。肯逐鷦雀喧。六翮吾自有。且從霄漢翻。置身天地間。出門豈不寬。冠蓋當我前。自作浮雲觀。吾哀韓王孫。乃受漂母餐。

讀范增史傳同劉子庵年伯作

白帝已斃隆準公。安能劍舞困乃翁。玉玦不敵舞陰盾。黃金一行疑重瞳。君王許乞骸骨去。烏騅獨走烏江路。八千子弟無一人。七十老翁何足數。噫吁嘻。丈夫擇主不慎始。國破身亡亦徒耳。何如吾家報韓人。功成更從赤松子。

隔巷見

長安有女正青春。自矜十五未嫁人。豈是薛濤居北里。如何宋玉在東鄰。東鄰北里遙相及。紅裙翠袖風前立。時聞門裏墮釵聲。逢人便故攀幃入。相看游子笑相憐。柳絲花片總嫣然。只愁夜夜牆頭月。腸斷秦箏十二絃。長吉遺韻

欲宿彭澤縣不及

古邑臨江岫。相看是畫圖。一城山共水。半壁楚連吳。夢隔樓頭鼓。心依酒肆壚。此時彭澤令。還肯折腰無。三四咏彭澤·確·

送春二首

薊北春遲到。如何今亦歸。野花愁自落。梁燕看還飛。柳暗前途旆。塵迷故國衣。年年那作客。送盡此芳菲。

途中遇雪

雪風吹馬去遲遲。何處梅花勸酒卮。在我固宜潘岳鬢。於人何盡馬良眉。雲連玉宇炊烟淡。凍合瓊樓雁陣岐。歸去自憐裘已敝。寒江何處釣堪垂。

天中客蒲坂作

客中佳節獨淹留。敝葛朝來又換裘。虞舜山川雖在望。屈原風雨不堪愁。離家久厭辟兵繯。泛宅長隨鏡渡舟。無奈錦江歸路渺。黃河偏繞郡城流。

楚江月夜

誰道仙人去未回。鶴樓千載看崔嵬。楚王夢裏神爲賦。黃祖刀頭血是才。烟火萬家明月渡。笙歌兩岫碧雲開。征人極目思無限。擊碎銀壺酒百杯。

客衛源偕魏惟度出郭訪驪月上人和韻

鶴去軒空寂鼓鐘。相看郭外數青峯。客攜風到花迎屐。僧臥雲深戶不封。蒼菌未舒沙路暗。綠楊已拽晚烟濃。北來傾蓋君知己。日傍延津匣底鋒。

呂柳文

文字長在號旂山。遂寧人。康熙癸卯科舉人。葉縣知縣。

送施又黃還吳門

親老遊何處。長安羨爾歸。西風悲落葉。征馬戀斜暉。詞賦無今古。烟霞少是非。淵明三逕菊。留待護柴扉。

林明儁

明儁字位旗。鄧都人。有澹遠堂。巴子園。梧桐居等集。漁洋蜀道驛程記。初十日晨。大霧。林生來。以其

王子所得士也。位府學宮經史。甲申獻寇陷蜀。從關部王應熊討賊。籌畫多中。後以病假歸。隱居著述。

燕

隨風燕子正翩翩。秋去春來不多年。茆店啄殘紅杏雨。畫橋翦破綠楊煙。幾聲絮語傳粧閣。數點芹泥澆繡鞦。最有惱人愁絕處。飛花如雪鬧鞦韆。盡日差池傍綺寮。天涯無處不魂消。柳塘春水迷三逕。花塢斜楊語六朝。南國營巢空碌碌。御河歸夢尚迢迢。憐紅惜紫情何限。腸斷春風是灞橋。

張象樞

象樞字四水。安岳人。康熙癸卯舉人。有雪浪齋集。四水為費仲若所賞識。然奇氣獨出。能於費氏外。別立一幟。

展墓不得

閒來無事便登樓。回首家山處處愁。久去似成三島絕。難歸卻近十年流。親朋戰老城池廢。風雨寒深草木秋。多病自甘為棄物。只期洒淚展松楸。



張象狝

象狝字六飛。安岳人。康熙甲辰進士。官至膠州知州。有處和詩集。六飛早孤。慎忌日。致奠盡哀如初。喪。以孝聞。詩亦根柢至性。粹然

贈高汝止

沙草坐傾壺。江天野望孤。低烟圍白水。遠樹入青蕪。流水鄉心切。浮雲世事徂。同君當此日。相對兩踟蹰。

遊瓦屋中天池

帶雨入荒寺。松濤一殿流。枯燈寒古佛。殘葉落危樓。法界猶灰劫。吾生真浪浮。烟雲能護枕。且夢辟支遊。

張象華

象華字五華。安岳人。

溪上

不為儒冠誤。何辜泉石深。賤貧甘寂寞。忠孝付沉吟。薄俗殊南北。幽懷自古今。獨行溪上晚。霜月靜疎林。

向上達

上達字恬菴。犍爲人。

攬山訪何季長。何亦木水竹居。

歸鳥擇深木。高亭欲暝時。琴書吾道在。鷄黍故人期。蟲嚮露生草。蛙喧月到池。放談三日夜。終宴不爲疲。

冉德

德字公讓。廣元人。康熙丙午舉人。官至陝西西寧縣知縣。公讓鄉舉後。避吳逆徵聘。逃匿深箐中。賊劫其父。公讓奔救。臨以刃。弗去。賊義而

釋之。見通志。

望采石磯

綠樹丹崖俯石頭。龍爭虎鬪故磯留。謫仙已是騎鯨去。詞客空為乘鶴遊。欲薦蘋繁帆去疾。那堪蘆葦望中稠。天荒地老稱詩伯。不盡長江萬古流。

楊岱

岱字東子。彭縣人。康熙丙午舉人。有邨山詩集。魏准度云。余讀東子詩。氣力雄健。知為詞壇英俊。近董耕伯蔡方山從維揚來。道東子年十九。其器宇沉沉。

似有道者。侍乃翁研連先生。恂恂乎儒子。不特其詩之妙也。益嘆余暗中摸索。能因其詩知其人焉。

巫山高贈友人

巫山高。聚猛虎。白日食人肉。天摧地坼傾西土。碧草幽幽斷行客。山魃寂寂啼春雨。巫山高兮悲復悲。游人怨兮君莫知。君行真到萬峯裏。白石峻嶒光玉齒。峨眉峯下花如雲。駿馬蹴花城鴉起。

巫山

落日巫山峽。孤舟萬里風。石寒神女館。濤沒楚王宮。疊嶂飛青靄。高城上碧空。何年成蜀道。剝木往來通。

閩中

空有山川在。長存萬古名。野花頽岬發。枯骨斷巖平。人去啼雅亂。村荒牧馬鳴。何時罷征戰。重住錦官城。  
白帝城卽事

玉洞三巴雨。桃花萬壑春。楚雲歸峽暮。滯水入江新。柏柱祠神木。青峯化美人。古來夔子國。寂寞久歸秦。  
眞州留別友人入蜀

與爾天涯別。留沽興亦闌。退潮江雨澀。吹角夏雲寒。沙鳥飛何急。巖花落未殘。登樓無限意。只倚玉欄干。  
登黃陵廟

白日寒烟火。空庭山氣秋。黃牛歸更遠。杜宇怨無休。萬木雲中變。一江天外流。蒼蒼遙浦望。應有古人愁。  
大慈寺

久廢先朝榜。何人禮大慈。青苔荒石馬。昏月宿寒鷗。不見張贛詠。空憐孟昶碑。年年春草綠。芳躅與誰知。  
山棧

孤嶂阻青霄。千峯向寂寥。羣狼渡水怯。獨鶴下天遙。雷雨歸何處。仙人不可招。東南盡平野。蕃馬一何驕。  
閩中送友人公車

應是臺郎器。成名自不難。無家臨別苦。多病送君歡。津樹江亭暮。邊風馬上寒。青青辭驛路。相對倚闌干。  
贈似少

項羽祠

鼎峙非初願。空餘百勝威。纔看秦火滅。又聽楚歌悲。江漢無歸日。中原有盡時。霸圖今已矣。駿馬尙名騅。

三四悲壯。

棧中早秋

大火初流日。歸途到棧消。樹陰藏野店。日影射山城。寒雁知秋氣。巖前作雨聲。當時據蜀道。獨有臥龍名。

棧道

鳥道與天齊。盤雲萬壑低。層巒飛瀑下。空木亂猿啼。山勢危巴郡。邊聲隔隴西。可憐唐輦路。煙雨草萋萋。

送孫默還黃山

歸去成高隱。送君逢暮春。柴車臨驛路。兒女出風塵。野水斜通磴。孤猿啼向人。平生應有意。不止爲棲真。

黃陵廟

岩曉古廟到今垂。夏后乘輿駐蹕時。江過岷山萬里白。雲連湘曲九嶷卑。空潭日落馮夷出。古木春寒杜宇悲。斷壁祇留遺跡在。滿天殘雨濕靈旂。

夔州雜詩

三峽風高雷雨低。盤雲直上與天齊。楚王斷壁飛猿狖。巫女空臺嘯鸛鷀。楓葉隔江全障日。山花滿路半成泥。永安宮裏傷懷事。漠漠寒烟馬自嘶。

春來急水下峨眉。客路悠悠啼稊規。亂樹藏雲荒故壘。行人見月憶當時。千年畫壁公孫墓。百尺寒松帝子祠。父老近來生計拙。干戈何以慰瘡痍。

晴川閣泛舟

晴川閣倚漢江斜。獨泛城西十里花。忽見青龍翻日月。欲危黃鶴上烟霞。誰家細唱揚州曲。爲客重烹陸羽茶。仙吏不來丹棗熟。一天風雨散神雅。

淮安渡河

淮安城北日初斜。水驛迢迢客路賒。獻賦十年愁對酒。登樓何處好思家。雲低野浦千株樹。雨徙黃河萬里沙。不見王孫更垂釣。望中空自立殘霞。

馬嵬途中

烽火漁陽一騎飛。梨園子弟箏絃悲。誰知七月長生殿。便是淋鈴夜雨時。史識

燕趙少年行

天山雪夜解重圍。獨上城頭晒鐵衣。回望陣雲橫絕漠。至今隴雁不曾飛。千金名馬受飛黃。新市駢弓八尺長。久住邊城歸未得。寒衣都付市門倡。

夜泊

夜船將泊棹歌齊。芳草萋萋野路迷。只有斷猿無宿處。最高枝上徹明啼。

泊舟

拍堤春水四無雁。吹笛樓邊起暮霞。舊寺僧殘江樹盡。空留寒月老蘆花。

楊

崑一首

崑字葛山。號中洲。成都人。有三樹堂詩集。楊氏昆仲。矯矯者東子。此外則葛山。亦儼然成家。

雨中看荷花

一帶垂楊綠。乘流放畫船。晴陰來水際。香氣入衣邊。細雨低雙鷺。微風咽一蟬。不妨霑濕好。盡日醉芳筵。

楊 岐

岐字周子。成都人。有碧蘿亭稿。碧蘿亭稿。皆悲壯之音。今擇其細意默貼者。

雪

朔風吹凍雪。天半忽漫漫。遠塞孤城沒。空山樹影寒。舊曾穿戶牖。今遂壓闌干。不學袁安臥。啣杯且獨看。

蓬萊閣雜咏

仲連天下士。慷慨古人風。抗論非秦帝。高蹤寄海東。秋雲橫島黑。野火照山紅。誰見銘功石。長留烟雨中。

紅橋舟汎

日斜放艇向輕波。一帶園林隱碧蘿。似爲畫簾人小立。故將簫鼓緩經過。

朱軫裔

馬

軫奇字三瞻。嘉定人。康熙己酉舉人。官至南城兵馬司指揮。三瞻為景甯令時。有政聲。詩亦雅澹。

驍騰如此見應稀。瘦骨稜稜秋不肥。只有雄心無可似。黃金臺上白雲飛。

劉 荻

荻一名羽荻。字忠嗣。遵義人。

題陳世長舫齋

想到虛舟百事慵。當窻端只愛雲峯。目隨鳥背思無際。身遠龍濤夢亦濃。海上鷗羣終踐約。江潭漁父數相從。乘風孰與臥遊好。消息還當問二宗。

趙良標

良標字彥雯。巴縣人。

宿洞庭

日暮征帆歇。孤舟雜雁羣。湖平湘水盡。雲斷楚天分。江霧迷荒戍。漁燈映夕曛。浮生飄萬里。尚泊在江濱。

傅汝和

汝和字梅之。奉節人。

歎乃曲

瞿塘春水綠。搖櫓前溪曲。郎住灤西頭。妾住灤東麓。三月桃花紅。歌聲暗相續。暗相續。妾搖船。郎濯足。古當

集老友人中作

爲卜幽棲處。閒尋仙石偏。名應埋野草。老不厭林泉。鶴唳空巢月。蛩吟敗壁烟。寥寥清夜裏。欹枕未成眠。

山居

小閣臨江日正斜。溪山好共野人家。晝長無事棋堪遣。老去消愁酒便賒。蘿逕雨深苔易滑。茅堂月出柳難遮。北窻一榻新涼起。半縷茶烟颺落花。

劉迪

迪閩中人。康熙丁未進士。官至吏部郎中。

感懷

太平風物舊堪憐。去國離家亦偶然。遊子設身無善策。古來流寓有高賢。海邊盡日看鷗戲。塞上何時失馬還。最喜百花潭畔路。嫩槐新柳綠娟娟。



# 蜀雅卷十二

張鵬翮

鵬翮字運青。遂寧人。康熙庚戌進士。授庶吉士。由吏部郎出守蘇州。遷河東鹽運使。司歷兵部督捕侍郎。巡撫浙江。轉右侍郎。督學江南。遷都察院左都御史。授兩江總督。改河道總督。兵部尙書。加太子太保。轉工部尙書。進吏部尙書。太子太傅。文華殿大學士。卒。諡文端。

文端論詩。以性情為主。其序張南軒先生詩集云。吾觀三百篇中。唯十五國風。或多託于山川。蟲魚。芳草。雜佩。以極其流連纏綿之趣。予于大小雅及三頌。曷常不莊敬和樂。敷陳治理。揚厲道德也哉。而世乃謂詩有別腸。當在可解不可解之間。且曰。作詩必此詩。定知非詩人。其亦過矣。古人云。道在瓦甓。在秕稗。每况愈下。無邊非道。彼山川蟲魚芳草。有一非理之所寓耶。不得其理。而徒繪其情狀以爲工。吾未見其能詩也。其持論如此。文端著有武侯誌一書。搜羅不遺餘力。亦足備蜀中典故。特采一二條入余井蛙雜紀中。

## 旅夜書懷

分水驛連古萬州。烽烟無際暮雲愁。三軍不作刀鎧夢。一夜鎮聲遶戍樓。

似王龍標。

王庭詔

庭詔字宣子。夾江人。康熙庚戌進士。著耕餘集。

## 寄家書

一函遊子淚痕封。寄去雲山幾萬重。君到鶴洲江上問。數椽茅屋幾株松。

李先復

先復字曲江。南部人。康熙壬子舉人。官至工部尚書。

西郵用兵時。曲江以兵部左侍郎奉命馳運軍需。至巴里坤。清動愼職。致政。歸囊無餘貲。可想見清白

風。詩有古直氣。

弔斷臂烈婦行序

烈婦鄧氏。長溝民何獻圖之妻。齡廿一。事孀母趙氏至孝。會吳逆作叛。夫負餉隨征。母已出。婦鐵戶治內事。守備張某騰騎突入。翩翩糾糾。竊意於深谷無人之地。挽一女子。如探囊易耳。始而以言挑之。則罵。繼而以金誘之。又罵。再則以力脅之。仍大罵。張乃直割其頭顱。連揮數刃。痕寸餘。婦欲撞圍而出。張撻其肘。婦力拒之。遂斷左臂。張懼甚。乃自刺復自刺所乘馬。赴縣庭。中夜死。婦匍匐往食田水。鄰人詢其故。猶云馬兵殺我。不踰時卒。鄰人鳴之官。遣捕跡其狀。見滿室皆血。一手在門後。刀插戶側。婦遍體皆傷。下衣無全縷。遠近觀者如堵。詳聞僞將軍。俟事定。方蓋棺。露尸四月。顏色如生。噫。威武不能屈。謂之大丈夫。只大丈夫耳。而婦人云乎哉。爰紀其異。以存傳紀云。

長溝之山。山蟲蟲。長溝之水。水曲曲。蒼巖松老。風謾謾。邨婦扁籬。形影獨。織無機絲。春無粟。荆釵蓬鬢。盛顏玉。良人長征。不可憐。長征輪輓。秦師前。阿婆牧犢。柴桑外。倚閭終朝。望不還。紅日未暝。青山紫。馬蹄轟處。黃塵起。寶劍金鞍。羽林郎。下馬瞥見。雙頤喜。低首求歡。甘言餌。婦氣冲。冲髮豎。指躑躅。徬徨奔。無門。心口相商。惟有死。兇奴忿極。刃交加。血和珠淚。飛紅雨。中庭電掣。雷霆吼。神龍只抱。驪珠走。烈婦守身。不顧

身敝履形骸傷其手。手既斷。肝如鐵。血千行。腸百結。勢如漢魏交鋒金鏃折。賈復拖腸不敗北。又如真卿義激李希烈。割舌期猶罵賊。哭已無聲魂默訴。上帝聞之心震怒。陰遣六甲與六丁。藉手殲奴奴惡露。渠自戮。匪無故。忠孝節烈鬼神護。不則泰山等鴻毛。石完玉碎芳名誤。君不見漢殿明妃馬上嬌。銅雀空勞鎖二喬。美人一旦埋煙草。姓氏誰將烈女標。又不見金屋阿嬌傾國色。一笑千金難買得。宮中脂粉賤如泥。不換邨姑一點血。吁嗟乎。別夫不於室。拜姑不於堂。慷慨赴義曷忙忙。千載而下仰清風於高山之崔巍兮。與流水之汪洋。煌煌大篇。煞有關係。

趙心忬

心忬字清章。西充人。康熙壬子舉人。官至兵科給事中。清章與曲江。曠雲。俱出王流洋之門。故獨有法律。

答客

君問西川路。雲邊白帝城。但逢明月夜。處處擣衣聲。

楊嶠

嶠字曠雲。彭縣人。康熙壬子舉人。

樂府

城東飛燕落。城西落燕飛。城南歸燕去。城北去燕歸。

吳良璧

良璧字夢星。榮縣人。康熙壬子副榜。官舟縣訓導。

夷門行

壯士不虛死。美人不虛生。邯鄲何足救。天意在侯嬴。

韓士修

士修。廬州人。康熙癸丑進士。授庶吉士。官檢討。

閏七夕

晚風渡海涼。新月出雲薄。今夕不易聞。人生貴行樂。中庭小兒女。仍復陳杯杓。再拜向天孫。喁喁申舊約。老翁抱膝坐。閒吟自斟酌。夜靜人不聞。高城吹畫角。

李 姓

姓字楚材。渠縣人。康熙辛酉舉人。有濠梁詩集。

發彭湖

水際無端倪。孤舟日夜發。湖平九派寒。日沒萬頃闊。怒石落秋濤。蒼茫捲春雪。汗漫戒客心。一葉任飄忽。緬想鼎沸初。此地鳴金鐵。親提百萬師。勢若無吳越。樓舡方震蕩。一炬隨煙滅。冰結連環鎖。波冷胭脂血。至今三百載。夜夜愁鸚鵡。感往撫壯懷。擊楫浩歌烈。豎子固無成。王氣亦銷歇。天道有廢興。人事隨轉轍。過眼等逝波。代謝無時輟。惟有湖上峯。依舊明孤月。

送友人郭大從戎

海檄日徵兵。迴艫自請纓。星隨柔櫓動。月傍戍樓生。鸚鵡廳前醉。芙蓉匣內明。知君單騎去。看築受降城。

送友人還蜀

握手憐今夕。崎嶇指故都。青山開倦眼。疲馬戀平蕪。石棧盤雲細。冥猿向客孤。衰親應計日。豈爲慕菰蘆。

章江門遊滕王閣時已被焚

君王臺榭餘灰燼。傑構何年浩劫還。盛日文章碑版在。秋風薜荔石鯨閒。五更江湧初生日。十里潮青未了山。異代豪華俱寂寞。莫論高閣化雲間。

五六奇句

孤燕

年來倦羽滯天涯。前路卑飛夕照斜。共道烏衣長作侶。誰知紫領竟無家。簾鉤月冷侵孤夢。柳絮風清趁落花。莫道幽棲憔悴甚。樊籠何事鬪諠譁。

羅廷璋

廷璋字文成。閩中人。康熙辛酉舉人。

山亭

荒署晝冥冥。秋聲天外聽。野蒿迷舊徑。老樹覆空亭。雨過諸峯白。雲開一帶青。瘦梅消永日。移此對郊坰。

與客泛舟

載酒烟江上。勞勞半日程。波濤分雪色。人語亂江聲。斷岸連雲轉。孤舟與石爭。同君高涉險。因發浩歌情。

極烹鍊。亦極自然。

李謨

謨字采臣。富順人。康熙甲子舉人。官至河南太康縣知縣。采臣平居言動不苟。致仕後。依然寒素。教授生徒。每以中放心最為急務。又謂聖狂之

別。須于起念處省察。因警居崆山講學。學者稱為崆山先生。本朝在吾蜀理學。稱崆山。韓山兩先生。

梅花落

春風吹明月。夜落梅花裏。相看兩無言。清香淡如水。

樊曙

曙字旭東。宜賓人。以廕襲指揮僉事。有楚澤吟諸刻。旭東博通典籍。寇亂後。家業蕭然。躬耕養母。弟

吳逆道以僞命。力拒之。年七十二。卒。事見通志。

黃陵廟敕書樓二首 在明月峽。

月峽黃牛合。江聲白帝來。樓前憑積雪。石上起奔雷。天險岷江出。神功蜀道開。敕書猶望祀。不見使臣哀。

麗壯

秋色

秋色好盤桓悠然興未闌。鶴羣松石嶺。漁艇蓼花灘。歸路邨邊晚。鐘聲寺外殘。隔溪餘景碧。楚楚見巖巒。

樊絅倫

絅倫字仲彝。宜賓人。貢生。

仲彝幼失父。奉母避吳逆亂於荒山。乏食。覓糧數百里外。爲賊所得。監守甚嚴。無計得脫。會兵弁覓能書者。仲彝稍見禮重。遂以老母在哭告。兵弁感重。

至深夜。給米少許。縱之潛逃。抵母所。母已病且死。仲彝呼搶大匭。具棺殮。時平。扶昇歸葬。人稱其孝云。

峽中

八月瞿塘水。秋風萬里身。高樓飛木葉。愁殺渡江人。

襄陽曲

蒲帆去若飛。沙渚流多曲。無復弄珠人。來臨江水綠。





蜀雅卷十三

李以寧

以寧號雪樵營山人康熙甲子舉人官至三水縣知縣有綏山草堂詩集十卷余從遜齋先生處得其全集大半皆氣高格老之作以其從愚山阮亭輩遊故不無翫辭之概雪樵有蛾眉賦設為綏山先生問答詞氣直逼兩京文集中所必傳者

公無渡河

公無渡河河深且寬奔流疾如矢濁浪高如山解一公無渡河衰草淒迷白日將下隔岸不見人迎酸風而  
解二汨瀉公無渡河招招舟子有徒實繁停橈瀕洞瞋橫索錢解三公無渡河朝辭榮澤暮見廣武水底有蟠  
解四螭舟中盡乳虎解四公無渡河欲渡不渡當奈何天矯天吳揚大波天吳猶自可乳虎將噬我解五

歲暮行

歲聿云暮瑾戶牖敝裘蒙茸露兩肘頗憶儻忽遭迤邐土伯鬻鬻虎其首嗚呼昊天正偉怒不自我先不  
我後一歌歲暮兮歌轉驚短後之衣曼胡纒  
歲聿云暮多風雨蕭條旅舍無環堵山妻椎髻擁敗絮癡兒不襍啼聲苦貧廡誰為臯伯通索米邨間謝  
仁祖再歌歲暮兮歌轉孤荒城月黑號於菟  
歲聿云暮日月除拊髀忽忽愁居諸男兒墮地不貴顯動稱經術何為歟桓譚已去侯芭死忍飢仰屋空

著書三歌歲暮兮歌轉愴。市兒新拜騎都尉。  
歲聿云暮夜漏長。念我同氣天一方。分明入夢來牽臂。封胡遏末俱前行。荷戈滿地龍戰野。骨月何由聚  
我旁。四歌歲暮兮歌聲促。戶外寒雞齊喔喔。  
歲聿云暮雲霧浮。故園不見心悠悠。自從移家別閭里。綏山書屋寒松楸。乘羊仙人杳何處。我欲隨之道  
阻修。五歌歲暮兮歌聲漫。附書咫尺無征鴈。

讀漢侍中楊倫上順帝書

西南有大荒。產獸曰饕餮。厥性好積財。狠惡恣攘竊。九鼎辨神姦。象形戒貪劣。如何窮奇輩。甘處四凶列。  
粵稽東漢時。風尚猶廉潔。任嘉令昭陵。狼藉篋篋裂。以賄典大郡。垢臭曾不輟。一朝廷尉收。將相遭牽涇。  
請案舉者臯。侍中能撻鱗。國家勵有位。先絕要路津。誅惡不及本。此輩何由馴。轉喉便觸諱。尚書議鬼薪。  
賴帝鑒忠言。徵拜旌直臣。至今讀其書。仰首看蒼旻。上書固足羨。更思埋輪人。

錦城篇

我聞錦城好。駕言錦城道。錦城萬堞舍秋雲。錦城四野迷荒草。峩眉山在色蒼蒼。灌口江來波浩浩。益州  
自古帝王都。西陲陸海真名區。文翁政教成遺俗。武侯將相開雄圖。豪華幾見晉唐代。詞賦偏工揚馬徒。  
七橋九陌橫烟霧。風光佳麗忘朝暮。仙人紫府騎青羊。秦相赤樓高白菟。江濱神從帝女留。支機石自天  
河度。二月四月冶遊天。輕車細輦爭駢闐。文窗繡戶家家啟。珠箔瓊鈎處處懸。垂簾市上高人隱。貰酒舖

頭少婦妍。王孫俠客馳飛鞚。同心暗結鴛鴦夢。花卿歌板入雲流。艷孃舞袖隨風動。藕履輕施荔子裙。釵頭小集桐花鳳。狹斜那得比宮闈。粉黛橫陳未足奇。王衍太妃稱國色。李珣小妹冠昭儀。漫誇天子十眉畫。更羨夫人百首詞。別有風流開水殿。青娥皓齒娛清宴。城號芙蓉萬樹垂。波明珠翠新粧銜。彩舸避暑摩訶池。綃衣待月宣華苑。近來蜀國更堪誇。奕葉賢良帝子家。自是宗藩盟帶礪。敢將程卓擬驕奢。葡萄織就錦千軸。雲母描成扇九華。畫棟飛甍連戚里。絲管烟花讓朱邸。三百年來恩寵多。一朝世變荆榛起。安得壯士雄五丁。可憐野火焚連理。行人莫向浣花溪。草堂楹木晚萋迷。金鴈橋邊曾有鴈。碧雞坊下已無雞。遙遙芳樹通秦棧。滾滾長江擁石犀。祇今驛路惟烽燧。天寒何處倚翠袖。紅牆夜穴魚燈微。青松日斫龍鱗覆。尙憶華陽集古今。誰從益部傳耆舊。物換星移復幾秋。棘闈深鎖故宮幽。闌珊此日三千士。窈窕當時十二樓。漏聲頗似銅壺閣。月影難銷石鏡愁。已矣哉。歸去來。久無金馬祀。莫問石經臺。井絡文星猶燦燁。天彭玉壘徒崔嵬。獨有春深聽杜宇。年年啼血爲誰哀。包括蜀事感概係之

赴涇川和耦長雪不止兼寄高院懷

臘月朔風動地起。十月雪花飛不止。野霧壓山山盡低。南北茫茫何處是。願予萬里之孤客。騎驢覓覓風雪裏。故人高臥敬亭雲。仙臺誰薦琴溪鯉。路傍冰樹交嗟羨。短袖無溫欲墮指。我曹書卷真無靈。憂來萬事紛難理。君不見乘雪會獵南山頭。錦裘大馬者誰子。

講武城渡漳水東望銅雀臺

阿瞞已吞袁冀州。千乘萬騎臨漳流。威行河朔如虓虎。築城要害時講武。經營巨麗摩青霄。三臺樓閣何  
岩巖。祇今古渡餘荒壘。一代繁華隨逝水。可憐銅雀久飛騰。當時歌伎望西陵。世人不知粉黛假。兼金猶  
購鴛鴦瓦。

楊花篇調陳木參

花濃綺陌春時節。君家楊柳絲絲結。乍舒青眼解窺人。但掃翠眉堪鬪月。鬪月窺人花漫飄。輕薄春風任  
蕩搖。自矜粉素垂羞靨。自倚婀娜裊細腰。細腰羞靨芳塵接。玉勒金鞭恣蹀躞。旁人盡道羨楊花。舊主空  
思作桃葉。桃葉楊花太放顛。爲雲爲雨若非烟。暗挑游冶誰家宿。枉費東君著意憐。蛺蝶雙雙元共趁。晴  
絲處處爭相牽。相牽共趁嗟無主。烈飈驟雨漂零苦。已化浮萍赴浪流。分爲燐火照園土。誰知荏苒向春  
回。却得翻飛隨燕舞。春回燕舞影差池。楊花重到故棲遲。萋迷寶瑟爲君戀。綵迴繡闥爲君私。章臺雖折  
他人手。隋苑猶存往日姿。偷歡豈覺同行妒。密語微防大婦知。玳瑁牀中貪夜夜。芙蓉帳底約時時。時時  
夜夜恩誰比。何須瞥眼閒桃李。鏡裏盈盈色更妍。枕上纖纖嬌不起。卽看今世結同心。却誓來生作連理。  
那意輕狂本性成。更逢漂泊無窮已。婉轉難留掌上珠。別離又逐溝中水。楊花楊花何處遊。雪膚玉貌去  
悠悠。難將破鏡天邊合。爲憶驚鴻夢裏求。誰言萱草能蠲忿。不信盧家字莫愁。野客歸來春欲暮。撲衣柳  
絮靡蕪路。逢君幽咽可憐生。回頭不見銷魂處。小垂鸞鏡錦字乖。長吟羅袖紅顏誤。風流自古惜歡場。往  
事躊躇客共傷。垂楊羃地今何在。記取飛花繞故牆。

遊沐道士淇園

淇縣城北多飛沙。道旁却有羽人家。羽人本是黔國裔。來關淇園祇種花。橘刺藤稍迷咫尺。高柯短篠交紛拏。春深或值好風日。鼠姑片片烘明霞。蹒跚園中抱壘壘。瑤琴三弄勝箏琶。我來相訪已蛻去。亭臺舞處非叢葩。君不見秦時故侯久寂寞。猶種東陵五色瓜。

鄴城行

朝行漳水濱。暮宿鄴城下。秋飈吹斷鴻。古驛嘶征馬。此地由來魏始都。鸞旂鶴蓋爭相趨。岌業層城披繡棟。嗟我雙闕接金鋪。雄心當日何能已。建安霸業中天起。堂皇府寺七門通。鈞連閣道三臺峙。公子芳園競讌遊。美人蘭渚嬌羅綺。曹家運去事堪傷。須臾典午亦銷亡。榜題自昔誇梁鵠。劫火何期屬汲桑。淵勒紛紛無足數。一旦荒淫恣石虎。舊宮不復留文昌。新殿初成朝太武。窮搜聲色羅奇珍。後庭窈窕萬餘人。五夜星文工女史。千羣騎射教宮嬪。嬋鬢齊裝金鏤帶。蛾眉偏戴紫綸巾。戲馬水邊騰黑稍。鬪鷄郊外漲紅塵。襄都信宿馳周道。赤橋紫陌相環抱。雲龍神虎壯闔閭。白鹿蒼麟隨羽葆。雉堞遠營齊午高。繚垣更築華林好。名果累累綴木難。靈芝處處生瑤草。不妨財殫與民痛。那信天荒同地老。高齊世世耽嬉遊。日崇土木成丹丘。藻井搏風朝露薄。文窗過鳥夕暉留。玉鈎珠箔麒麟錦。碧瓦雕檐鸚鵡樓。停鸞嶺望藤蕪島。駐鶴峯看杜若州。欲做貧兒村有市。可知天子號無愁。水殿縈迴更瀟灑。仙都沉湎忘歸也。堂浮密作繞莊嚴。觀設臨春藏艷冶。鴛鴦屏啟流蘇張。翡翠奩開明鏡瀉。競羨齊宮馮小憐。詎讓江東袁大捨。繁華

如夢草芊眠。竊據興衰豈偶然。沙埋丹錫領難覓。苔蝕胡桃瓦不全。歲時苒苒驚流電。殘鐘野寺何王殿。莫歎浮雲變古今。曾經明月窺歡譚。漳水湯湯去不回。鄴城遺跡盡蒿萊。風流千載人猶憶。獨有陳思作賦才。賦治

觀紫陽山飛來石用元人薩天錫韻石在丁野鶴洞下

老藤挂遍吳山峯。紫陽劣則尤玲瓏。誰施鬼斧鑿空翠。倒飛片石垂芙蓉。黝窅荒惚入林屋。陰風豎髮聲吹竹。乘鶴仙人招不來。香雲夜夜巖邊宿。

小孤山

片石雲初斷。中流勢轉尊。岸分彭澤樹。烟鎖大江門。側影龜鼉伏。摩空日月昏。潯陽知不遠。猶此上潮痕。秋爽臺對月

向晚浮雲歛。登臺爽氣生。秋惟今夜好。月似故鄉明。小院喧蟲語。空天落雁聲。客愁當薄醉。萬里更含情。九江舟中遇雪

春半寒猶重。城頭積暮烟。雲低三楚樹。雪壓九江船。遠岸連林動。輕帆趁浪偏。不聞商婦曲。客興亦悽然。望嶽麓

奇峭臨湘岸。層層翠幃開。水光連嶽動。山色入城來。何日臨丹壑。携尊坐碧苔。祝融千里外。矯首更徘徊。

湖舫雜咏

峯影插湖流。參差一望收。翠屏雲外立。螺髻鏡中浮。水闊疑無樹。沙晴欲下鷗。西風蘋末起。颯颯片帆秋。  
山色沿溪入。青蘿尙可捫。新沙崩岸脚。古木覆雲根。漁子舟爲市。人家水抱邨。澹蘭吾欲采。誰肯贈芳蓀。  
桂楫弭何地。遙看水一方。雁聲驚別浦。鴉背帶斜陽。不見芙蓉鞞。時聽荻葦蒼。客行猶楚澤。百感共茫茫。  
數首俱有氣格。

猶憶十年事。時從此地過。薪芻爭道集。砂礫過風多。兔起盤雕鵠。騎驚避駱駝。今來還彷彿。朔氣滿關河。  
恭聞荊州大兵入蜀口號

久不勞西顧。軍書底事交。但能綏婦子。不復惜芻茭。誓衆應呼兕。臨流欲射蛟。蜀中諸將士。何以壯前矛。  
江行

山光漠漠總無痕。吳楚潮來日夜吞。曉霧乍收飛石燕。狂風欲到拜江豚。眼中積恨桃花浪。枕上華胥竹葉尊。回首壯遊真足媿。浮雲來去共誰論。

送存夜之貴陽次王佩翁韻

驪駒忽唱惜離羣。相送河梁日又曛。千里之官衝瘴霧。一帆行李載春雲。竹祠月冷征人拜。銅鼓風殘野峒分。到後褰帷詢疾苦。殊方父老舊思君。

登慈仁院毘盧閣遠眺

毘盧傑閣倚霄浮。蒼莽烟光接薊丘。萬里塞垣秦上谷。四朝陵墓古幽州。郊壇樹擁斜通市。甲第雲連半

列侯空外不知疑。眺久天風吹散旅人愁。

大梁懷古

曾閱宣和繪事精。上河被褻盛清明。虹橋鳳舸波搖闕。綺閣花棚水接城。誰使戈鋌成北狩。還憐歌舞罷東京。堤邊柳色空今古。不分寒烟處處生。

江上晚泊

古戍停舟江上邨。荻洲深淺見潮痕。漁人聚艇晚成市。野店收燈早閉門。月出遠看沙岸白。帆歸極望浦雲昏。悲涼畫角中宵起。指點平蕪戰地存。

登岳陽樓

岳陽名勝一樓孤。畫棟朱甍蹟久殊。山色尙留麋子國。秋聲不斷洞庭湖。風吹急浪魚龍冷。雲盡高空雁鷺呼。十二芙蓉猶在眼。湘靈鼓瑟聽曾無。

南樓

夏口江峯合。荆門樹色開。傷心樓上月。曾照庾公來。

邨居雜興

步出柴門細路斜。斷橋流水一山家。不知愁裏春光盡。處處開殘夜合花。

寄季弟



惜別多時秋已分。亂中相憶每看雲。可憐與汝爲兄弟。不及天邊雁一羣。

昔遊

東風惆悵玉鈎斜。千古雷塘祇暮鴉。憶得棠梨花放處。當時曾過七香車。

樊澤達

澤達字昆來。宜賓人。康熙乙丑進士。授庶吉士。官至翰林院侍讀。提督廣東學政。昆來少值寇亂。奉二親避兵越溪家貧。負米百里外。徒跣供爨。又常於蓮塘賀市。寺授徒養親。往來皆水道。嘗撐筏至魚沱。觸石墮水中。聞人呼曰。此孝子也。若有扶之者。及出波心。筏猶在側。得不死。此亦異事也。詩頗有俊逸之氣。

瞿唐峽口

誰憑霄漢劈青蒼。天險由來古戰場。八陣風雲連灩澦。三巴門戶鎖瞿唐。烏蠻塞遠江流合。白帝城高草木荒。峽路愁人從此始。哀猿啼處過飛航。

樊澤迴

澤迴字膏郇。成都人。

登四望山

山勢插河漢。泉聲落檻楹。今予愁極目。古者亦何情。巖逼雲雷近。溪流日夜清。曠哉懷抱盡。老氣尙縱橫。

張懋齡

懋齡遂寧人。文端之子。

午日秦淮竹枝詞

青溪畫舫往來頻。玉樹歌殘夜色新。獨有多情千古月，偏隨桃葉渡頭人。

贈沈皇渥

髯公逸態解風騷。捧腹軒渠興更豪。一串紅牙一斗酒，侍兒可有鄭櫻桃。

蜀雅卷十四

傅作楫

作楫字濟菴奉節人康熙丁卯舉人官至都察院副都御史有雪堂燕山遼海西征南征等集

詩余從農部唐鸞港處覓得其詩如老將臨戎步伐森嚴不事攻讎而氣自奪人

代女行

雲中有女不得于夫號泣中野予哀其志賦以記之

泉流聲澌澌花落影遲遲一身負君子茫茫安所之河邊兩鴛鴦意氣酣淋漓鴛鴦爾弗驕驕我亦何爲  
我不食爾食我不衣爾衣守死待所天寸心終不移百歲溝渠日皜皜無瑕疵寓意深遠居然漢魏  
淒淒復淒淒淒淒無已時舉頭思舊恩低頭悲路岐使君何處來投珠光陸離君意良不薄妾懷深自知  
賦命已如此百年有窮期人生名節事那能一再虧死爲舊夫死歸待舊夫歸

九日登高不果

生平嗜山水獨往嘗無懼一日中危機跬步生猶豫秋原爽氣高野景多幽趣逝將陟崔嵬掀髯賦長句  
何人阻我行斗酒且歡聚坐令覽勝心鬱鬱不得吐咫尺尙如此遠行憂可慮海東有白雲飄然自來去

結得悠遠

盡日小齋中獨坐渾無事偶然弄碁譜觸機悟妙義紛紛黑白子隨我意所置我者天之碁置我隨天意

莫謂離鄉遠。譬如生此地。杜門謝車馬。努力習文字。蟋蟀床下語。報我北風厲。呼童墮戶扉。看彼來何自。  
有懷巫峽書屋

三更推枕忽狂叫。芙蓉照眼青濛濛。巫峰十二離雲嶠。遠來就我青門東。江頭神禹驅鬼斧。鑿門混沌分  
天柱。雷霆日月雙壁行。老龍出穴噓風雨。天門奇險爭瞿唐。柴扉斜對綠倉茫。愛向千峰結書屋。書燈隱  
射波濤光。三月桃花紅爛熳。岷峨春漲迷高岸。葦葉橫飛下九霄。峭壁懸崖削天半。之官一舸類浮家。亭  
午天開落日霞。把酒臨風渾似昨。等閒孤負東籬花。巫峰蟲蟲雲之表。青山滄海催人老。借問窗前舊啼  
鶯。可見朱顏長美好。

豐臺女

豐臺女兒嬌無力。春日登臺望春色。萬紫千紅照眼明。獨倚危欄淚沾臆。憶昔花開妾嫁時。良人相愛不  
相離。花前共理銀箏柱。花下同傾金屈卮。過眼年光疾於電。珠簾淚捲東風變。垂柳委砌可憐花。花自可  
憐君不見。君不見。妾望雲。雲高望遠路難分。何由得似天邊鳥。飛到君前訴與君。

彈箏曲

君不見。瀟陽三月天。海風吹雪密如綿。城頭細鳥凍無語。屋角殘枝儂可憐。曉氣抽毫覓冷句。墨花滿硯  
寒雲匝。典衣沽酒欲消愁。無奈春愁消不去。酒盡詩成晷影遲。兒童歸語笑聲低。街前喚得彈箏女。試令  
一彈喜可知。我已多年不好樂。風塵誰復精絃索。回身隱几聽伊彈。緩攏輕攜驚且愕。入破新鶯蹴嫩條。

蛾眉初月抹雲高。千慵萬嬾遲梳掠。紅暈春風。豈惹梢。調改蕤賓彈夏景。滿池菡萏花開盛。珠簾輕掩暗香來。冰簟紋綃人夢醒。一轉金風。玉露中。霸王甲葉鳴秋空。雲雷雨往來。電急石破滄江。走臥龍。拍尾茫茫。渾無際。欲藏萬象歸元氣。湘靈縹緲數峰青。忽憶潯陽江上事。借問東來始末情。銀箏一放淚霑襟。可憐本是良家子。生長江南白下城。十四粧成傾國色。千金嫁向王侯宅。主人愛妾教彈箏。日日承恩侍主側。金屋瓊筵樂事奢。朝歌暮舞度年華。烏中不羨雙飛翼。樹裏曾羞並蒂花。盛極那知時命改。須臾陸地成滄海。妾身一點似浮萍。風浪飄零今數載。數載飄零苦不勝。饑來花市叫彈箏。卽今餬口他鄉計。猶是當年舊主恩。舊主恩情思不了。幾回西望長安道。千愁萬苦妾無辭。惟有嚼環與結草。此言聽罷心暗傷。由來絕色恨偏長。花前織錦春含淚。月下搗衣秋斷腸。前路漫漫憑造物。紅顏何用傷心哭。崎嶇羨爾不。忘恩爲爾偷閒作此曲。

### 將進酒

君不見山前射虎故將軍。薄暮單車歸灞亭。又不見門前張羅廢廷尉。一朝駟馬聲喧沸。人生榮瘁那可定。衆口悠悠極難聽。白髮空爲鏡裏愁。青春好遣杯中興。呼兒將我舊金貂。新豐市上沽春醪。先開一甕金盤露。老夫煖手親烹羔。曩時童婢顧安在。主人依舊朱門改。卽今對酒不盡歡。咄咄窮愁復何待。將進酒。好舒懷。清歌一聲酒一杯。須臾興來發深悟。拈髯微笑吟長句。乾坤何地不容愁。獨有醉鄉容不住。

### 孤啼青

出關以來鮮佳馬。東郊偶見孤啼青。豐肌豔采一無有。雄心瘦骨空亭亭。飢寒陌路誰相向。獨對高天時引吭。我亦風塵憔悴人。見此茫茫漫惆悵。適逢主人前致辭。具道孤蹄不可騎。我言此馬大宜用。與人心人不知賢哉。主人遽感悟。殷勤引馬將歸去。馬不能言向我嘶。難忘此日相逢處。乾坤氣機如轉蓬。今古曾經泣路窮。一朝騰踏青雲上。誰論昔日污泥中。人世悠悠且如此。那能望爾酬知己。

登澄海樓和同年湯西峴先生韻

山海關頭勢錯愕。狡狴怒蹲金鰲脚。迴瀾激石烟霧中。澄海樓高天際落。當年燕將恃兵強。設險築城爲鎖鑰。築城西向雲中道。白骨青燐莽相錯。筵前鐘簾未酬勳。城上旌旗風捲簿。劫火年深千載餘。繚垣歷歷渾如昨。我朝尙德不尙險。放馬歸牛柔六幕。父老衢歌兵氣銷。公卿染翰昇平樂。新豐驛路掛城頭。屬國琛車震鈴索。紛紛紫氣自東來。飛傍關門樓上著。五陵佳客玉驄過。六郡才人金盞酌。昌齡王渙氣縱橫。劃壁旗亭稱傑作。清時展眺一高歌。自喜遭逢良不薄。詩成穆穆風徐徐。意境悠然珠展拓。晴天望遠海風清。何處空中有樓閣。

蕩平厄魯特後餘馬發固節驛收養恭紀

鐵衣曾遠涉。鞭策敢辭勞。瀚海連雲闊。天山帶雪高。甘泉翻玉鞵。翠草染征袍。昨日居延外。平沙擁仗旄。

山寺曉鐘

疎鐘破林出。山寺本來空。響迸分溪水。聲遙度嶺風。依微殘月迴。斷續曉煙濛。何事驚人夢。明朝問遠公。

別意

妾夢隨明月。因君到海東。君今西出塞。月又照崆峒。別意良難薄。此行當自雄。但留明月在。不敢怨飛蓬。

述懷

我昔遼東去。蕭然十一秋。病從肝膽受。身爲國家留。絕域驅天馬。間關轉木牛。莫言才具鄙。卜式已封侯。

陳家峪

白髮楊無敵。三關轉戰勞。殘生騎虎背。一擲等鴻毛。峪水聲猶咽。陰風晝不消。夕陽沾酒處。有客話前朝。

薊門秋望

極目愁無際。邊陰慘不開。寒鷗驚月落。陣馬刷雲來。白草雕弓勁。黃蘆戍角哀。李陵遺恨處。空築望鄉臺。

夜發瀚海

北斗正當天。明河挂馬前。露沾銀甲重。月照寶弓圓。薄伐懷周績。西征憶漢年。從來敵愾者。兒女不纏綿。

烏泥圖得雨

即瀚海

炎征戈筆道。渴極飲污泥。好雨一朝得。歡聲萬帳齊。風清駝益健。水足馬無嘶。明發申軍令。王程不敢稽。

過兩雲章江臯別業

欲擬歸田賦。長吟意自如。柳深元亮屋。花壓子雲廬。橋斷經秋漲。園荒課晚鋤。愛君耽寂寞。寄跡在樵漁。

九日登高唐

不是龍山會。翩然側帽來。峰環巴子國。雲出楚王臺。勝地耽詩思。懷人托酒盃。遙知兄與弟。笑對菊花開。

玉泉山觀大閱

虞廷九寓敷文教。爲重提封閱武來。出水寶刀霜片落。射雕好手月輪開。花翻碧澗朱旗動。山擁黃雲紫蓋迴。慙愧相如巴蜀檄。何由珥筆侍蓬萊。

西郊觀獵夜歸

右安門外草萋萋。小隊尋秋見合圍。得意馬隨人所到。失調鷹與兔相違。西風古蹟寒烟斷。薄暮空林落木稀。却憶少年戀遊騁。夜涼花露滿羅衣。

雁南飛

霜早平沙落木稀。南征秋思動金微。直從絕塞乘風起。便上層霄帶月歸。鐵嶺城邊花未謝。玉泉山畔稻初肥。關情下聽斜陽外。何處人家尚擣衣。

遼都春興

五雲縹緲鬱春城。春日遙看氣象生。北枕龍岡開紫苑。南臨鳳島接蓬瀛。晚花向暖連枝放。幽鳥迎和出谷鳴。多少侯邦環帶礪。太平風物首東京。

原評三四之整麗必得五六之輕婉方能出入暇豫

九劇三條絕點埃。春風昨夜大寧臺。纔聞玉勒鳴鑾去。又見金輿擊轂來。洛水神光朝振蕩。瑤池仙路晚徘徊。東都車馬堪圖畫。慙愧張衡作賦才。



驍騎飛鷹樂未休。憐香僭客晏高樓。座中肝胆傾無忌。囊內金錢贈莫愁。翠袖杯擎花影動。紅燈劍舞夜光浮。年來六郡良家子。骨氣稜稜傲五侯。

秋雲

久客悲秋常病臥。今年初起見秋雲。翻將北海魚龍氣。變出南山虎豹文。晚樹陰從天外合。寒江色向雨中分。五陵衣馬情如許。舊說荒唐不可聞。

寄友

漠漠塵沙賸不開。蘇門作客獨懷才。黃墟日醉荆卿市。碧草偏生樂毅臺。代馬嘶殘邊月苦。征鴻叫斷朔風哀。盧溝日暮行人少。幾度踟躕首重迴。

永安宮

當年此處遺明詔。賣履分香一字無。嗣子不才君可取。老臣如此罪當誅。艱難力盡三分鼎。終始恩酬六尺孤。今日西陵撫松柏。青青依舊鳥空呼。三四爲人傳誦

籌邊樓

天府金城古益州。文饒節鉞舊風流。春秋兩見桐花鳳。晴雨三調柘樹鳩。夢裏關山情漠漠。天邊烽火路悠悠。不堪憔悴西征日。人在籌邊第幾樓。

出塞

太平天子不臨戎。大將行軍膽氣雄。畫角聲中吹曉月。琵琶馬上醉春風。宜遼塞險連雲扼。龍虎臺高一線通。最喜關頭回望處。五陵佳樹鬱葱葱。嗚咽河流入漢京。黃沙浩浩斷人行。營含苦霧旗猶濕。陣壓陰雷鼓不鳴。無定河邊秋夜冷。受降城上月華明。誰憐此處高樓女。獨對西風念遠征。萬里長垣繞碧空。誰燒獵火射天紅。馬嘶曉戍驚吹角。鵬沒層雲應落弓。芳草夜寒陰嶺月。怒濤秋捲黑河風。明妃一去勞回首。淚濕琵琶曲未終。

烏塔河望舟吉喇部落

綠水青山任去留。閑花野草不生愁。興來赤足調驕馬。倦後提壺捋乳牛。羌笛數聲邊塞月。琵琶一曲漢宮秋。功成我亦還鄉去。日與兒童話釣遊。

塞上曲

雁度金河水。風生玉塞秋。誤人成白首。還說未封侯。

秋夜詞

脉脉獨含顰。愁懷難自遣。梧雨滴秋窗。寒衣燈下剪。

問鏡

一笑謂嬋娟。卿知妾可憐。個人當日去。曾說幾時還。

白雲

君身如白雲。妾在青山住。青山無轉移。白雲自來去。

贈歌者

江天蕭颯不宜秋。烏柏霜紅罨畫樓。明月一窻寒似水。誰教唱殺古涼州。

金陵雜感

不見當年白鼻騮。垂楊垂柳夕陽斜。莫愁湖上笙歌歇。惟有東風送落花。  
風帆霧縠蕩中流。紅雨江南樹樹秋。桃葉渡頭歸去晚。蛾眉織月上簾鉤。  
蕭颯西風嘆轉蓬。傷心重過舊吳宮。千秋王氣淒然盡。空建降旛落照中。  
赤烏碑斷記前朝。百戰人歸霸業銷。試向鳳凰臺上望。白楊風裏雨瀟瀟。

西陵懷古

悵望平原思不勝。可憐南渡竟無憑。秋深搖落冬青冷。烟雨瀟瀟泣六陵。  
夕陽古道草萋萋。十里荒烟望欲迷。惆悵年年寒食節。越王臺上鷓鴣啼。  
湖邊楊柳入霜凋。蘇小門前久寂寥。紅粉摧殘歌舞歇。月明無復聽吹簫。

秋口有懷

溥溥白露冷江干。采得芙蓉欲寄難。九月涼秋刀尺動。雁門關外雪漫漫。

乙酉元日虎丘市得昭君出塞泥影

萬里辭君出大荒。幾番回首望君王。侍兒不解傷心處。還負琵琶近妾傍。  
淚洒明駝血未乾。焉支山下路漫漫。衛青死後奇兵少。銅鼓金釵出賀蘭。  
黑水流澌嚙塞垣。黃沙隱隱動青燐。就中多少英雄骨。千古娥眉妾一身。  
將出關寄內

樓邊楊柳綠陰齊。小帳遙憐晝景淒。莫打黃鶯怨驚夢。征夫猶未到遼西。  
白狼河沽酒

十千一飲興猶豪。笑解蟠花舊錦袍。日暮酒家樓上望。白狼河北水滔滔。  
秋柳

公子青春繫馬時。誰家玉笛倚樓吹。分明一曲關山月。不到飄零那得知。  
對月

十年京國五陵豪。步下毛錐馬上刀。贏得滿頭霜雪在。玉門關外月輪高。  
聞砧

三更月轉黃龍戍。萬里秋高白帝城。已是寒蟬聽不得。誰家猶急擣衣聲。  
感雁

石榴花下別朱顏。黃菊開時客未還。却怪賓鴻不相待。等閒先入薊門關。

杏山

聞道當年未解圍。金鉦銅鼓戰塵飛。只今但見塞原裏。一片孤城掛夕暉。

雪中解衣贈友人子

失路王孫賣寶刀。西風滾滾雪如毛。別君萬里無相贈。親解牛絨罩甲袍。

望遠曲

夢裏金微路不真。黃沙如雨復如塵。曉來試上高樓望。一片垂楊青殺人。如此等詩。置之唐人集中。幾不復辨。○余選蜀雅費氏而外。端

推濟楚以其格正調高不落宋元谿徑也故所選獨多。

高人龍

人龍。梁山人。康熙戊辰進士。改庶吉士。官至吏部員外郎。

秋夜

秋夜懷人候。孤燈鴈過時。吾身正無定。爾意欲何之。露重竹聲靜。月高松影移。長廊頻徙倚。不覺到鷄啼。

陳書

書。鹽亭縣人。康熙戊辰進士。官至吏部郎中。

雨後

雨洗秋天淨。塵心亦自閒。夜來倚戶望。新月澹前山。

張翔鳳

翔鳳富順人。康熙辛未進士。授庶吉士。官至知府。

種烟行

閩囷手携三尺鋤。囊裏幾粒澹巴菰。逢人說烟鼓。嘯胡一筒抵得酒一盃。亦不飲食筋骨舒。種烟之利與禾殊。種禾只收利三倍。種烟還獲十倍租。沙田種烟烟葉瘦。山田種烟烟味枯。根長全賴地肥力。氣厚半藉土膏腹。越人嗜烟如嗜鼠。寧可朝爨缺不廚。黠者招囷充力作。上田百畝種九區。可憐力薄苗葉短。不似烟葉高扶疎。憎苗愛烟戶相告。老農傍晚欲色癩。吁嗟老農勿健羨。此物鳩毒奇莫居。食多積日煩剝殺。肝腎焦灼勞醫巫。棄灰往往成失火。焚燒廬舍殃池魚。我聞前明有厲禁。稍因瘴卒寬其誅。無米令人俱餓死。無烟豈遂傷毛膚。昔年眼見鬻烟賈。掘田築室穿清渠。此來米價真大貴。里中惡少攞肉烏。太倉掬米一掬珠。陳崗爭噉如花猪。種烟利厚趨者衆。有田不稼將何如。語有關係。方不無爲而作。

李鍾壁

壁字鹿嵐。通江人。康熙丙子舉人。官廣西平南縣知縣。有燕喜堂集。

黃汾阻風

繫纜黃沙幾晦明。歸心日夜共愁生。風高陡覺千帆落。潮至如聞萬馬聲。世事久知同木鷗。羈懷何處付

銀箏倚欄蕩漾占風色。遠浦危磯浪未平。

何 鉞

鉞字元鼎。號厚溪。涪州人。康熙己卯舉人。官至浙江鄞縣令。著有芝田詩稿。

平生孝友嘆零丁。金石文章貫六經。豈有袁安偏臥雪。須知劉向善觀星。乘龍浪吸千江動。雛鳳毛分五色靈。蔚起一時稱樂事。爲君頓覺喜顏形。

普和看梅

洒沾林外野人家。霽日當簷獨樹斜。小几呼朋三面坐。留將一面與梅花。

董新榮

新榮字嘉三。合江人。康熙庚辰進士。授庶吉士。官至甘肅寧夏道。有樗齋詩集。顧息存云。樗齋詩有盛唐風味。如五

丁開云。臨潼早發云云。皆其近似者。彭樂齋云。嘉三爲文。飄飄有仙氣。自少能詩。晚年益臻老境。尤工於詞。擅白石之勝。

送費滋衡省墓新繁作此送之

當年西蜀名家子。此日江南老布衣。百代冠裳先壟在。半生萍梗素心違。纔經故里來爲客。又向他鄉去是歸。那得親朋分手後。暮雲春樹思依依。

五丁關

五丁關外入雲霄。一線天中望轉遙。巖斷千尋行有路。溪經百折渡無橋。馬蹄踏葉寒聲澁。人面衝風短

鬢飄坐倚籃輿登陟倦。不禁心旆自搖搖。

臨潼早發

叫曉天鷄寂不聞。紅燈影裏絕塵氛。人家夜色新豐樹。馬首秋涼華嶽雲。古戍清霄無鼓角。山田儉歲有耕耘。行行漸近三竿日。天遠長安望轉殷。

九日登署後仰瞻樓有感

獨倚危欄對夕暉。陽雲紅樹影相依。窮邊人事音書杳。薄宦天涯故舊稀。籬落已寒花自放。林柯不靜葉交飛。西風莫遣嚴霜下。多少人家未授衣。

平生不識古南荒。到此尋思更渺茫。天氣近連羅鬼國。人情遠歷蠻蠻鄉。醉醒楊柳樓中月。冷暖梅花帳底霜。吟碎客心無好句。逢人莫道錦爲囊。揚齋詩極似晚唐人手筆。而此首則近玉溪飛卿之間。

張晉生

晉生字日三。金堂人。康熙壬午舉人。

題美人撲蝶圖

飛來迎面故遲遲。欲打偏穿花上枝。蝶翅撲殘人意懶。憑欄宛似倦粧時。

高大申

大申字天士。梁山人。康熙乙酉科舉人。



白門中秋


碧鷄坊裏久淹留。又向江東賦遠遊。萬事消磨成老境。一年容易到中秋。蘭尊拚醉吳儂酒。桂棹思乘楚客舟。不比兒時呼拜月。頻搔冷髮立階頭。

周泗

泗字未詳。重慶人。泗詩從高白雲先生案頭處探得。頗有奇氣。

黃鶴樓九歲作

吾蜀青蓮曾開筆。今朝黃口敢能詩。長江日月滔滔去。大野風雲漠漠馳。鸚鵡竟成才子恨。梅花久斷玉人吹。徘徊閣影樓頭我。全不思鄉淚已垂。白雲師云。泗為諸生。年纔弱冠。授館士會。恃才玩侮。後竟過害。鸚鵡梅花。實先識也。



# 蜀雅卷十五

龍為霖

為霖字雨蒼巴縣人康熙丙戌科進士官至廣東潮州府知府有松蔭堂詩集余在大廷尉鄂爾  
刻稿八卷係兩着手訂即先生所序以行者按兩着有本韻一得以五音六律參入韻理旨  
意與變而其詩乃多平易近人覽者固不測也今選其重然獨遺者庶幾使人無元白之議

雜感

雁以不鳴烹木以不材終愛憎兩無定涉世真途窮匠氏所不至松柏自龍葱雌者有時盡尙恐求其雄  
 事作有用物任運以為通彼材與不材誰能處其中

鵠白不啻鴉鴉黑不伎鵠各自全其真何事默與浴寥寥天宇廓機心生桎梏傷哉陽子居枉作衢途哭  
 苟藥豈不美顧謂牡丹奴龍眼與荔枝亦復如是呼傾心附其勢惟恐或後時安知旁觀者直且奴隸之  
 荒圃餘老菊冒霜吐寒玉曠士與為友高潔不可辱橄欖抱餘甘諫果得佳目瘦質與清味知不諧時俗  
 幽貞聊自全幸免為奴僕

邨曉

薄雲漏暑景殘露滴松梢晨風微一過野竹自蕭蕭幽人起當戶清陰徐自搖晴鳥弄好音迴溪響暗潮  
 雲峯如對揖隔江遠見招入門無俗客非農即山樵科頭便唱曙偃蹇未為驕有茗呷一盞有酒飲一瓢

飲罷亦竟去。餘興樂陶陶。

偶憩

避暑投遙林。碧草生煙霧。坐靜時聞香。不見花開處。老農田間回。問客來何遽。答言偶憩此。茶瓜咄嗟具。欸欸話農桑。依稀忘日暮。臨別相送遙。壠西指前路。主人驅犢歸。余亦從茲去。

嘉州食墨魚感賦

嘉州有嘉魚。蹙鱗排點漆。龍身燕尾長。雙鬢并鐵直。二月天氣和。春風鼓百蟄。倔強立泥沙。矯如樹黑幟。市之羅縷膾。芳鮮妙無匹。夙聞箋蟲魚。墨瀋遺點滴。吞之遂潛化。如蝕神仙跡。郭公固多奇。此語難窮極。獨怪鎮江鱗。跳網若銀色。千里走京華。歲供上方食。斯物寧不貴。何爲故鄉擲。悠悠世間人。尙元不如白。

題錢舜舉秋荷鴛翠圖

錢翁畫荷不畫花。與子破葉數枝而已矣。雙雙翡翠閒相戲。對對鴛鴦偃不起。鴛鴦翡翠矜麗質。破葉全然不修飾。彼此濃淡兩乖違。雜置其間母乃失。君不見株樹巢邊懼金丸。在梁有時憂羅畢。西風颯颯吹。敵荷挾彈公子走馬疾。雖有網罟無處施。願盼逍遙真自得。老手善畫感我思。想見西湖秋雨時。巧偷生割聊移贈。淡粧濃抹總相宜。

囊駝行

危峯矗背高嵯峨。昂頭鶴立影坡陀。遠走沙場近羽獵。軍儲任重惟爾宜。古叶天生異物各有用。市廛未

許常經過。場來所見乃大異。衆養不啻驢與羸。負戴纍纍驅入市。羣行逐隊如鶴鵝。雨濕煙煤氣慘澹。風堆塵溷形蹉跎。嗚然一鳴似我訴。爲爾感念長咨嗟。物生貴賤本無定。遭時失勢成殊科。白龍魚服猶困頓。矧爾質陋才匪他。方今天子重文德。遠洽策旺懷牂牁。博徵鴻儒倒載戈。長楊不賦賦卷阿。千金戰馬空芻秣。犀兕雖多棄則卹。駝乎駝乎奈汝何。

### 畫鷹歌

秋高颯颯風枝枯。蒼鷹側踞如愁胡。攫身怒翼拳爪鐵。意勢儼與雷霆俱。不須更待狐兔死。毛血已似殷平蕪。我聞善畫宋徽宗。後來作者林良工。此圖桀鷲誰所作。殺氣慘澹風雨通。世間妖鳥紛如織。凌霄健氣排空立。整骨刷羽氣豪雄。迴旋倏蕩時一擊。謂須洗盡羣氛類。萬里霜天見霜力。空驚野鷺飽山雀。鴟梟依舊鳴聲惡。吁嗟畫師有意無。愧爾森森戴雙角。生綃一幅我無用。烏玦半丸江左貢。儲待明年春和時。爲我潑墨寫鸞鳳。

### 彙草辨疑歌爲馬文毅公賦

字法變化如浮雲。古來作者何紛紛。各體縱橫留楮墨。惟有草書傳其神。龍跳虎臥驚天門。雄強無過王右軍。平原自是忠義士。筆挾風雷日月昏。擔夫劍器悟草法。以頭濡墨焚輪囷。前有顛張後懷素。此輩要是不羈人。試看怒猊與驚馬。誰非一脉之氤氳。秋蛇春蚓譏懦弱。了無意氣徒生存。馬公大節垂青史。四載幽囚苦無比。窮愁發憤著此書。血淚斑痕猶著紙。纖疑必辨守乃定。浩氣與之相終始。丈夫慷慨託毫

素聞者悚然生敬慕。俚語真書不作草。未敢狂言忿忿故。

木如意歌

君不見烈士暮年心未已。老驥伏櫪志千里。如意敲缺唾壺邊。可兒跋扈從茲始。又不見雲錦照野金谷春。手揮如意石季倫。擊碎珊瑚二尺許。豪華直壓天家珍。可憐貴盛不久傳。俯仰今昔徒悲酸。我行萬里金臺肆。偶市古木光斑斕。不如意事常八九。半生潦倒歌長鏡。卽茲撫摩亦稱意。何必十襲深包緘。嗚呼何必十襲深包緘。

雨後聞驅九頭鳥

康熙戊戌五十七仲春二月二十日。神威高壓黑雲頽。鬼氣潛驅陰雨出。靜夜狂風漸瀟灑。千門萬戶人如啞。突聞四面搗鼓聲。驚起寒窻下帷者。須臾喧填滿闌闌。東家籬簸西家碓。黃鐘瓦缶各雷鳴。樂昌破鏡齊擊碎。渾疑鉅鹿戰秦軍。呼聲動天不可聞。又疑田單出卽墨。鑿城大譟驅龍文。疇昔之夜曾如此。云當月蝕天地否。奔馳嗇夫走庶人。補助陰陽固其理。嗟此重聞獨何由。詢之言有鳥十頭。一頭滴血破人家。進遣不使凌空遊。我聽此語心疑之。人生禍福誰其尸。矧茲異物難窮極。至今不解鷓鴣詞。孔子鷓鴣頭鳥竊疑不類。九揣摩曲盡形容肖。却愛歐陽鬼車詩。玉女調笙音淒切。江車轉軸聲嗚咽。鳴機夜織錦江上羣雁驚起蘆花雪。如斯寫照真奇特。我欲摹之不可得。吮毫濡墨苦吟詠。詩成一夜東方白。

題趙松雪八馬圖

穆王八駿稱名馬。今之畫圖其是也。描神繪意各盡態。正不必驂騑赤驥名增價。或行或立或亂流。飲者齧者滾塵者。騅馭驪駟駟駟。一一染毫細分寫。牧奴奚官咸磊落。風驟霧鬣何瀟灑。當時爲誰摹神駿。至今展翫如歷天。閑與夏房嘗讀杜公九馬詩。霜蹄蹴踏長楸下。又觀蘇子牧馬圖。沙苑蒺藜嗟荒野。平蕪淺水任閑逸。惟有此圖見者寡。八鑿六鑿非所謀。西山東邱亦何暇。意在萬里其誰知。水精道人落筆真大雅。

送高守村之京師

我官滇之南。得友高守村。我官粵之東。得友王斗南。兩君各自負奇氣。下視六合幾無一人可與參。當時握手馨交歡。心醉歸來年復年。惟我與我自周旋。壬戌之歲黃花天。守邨倏然來叩關。倒屣迎之發長嘆。傾壺竭榼攄肺肝。高談何止驚四筵。蟻蝨遠遁青蠅避。始覺塵尾柄外乾坤寬。辭我將北之燕山。買舟先欲泝濟源。倘遇斗南濟水邊。斗南家不相罵。定相憐。有時相泣還相笑。與會所至旁無人。古韻須計盩山。尙有蘭谷子。可許中處乎材與不材間。

觀海

落日滄溟好。高邱極望閒。煙雲瀕洞處。天地有無間。積水三千運。神州萬里環。秦皇與漢武。何地問三山。

再乞養還鄉

薄宦憶南滇。陳情已十年。只緣君命重。復使母心懸。毛義情何極。蘇耽志早堅。及今拋祿米。菽水亦歡然。

金川

蠻酋何所識。特險抗天威。日射層碉峻。雲封野徇微。注坡爭兔捷。援壁學猿飛。習慣成長技。吾軍但守圍。若輩犬羊似。好人實嗾之。性惟矜死鬪。時亦逞奇師。日月常陰翳。雷霆或護持。天心變叵測。不忍見瘡痍。元戎貪樹績。咄咄向空頻。未屑諮羣策。翻勞遣重臣。金戈輝道路。玉帶降天人。傳說初臨陣。豺狼亦避幘。師老鎧生蟻。兵閒霜作花。相持如螭蚌。漸化類蟲沙。白骨春閨夢。青烽輦路笳。至尊方旰食。何以答勳華。天子重推轂。宰臣再建麾。日行三百里。親帥五千師。雪嶺雖云險。雲梯或用奇。遊魂金釜底。衛霍定勳垂。毒女崇朝威。妖星永夜除。不聞摧隻矢。已見走降車。萬姓歡加額。三軍賀在廬。功成惟善斷。飲至頌那居。

歸舟入峽

歸入空舲意漸安。峽深處處好尋看。戲憐巖狖投山石。巧愛江烏接飯丸。雲去林梢明佛寺。風來竹尾掃仙壇。傳聞更有萊公蹟。古柏雙雙葉未乾。

湯陰謁岳忠武祠

崖山震蕩九天昏。太息斯人不復存。南宋勢危三字獄。北庭愁殺二宗魂。峨峨偉像傳鄉里。肅肅陰風過廟門。想見忠靈遺憾事。生平無力鎮乾坤。

出京日感賦兼寄邸中諸友

投足金臺百慮非。羈遲肯與素心違。遙知他日空彈鋏。不待明朝便拂衣。遠岫雲連秋樹沒。野田鴉帶夕



陽飛晚程孤客頻回首。舊有幾人今未歸。

海潮寺

車馬塵寰一曲湖。鬧中清景最堪娛。逐波漁艇時高下。隔岸人家乍有無。落日似啣潮尾動。微風欲到樹頭呼。若添幾點書雲雁。恰似湘江好畫圖。

郊外卽事

昌明河曲板橋東。獨倚胡床興不窮。紅樹影搖千嶂日。白蘋吹斷一溪風。羲皇以上懷陶令。山水之間學醉翁。欸段羊腸歸去晚。偷閒仍在百忙中。

王江源由楚歸蜀計程春杪嘗過湖南矣偶感成句

宦遊自苦歸無計。偏爲歸人計去留。春盡水生雲夢澤。月明人上洞庭舟。氣連野岸吹魚浪。波影高城動客愁。從此挂帆三峽近。杜鵑催喚蜀江頭。

村莊晚景次張藝圃韻

危峯障日剩餘霞。照耀田間三五家。幾點殘雲村角亂。一鉤新月柳梢斜。雄鳩啼罷爭巢竹。乳燕歸來帶落花。共醉一尊流水畔。清光野興晚猶奢。

謁武侯祠

兩表長懸雙日月。三分早定一乾坤。造廬有道懷先帝。銜璧無端感後昆。羽扇綸巾風自古。木牛流馬制

空存只今瞻拜荒祠下。紫柏森森盡欲昏。

梅花

壓盡羣葩品格稀。芳名不倩入騷詞。最宜水淡山幽處。更愛參橫月落時。竹外一枝何窈窕。笛中三弄亦凄其。平生心跡渾如爾。相對垂垂知未知。

湯陰重弔岳忠武

忠武沉冤千古稀。一回經過一嘔歎。傷心不及待中死。碧血猶能濺帝衣。

歸途雜詩

道逢幽勝小停驂。步履來看滴翠嵐。林靜忽聞人警咳。野禽驚落羽毵毵。

題畫竹

勁節虛中帶露宜。偶然風折最高枝。孤根自有凌雲意。不在干霄直上時。

尋梅

閒評素月借精神。冷澹生涯好結鄰。待得蝶蜂爭認取。早應錯過幾多春。疎影橫斜隔水遙。不辭深夜闌煙梢。三更踏月歸來晚。猶帶寒香度石橋。

李鐘峩

鐘峩字雪原。通江人。康熙丙戌進士。官至太常寺少卿。雪原有保寧志一書。文獻獨備經史賦人多傳頌。

巫峽

巫峽天下險。巖陰水氣昏。猿啼雲外樹。客斷雨中魂。神女靈旗去。騷人豔賦存。無窮懷古意。獨自向江村。

陶仁明

仁明字善長。號石門。萬縣人。康熙丙戌進士。

同易半山和喬太守攜酒過瞿唐書院作

已貫前村酒。花間懶獨斟。邀同高士語。一敘故人心。春入瞿唐暖。雲歸灩水深。何時清興發。騎馬到荒林。

易簡

簡字位中。鄂都人。康熙壬辰進士。改庶吉士。官至編修。顧息存云。位中掌教錦江。有陰擠之者。適

消易一落蹄潯激。濁難甚喜其佳。

夏日雜感

百感非關暑氣侵。故鄉羈縶擁煩襟。北窻日臥陶元亮。西寺時尋支道林。賣藥入城無好價。抱琴於野有知音。此身到處無安著。聊對薰風一苦吟。

賦得峩眉翠掃雨餘天

峨眉經雨過前川。回望風光倒夙煙。兩岫翠鬢如帶沐。千峯螺髻似爭妍。照開白雪寒垂地。幻出青霞氣接天。却笑幼輿邱壑小。也隨新霽鬪嬾娟。

百花潭

去國離家老病身。天涯何處不相親。花卿好客才偏放。嚴武多情氣未醇。萬里風塵空隕淚。五陵裘馬漫傷神。會須買棹夔門去。灩水東西理釣綸。

毛振翎

振翎字嘉蒼。華陽人。康熙戊子舉人。官至直隸宣化同知。著有半野居士集。

寓目

鳥下平蕪冷。秋情亦悄然。柳風梳野日。湖水盪空天。蘆老將飛雪。雲輕欲化煙。書齋閒倚徙。吾道在殘編。

水塘塞

半竿斜日到寒塘。主僕依樓路共商。山客初傳驅瘴藥。地出真甘草云。煎水飲可去瘴。老人新授避熊方。人云熊眉最長。值之須立于路側。手持枝。自愛特甚。人若不作驚聲則熊不敢逼。道風俗而剪來春韭同瑤草。沽去村醪等玉漿。萬里蠻荒風味別。寒郊駐馬倍淒涼。俗而

遂寧冢宰應召進雲南鶴慶府四路入烏思藏冢宰命余繕摺賦此誌概

繪圖定計剪蠻王。百萬貔貅進麗江。間日河窮尋窟水。有時舟絕渡皮航。空子拉桑。塞高天柱應迴雁。天

塞路轉雲峯不礙驥。佇看降書來小醜。不將軍士駐遐荒。

行行江岸曉風寒。碧水朱崖取次看。雀報林巒知客過。葉埋山徑覺秋殘。問岐遣使翻苗語。借宿通名索

晚餐往歲贈言君記否。短衣並馬出長安。佳境

宿三十家子番僧寺

身著黃衣異樣裝。停驂難與話空王。竿頭梵字搖新篆。院內松針落古香。拂硯白雲常過几。開軒青嶂半連牀。偶懷天竺當年使。翻羨車書共一鄉。

向日貞

日貞字一存。成都人。康熙癸巳進士。改庶吉士。官至御史。一存精制藝。出黃際飛太史門下。所刻程墨大小題文憲。幾於汗牛充棟。蜀中

論時文者必歸之。詩其餘事也。然亦自矜貴不苟。

古意

不見黃鸞啼。但願鶯啼早。莫使夢遼西。省得儂煩惱。

採菊

幽齋只合供幽芳。豔吐陶園引興狂。帶影扳來三逕月。凌寒剪斷一枝霜。拾將翠鈿侵衣綠。挂起金錢壓帽黃。儘有好花攀不易。何如籬落問秋光。詠物詩得體

馬天麟

天麟字瑞生。奉節人。康熙甲午舉人。任忠州學正。

襄陽留別潘立齋

長安回首暮雲空。並轡聯吟出豫中。仗劍同君過漢水。看山何處弔羊公。鄉心遠樹層層碧。別路斜陽處處紅。頃刻扁舟分上下。相思各載一帆風。

胡瀛

瀛字一山。宜賓人。康熙戊戌進士。官至湖南按察使。署布政使。著有石溪集。

冕山道中

遠涉休噴蜀道難。重山重水蔚奇觀。天連象嶺千峯合。雲鎖龍潭六月寒。插羽傳書多驛使。披裘椎髻少衣冠。建南扼要惟茲地。大將酬庸在乂安。三四壯語

春日過太平橋

沿溪驛路接高峯。結構危橋兩岸通。松作濤聲疑夜雨。鳥如人語笑春風。平疇段段新秧綠。遠岫蒼蒼返照紅。夾路花光總堪戀。歸來縱轡午陰中。

嚴瑞龍一首

瑞龍字凌雲。閩中人。康熙戊戌進士。由給事中歷任湖北布政使。護理巡撫。

秋雨

蕭颯聲疑落葉乾。風吹細點灑林端。滕王閣暮簾初捲。巫女峯寒夢未殘。淨洗幽巖榮早桂。潤沾香國媚秋蘭。釣蓑明日蘆汀去。添得澄波一尺寬。

蜀雅卷十六

王 恕

恕字中安。安居人。康熙辛丑進士。授庶吉士。官至福建巡撫。有樓山詩集。丙戌歲余晤嗣君鎮之。始以先生全集屬予點定。余讀之。見其學力沉博。氣象闊壯。幾於美不勝收。乃嘆沈歸愚別裁所取。祇片鱗耳。因亟登之。鎮之。余同官也。每以未梓為憾。他日刊流海內。當如景星卿雲。

雜體次章蘇州韻

焚香讀水經。有客來叩門。借問客何來。黃鵠拜新恩。執手將告別。相贈惟一言。水清湖海深。水濁泥沙存。

漁父詞

湖水瀾瀾煙霏霏。漁人操網舟若飛。翻身一撇颯風雨。船頭潑刺銀鱗肥。歸來蓬背月如斗。兒唱漁歌妻送酒。拍手聽歌一醉眠。惡風白浪嗟何有。風浪悠悠天地間。人生未有漁人閑。夜雨朝來沙尾沒。隨潮又過綠楊灣。

牧牛詞

湖水清淺河水流。潮來潮去生沙洲。洲平沙軟百草長。村童驅牛州上游。童知牛性不擇草。青嵩白葦皆良疇。大小牝牡各有得。一聲黃笛風悠悠。天上日車休纏轆。少待吾牛飽其腹。牛得飽兮吾無功。牛不飽兮愧吾牧。一洲草盡牛未飽。連羣麾去尋豐草。牛蹄彳亍牛尾搖。行行背上啼春鳥。高下陔隴任所之。牛

日肥兮牛不知。夕陽欲下村煙微。相呼相喚騎牛歸。嗚呼司牧盡如此。人間那有饑寒死。

登太白樓

翠螺山前江水清。采石磯上山煙橫。王孫一去無消息。萬古江山空復情。憶昔星精初破夢。天上神官親抱送。暨令金宿歛光芒。要使人間識麟鳳。一朝名字聞金闕。狂歌痛飲君王側。題詩不識高將軍。一曲清平留不得。潯陽白日風翻波。夜郎宵雨瘴煙過。到處天涯感流落。逢場嘯傲從譏訶。歸來偶過青山趾。牛渚茫茫月如水。兩槳船頭着錦袍。醉吟百尺滄浪裏。船在江心月在天。江妃月姊鬪嬋娟。翻身一躍騎鯨去。長庚炯炯光依然。至今明月清風夜。疑有笙鶴來山巔。亦有太白逸致。

闌中有以祭鬼請者。余寢其事。作此詩曉之。

文思天子照遐荒。闢門之典何輝煌。杞梓梗柝如堵牆。魍魅魍魎安所藏。光氣上觸斗牛旁。妖星怪宿走且僵。況乃人間鬼渺茫。縱有酒食敢親嘗。簪筆使者出玉堂。仗鉞老臣守邊疆。恭承天命提天綱。肯從淫祀墮天常。君不見滿堂拱立皆冠裳。分行逐隊爭趨踰。太平天子正當陽。有鬼應到無何鄉。

新灘

峽路行將盡。江流不肯平。撼山高浪捲。怒石險灘橫。深谷蛟龍起。晴天風雨聲。過來憂患釋。猶覺夢魂驚。

夜警

夜警人聲合。燈昏旅夢殘。乍聞驚盜賊。轉念恤饑寒。澤國居人滿。江流蝕地寬。復隄非下策。黃鶴頌安瀾。



望覺社湖

隄外煙光合。平湖入望賒。澤陂江北水。地利野人家。暖日生魚子。東風長荻芽。遠天帆點點。疑是泛輕槎。雪中同諸子。遊虎邱二首。

宿慈湖

衰草前年路。輕煙薄暮時。正逢長至日。稍覺夕陽遲。湖淺冰凝水。林枯鵲在枝。前邨又一宿。父老莫相疑。

晚泊沙口

天心悔海國。赤子慣冬溫。昨夜寒偏甚。人家早閉門。不妨侵枕席。切恐害蘭蓀。爲語勾芒使。春風養本根。

人日羚羊峽中懷許子遜步學子韻

萬古羚羊峽。長風落半帆。人煙寒嶺岫。石骨瘦松杉。拔劍心仍壯。高歌興不凡。知君多意氣。春詠百杯銜。

舟中晚眺

夕霧橫山淡。晴霞落水紅。扁舟載暝色。歸鳥破寒風。節序春當首。流年日過中。天涯增感激。一醉與君同。

燕子磯晚眺

一卷孤簷帶山迴。力障狂瀾亦壯哉。江水勢從落日下。海風聲送晚潮來。懸崖樹老常棲鵠。亂石濤奔欲走雷。試倩山僧談浩劫。可能指點六朝灰。

句容早發

城頭落月掛金盆。漠漠川原氣欲溫。  
南浦柳牽千里思。東風梅返去年魂。  
關心馬足凌冰滑。回首仙山帶霧昏。  
試乞茅君分七藥。勞人髣髴已霜繁。

督運渡江

一幅蒲帆一葉舟。煙波盡處是瓜州。  
潮生潮落天將曙。人去人來江自流。  
治粟舊衙慚漢使。乘槎孤夢隔瀛洲。  
龍驤萬斛連檣渡。仍歲荆揚報有秋。

寄錢集齋學士

安仁歎逝感浮生。卜子離居欲敗明。  
魚眼未乾殘夜淚。鴻書遙送故人情。  
煙波落日雙蓬鬢。風雨扁舟一短檠。  
千里相思江上路。又吟芳草聽流鶯。  
昨午寄集齋詩有黃鸝芳草之句

次鐵嶺太保夫子燕子磯登眺原韻

山生翠巘水生紋。閱盡朝暉與夕曛。  
石底灰餘秦代劫。檻前風度楚江雲。  
千秋霸業看兒戲。萬竈炊烟待處分。  
報國一心今白首。獨醒不信世能醺。  
用蘇長公詩意

龍蟠山下有遺官。誰遣金川引朔風。  
葵戚竟干南斗位。貔貅偏讓北平雄。  
而今放馬桃林外。無復射蛟江水中。  
漁火耕遊太平日。傅巖霖雨正濛濛。

虎帳龍騰控上遊。居然一柱砥南州。豹房卜夜天方醉。鯨窟翻波血已流。闔外何勞輕玉趾。湖中早已得黃虬。將軍廟略輸皇祖。漫向康郎捉縱囚。

送友人鍾二杰人回粵

天涯默默數交親。意氣如君若飲醇。萬卷讀書兼讀律。半生憂道不憂貧。八閩兩月同風雨。五嶺三年舊主賓。跋馬遲遲幾回首。言言珍重白頭人。

廬陵懷古

狀元宰相來何遲。兩宋鴻基運已移。江上竟無乾淨土。海邊猶有烈轟師。要將一死酬三學。不盡孤忠在五噫。落日荒祠回首處。秋風黃葉不勝悲。

過潮州有感

金山遙帶鳳凰洲。書記峒峒憶昔遊。二十七年如昨日。八千里外似并州。空餘大樹翻斜日。尙有遺丁說故侯。路過西州秋欲老。舊參軍也雪盈頭。

楊宏緒

宏緒字丹山。新繁人。康熙辛丑進士。官至按察使。著有直養齋詩集。

別姪倩王子端

不欲與君別。天涯親故稀。吾行正無定。爾去更何依。家信煩重寄。鄉心欲並歸。相看增黯結。日暮海雲飛。

月

生時纔耀魄，缺處漸增明。不蔽山河影，空磨今古情。半輪雲外度，一點樹間行。露瀉幽花濕，煙流密篠輕。鄉關縈遠思，刁斗肅邊營。為愛金波漾，聽殘玉漏聲。

自昭化至劍門

茲行又值早春時，一握天高任所之。衰草斜陽丞相墓，荒苔冷篆劍門詩。泉通石罅山根響，樹擁崖陰日影遲。沽酒但尋茅屋去，松風高掛薜蘿衣。

甘曰懋

曰懋，字實夫，大邑人。康熙辛丑進士。

華頂三十六峯見吳青霞題詩壁間寄贈

袖拂剛風倚天闕，忽見龍蛇氣蓬勃。君從三十六峯來，獨上蓮華攬明月。自是君身有仙骨，放歌長向煙霞窟。回頭却笑韓退之，痛哭蒼龍嶺上時。

岳鍾琪

鍾琪，字容齋，成都人。官至川陝總督。加太子太保，進爵威信公。著有蛩吟、薑園、復榮等詩集。威信先秦

之莊浪人，以父蔭龍歷官至川省提鎮，遂家於成都。勸平川陝沿邊諸番寇，威重華夷，邊民懾服。恩眷隆重，列鎮四川幾三十年，其殲也以忠州陳昆邪教倡亂，日夜馳至擒捕，餘黨歸至重慶卒。上震悼，謚恤有加云。公於軍旅之間，輒寄嘯於筆墨，邊塞諸作多慷慨悲歌之氣，而退居林下，寄情花鳥，又復神似放翁，石湖諸君所謂奇人，真無所不可。

古劍吟

太阿豈凡鐵。耿耿七星浮。奮揮旋紫電。冷冷眩雙眸。分水擊鴻雁。迎刃斷馬牛。每逢風雨夕。怒吼蛟龍愁。偶值不平事。錚錚表芒流。嗟哉閒廢置。久不近兜鍪。室衣從未解。韜光已數秋。星罈生古縮。鋒鏃與昔殊。叶神氣亦沮喪。不啻匣中收。斗間乏寶氣。寧再豐城求。砥礪更拂拭。光芒復燭幽。神物亦有數。利鈍不自由。丈夫遭坎壤。與此却相伴。有待磨與拭。或未終棄休。

述懷三十韻

拘幽寂無事。心緒忽茫茫。連霄迥不寐。兀坐更傍徨。憶昔少年時。所食盡膏粱。肉必啖大臠。酒必飲巨觴。手能格猛獸。足可逐奔狼。無志事毛錐。請纓列戎行。喜馳花叱撥。愛射野羊黃。狡盧忽蠢動。十載客沙場。恆河飲戰馬。番藏躍龍驤。單于悉授首。擒斬偽藏王達克咱等天威震遠荒。論功邀上賞。提封萬里疆。青海復傳箭。東井見樓槍。秦邊圍未解。蜀兵遠調防。赤血污白刃。金甲冪銀霜。歷程兩閱月。百戰抵河湟。二月草未萌。胡馬正羸尪。趁時當進朝。行謀自尙方。梟虜十萬級。九戰一殮羊。出師不十日。生擒十八王。青梅十八部落皆封王爵自二月八日出師。至十六日止。悉皆擒斬蕩平。凱旋報明主。錫命凜煌煌。進爵爲上公。總制領故鄉。殊恩深且厚。山海亦難量。惟知籌國計。身家念早亡。西夷屢犯順。負固擾戎羌。奉命統雄師。用將撻伐彰。街亭馬豎子。縱寇翻自戕。畧魚不得食。解羅任遠颺。宸怒震虢虢。被逮繫銀鐙。君恩生已負。臣罪死應當。但聞傳露布。含笑赴黃壤。

天山

偶立崇椒望。天山中外分。玉關千里月。鹽澤一川雲。蒼石遺唐冢。殘碑記漢軍。未窮臨眺意。霜雪滿征裙。

軍中雜咏二首

地在乾坤內。人居朔漢閒。月寒川上草。松老雪中山。鐵騎嘶沙磧。金戈擁玉關。樓蘭誠狡黠。不滅不生還。

玉隆道中

尋勝到郊原。寒雲蔽日暄。馬行黃竹路。犬吠白籬門。山色松環岫。人家水抱村。旂亭成小憩。鷄黍晚饔飧。

出征西寧

嗟余五載九征蠻。骨病神疲力已殫。瀘水瘴煙迷古渡。天山陰雪壓雕鞍。別時兒女牽衣泣。歸日親朋握手歎。願得太平無個事。牛衣臥對養衰殘。

韓信嶺

王孫勳業有誰同。四百開基一戰功。漢水有人旁躡足。烏江無客渡重瞳。當時不合藏亡昧。臨死何須說賊通。憑弔不勝生感慨。蕭蕭暮草泣秋風。

西藏

幾度平蠻入不毛。傾心報國豈辭勞。天連塞草迷征馬。雪擁沙場冷戰袍。七縱計成三戍靖。六花陣列五雲高。壯懷自信還如舊。劍匣時聞龍怒號。

武侯祠

等閒巾扇策奇勳。伊呂儔非管樂羣。漢土蠶叢天一角。草廬龍臥鼎三分。陣圖終古排沙磧。廟樹何年赦斧斤。魚水君臣兩遺憾。祠堂殘照惠陵雲。

中秋

瑩瑩霜鏡掛長空。此夜清光果不同。百歲人生將過半。一年秋色恰當中。鄉魂長繞芙蓉水。塞鴈纔尋桂子風。遙憶故園今歲月。天香寒影入鄆筒。

山居

小築山居傍綠溪。百花潭北少城西。柳隄沙暖朝調馬。竹院人閒午飼鷄。麥浪翻風黃半熟。秧針出水綠初齊。持竿攜榼臨流坐。碧樹陰陰布穀啼。

感懷

三年未佩呂虔刀。仰望青天嘆沈寥。北海未通中使節。南冠不插上公貂。愧閑玉塞攀旂手。恥羨維揚跨鶴腰。籊籊泮蠶猶可食。市聲何事苦相招。

偶感

高陽狂態信非儒。使酒陵人笑灌夫。長短夢還憑蝶意。陰晴天欲任鳩呼。好尋枯幹生枝手。爲畫殘山剩水圖。中有老翁披笠服。持竿箕踞倚雙梧。

湯陰懷古

立廟湯陰古渡頭。平生餘恨在燕幽。朱門麗日靈威壯。翠柏斜陽客路愁。奸相有心通北使。康王無志復中州。奇冤三字羅成獄。鐵檜千秋是復讐。

七夕

漫道仙家樂事饒。仙家離別亦蕭條。金風已報佳期近。銀漢還愁隔路遙。天上不聞鸞作侶。人間都信鵲爲橋。一年一會猶惆悵。惟有嫦娥慣寂寥。

余間居十二年。童頭豁齒。景逼桑榆。因大金川土酋狂悖。致干天討。自乾隆十二年五月進兵。至十三年五月。尙未克捷。余奉旨統師黨壩。又命大學士公納親經略軍務。督師勦逆。自立秋以來。霖雨連旬。阻我長驅。有感而作。

遯跡邱林十二年。于今又着祖生鞭。銅標未建將軍柱。錦纜重牽相國船。瀘水瘴來雲似墨。蠻荒秋後雨如泉。霖淋欲識蒼蒼意。先挽天河洗穢羶。

題畫馬

誰寫驂駟臥碧茵。曹將軍骨子昂神。年來未向沙場跨。畫裏相看也動人。

蔡時豫

時豫字笠齋。崇寧人。雍正癸卯舉人。官鎮遠縣知縣。著有慈竹園等集。

次南星店題果親王壁上畫松歌



南星店前山似戟。瀟瀟細雨愁行役。暮投山館見蒼龍。道是親王真筆蹟。巨幹入雲撐鐵柱。老根拔地入盤石。一枝橫放勢何長。徑去不知幾千尺。一枝拗出特有意。倒影明月涵空碧。此松品在丈夫上。韋偃筆法猶小樣。會將楨幹捧明君。肯向空山飽煙瘴。緱山仙去纔幾年。碧紗破壞塵黯然。我來掃壁空太息。山椒雨歇聞涼蟬。

道中喜晴懷舍弟修萊

晴日徵車裏。遙天碧一涯。石田收晚稻。野草放秋花。杖策心雖壯。巢林願不賒。卯君行漸遠。計日已還家。鎮遠行館作

鎮遠紀事

山城重到處。雨後氣如秋。巖色朝侵戶。江聲夜入樓。憂虞時已改。險阻跡仍留。底事頻來往。飄飄羨去舟。新署頭銜尙舊官。艱難時會敢辭難。登陴意氣風雷動。免胄鬢眉日月寒。勢若燎原誰赴火。身非砥柱欲迴瀾。千重霧縠憑高見。男子從教誓孝寬。

冬日慈竹園養病

半夜霜風寒。無人知獨寤。惟有遠村鷄。爲語天將曙。

傅輝文

輝文字曉亭。簡州人。雍正甲辰進士。著有承翼堂集。

靈泉謠

昔從羣兒遊，往往弄此泉。今從泉畔居，靈泉日在前。泉色長如此，我色非少年。安得煮泉水，煉藥挾飛仙。

秋郊夜行

雨過西山霽，高林夕照微。銀河斜晚渡，珠露上秋衣。夜迥燈花落，年豐水稻肥。村人知吏簡，樺火候迎稀。

古意

西南爭戰久，天地別離多。爲問長安柳，春條剩幾何。

張乾元

乾元，營山人。雍正丁未進士，改庶吉士，官檢討。

秋思

小雨饒秋態，斜陽戀遠青。夜來井梧葉，一葉一秋聲。

陳中

中，字用其，墊江人。雍正庚戌進士，改庶吉士，官至湖南寶慶府知府。

富樂山懷古劉璋宴昭烈處

富樂山前有人歌，九日高風吹殘碣。我爲山靈結伴來，秋洗蘆花白似雪。英雄割據已千秋，唐宋元明共一邱。只有芙蓉江上水，年年不斷向東流。

費 冕

冕字言樂錫琮子新繁人

少年行

玉勒紫驂臨看花過御溝。一鞭深柳度雙袖落花投。簾幙圍輕舫笙歌出遠樓。王郎猶借問何處散春愁。

塞下曲

五月霜威勁千秋舊戰場。朔雲屯海黑邊月帶沙黃。山冷秋笳動城空曉角長。近來鄉夢斷壯志在勤王。

費 軒

軒字執御錫璜子新繁人。此度詩傳未替故執御方潔俱能祖述家風。

閒情

塵喧隔斷野人家。溪水漣漪淺見沙。乍覺曉寒肌起粟。旋驚午睡眼生花。古苔暗碣題黃絹。嫩竹分陰上碧紗。鎮日小窻無個事。風爐自泡雨前茶。

春閨

豆蔻風微二月時。曲欄亭畔雨絲絲。梨花半樹將成雪。下着珠簾總不知。香奩逸品

紅橋柳色

畫舫春歸酒易銷。絲絲牽恨說前朝。剪刀風裏初開葉。魂斷揚州第幾橋。不減杜牧之

費藻

藻字方深。新繁人。雍正壬子舉人。

吳聲曲

亳州輕紗若煙霧。隔窻隴隴月微吐。門前楊柳鳥亂啼。貪聽吳歌不知曙。

費盃

盃成都人。

春草

芙蓉堂上翠綿綿。楊柳橋頭色倍妍。春老未歸千里夢。曉寒惟見一堤煙。水依樓閣斜陽外。露濕蘼蕪古道邊。回首不堪思往事。消魂尤在茂陵前。

蜀雅卷十七

李專

專字知山。遵義人。貢生。彭樂書云：知山少以詩自豪。放蕩不羈。與巴縣劉康成友善。晚交崇寧蔡。比素須知有鳳。必求風人傳誦之。知山為貢生時。遵義尙屬川省。今則隸黔矣。選入蜀詩。從其初也。息存常稱其薛濤詩。傾宜節度。高千里。錯過詩人。杜少陵為佳。然便宜二字甚褻。以為佳所不解也。

雜詩

我愛天邊月。年年如鏡明。良宵當十五。對月感人生。萬古月長在。百年人遞更。月闕今又圓。人枯幾時榮。月華如首肯。携家上太清。月虛我亦虛。月盈我亦盈。所願非所能。長歌遣此情。

照鏡

劉郎謂我醜於鬼。其言未免近於毀。陸郎謂我美如玉。譽之惟恐其不足。以此懷疑經幾年。菱花曉起當窗懸。投果擲石皆不與。兩賢愛憎何天淵。他日相逢舉似汝。才不才間我中處。

遊中巖

天下好山水。君王與佛分。畫圖留古蹟。鐘鼓到沙門。客繫如萍纜。僧携滿袖雲。停杯問鷗鷺。何日許同羣。

洞庭

試倚滄波望。楚天如此長。九嶷皆化水。三峽竟何鄉。但覺闊無際。誰能測所藏。魚龍莫驕怒。柳殺在中央。  
以空得之。

灑灑堆

誰觸夔山似不周。輕拋一柱砥中流。大如幙日船皆避。削作峰時客尙愁。江勢遠將辭井絡。濤聲怒欲掃荆州。請聽雙壁凌霄處。盡日寒猿嘯未休。

昭君村

空舲峽裏近花晨。一線天低不見春。肯信山川如此險。鍾爲窈窕竟無倫。紅顏兔穎描難肖。青冢龍沙怨未伸。世代屢移遺蹟在。琵琶休撥暮江濱。  
顧息存極贊三四聯之工然不如五六含蓄。

吊驢

茹草何曾耗秣田。主人情薄尙加鞭。化爲鳥道一坏土。愁對蠶叢萬壑煙。野店斜陽山下路。小橋流水雪中天。祇今行役將誰恃。懶向孤村問釣船。

采石磯懷古

雍公才調異儒紳。奉使巡行此水濱。兀兀南來寧有轂。臨安北面久稱臣。三千步卒投危地。百萬強兵潰要津。向使勤王師便集。須知一舉靖邊塵。

慈字康成。巴縣人。雍正壬子舉人。讀樂齋云。康成性簡傲。不可一世。工於詩。於友人家壁上抄得之。

偕同人遊草堂得陵字

十九年前吟望處。浣花溪上記吾曾。石碑遺蹟依然在。草閣迴廊不可凭。林口三叉沽酒店。渡頭一點打魚燈。呼朋飲罷匆匆去。回首安閑愧老僧。

願鴻

鴻字農以。閩中人。官至山西汾州府知府。著有寄餘集。

許昌送工部劉曉江解組還蜀

悠悠與誰論。靜識天地廣。壯志隨浮雲。功名任飄蕩。京尹落拓時。跼步觸烟燭。不忘貧賤交。風雨樂幽賞。我來守穎濱。故人勞夢想。達者略細行。大德終不枉。坎壈遇何常。浩歌一長往。憶昔我丁年。與君共里黨。握筆主文壇。豪氣最倜儻。索米到長安。七尺優憑仗。大造等洪爐。日月復摩盪。畢竟成何事。共看鬢髮蒼。橘味淡神仙。槐根幻夢象。物外得自由。何者堪悒快。閩山臺高高。閩水波滉滉。瀟洒歲月深。不須隨俯仰。  
水部以榜蒲事去官。至許昌。以作此送之。慰勉交至。

溫泉

寂寞驪山夜。蕭疎八月秋。仍過來去客。不冷古今流。星度長生殿。花開羯鼓樓。濃歡終有盡。惆悵漫生愁。

閒居

閒裏居無事。春闌住日暉。誅茅人欲老。鋤甲菜添肥。蛛落綠絲起。禽爭墮地飛。有時開卷帙。心迹不相違。

楊州夜泊

歌舞樓臺夜寂寥。輕風暗送客帆遙。二分無賴邗江月。猶照當年廿四橋。結有神

毛大周

周字贊伯。四川成都人。

登沙河南樓

庾亮高樓興。畿南地最幽。暮雲連日盡。野水接天秋。故國知何處。他鄉望不休。誰家吹玉管。淒斷小橋頭。

唐叔度

叔度字汪波。綿竹人。官至江南桐城縣知縣。

題姚十五範冶彈琴圖

希聲不諧俗。獨與君子期。君子寡所營。乃與希聲宜。閒庭寂無人。悠然理朱絲。絃指兩相忘。淅淅松風吹。古人不可作。髣髴一見之。魚鳥何所聞。飛躍情如移。此中有妙契。未與笙簧知。

折楊柳

春風從天來。吹我江上柳。聞有紫驂騑。驕嘶躡雲走。條長不繫馬。飛絮何紛糝。欲折一枝春。離情空在手。

許儒龍



新灘

儒龍子水南成都人舉博學宏詞有岷南詩草許永南集大半平實之作過多而渾有聲調者絕少由范陸習氣深也

楚蜀足千灘。此灘尤不測。亂石挾嶂。深濤看洞黑。盛夏水奔流。嚴冬行阻塞。兩岸夾民居。賴此長灘食。水作雷霆聲。人有鮫鱗色。十夫奮篙櫓。禍福付頃刻。我來值冬季。有路在江側。登崖看行舟。快於生羽翼。理水稱昔賢。誰能舉其職。嗟爾往來人。但頌江神德。顧息存云。人有蛟鱗。為集中警句第一。

黃牛峽

迢迢山水間。幾日巴東路。回首見黃牛。上峽無朝暮。我茲東南行。屢冒寒江霧。今夕盼江陵。何處煙中樹。長歌太白詩。急棹輕舟去。

止止菴

蒼松間修篁。繞徑清風起。恍疑輞口莊。有館在竹里。屋角散巖花。簷前接溪水。山北此權輿。見此已心喜。行行方縱觀。安能遽稱止。

題畫鍾馗圖

南山進士古豪客。能以劍鋒殺鬼魄。耳聞鬼聲首回顧。戟鬚鐵面雙睛怒。魚腸著地雙虬吼。黑月無光霹靂走。開元宮中曾入夢。吳生寫神顏色動。口拭高堂懸素壁。魍魅宵奔狐絕跡。而今白晝羣魔嘯。蛇神牛鬼情難料。願公倒提三尺水。鋤而去之余乃喜。

自題負雪圖

此客生平何所樂。放志人寰無束縛。畫師欲畫觀大略。白帽襦羣不可作。斧木成齋足棲托。齋前種樹雜花藥。有時霰雪飄春幕。凍醒瓊枝發新萼。毳服纏身躡芒屨。負雪呼檜燒聚籜。眼飮寒香還細嚼。濛濛冷月杯前落。人各有求汝求約。性地貞和孰汝若。天乎於汝不爲薄。千樹梅花一聲鶴。

春池

戶外春情澹。池邊野興賒。乍添三尺水。已聽四隣蛙。入夜星光動。迴風樹影斜。元亭正荒草。休認子雲家。

行舟

行舟鶯漲落。處處凍春冰。石出灘增勢。沙高岸善崩。凝眸傷地迥。清嘯有巖響。惆悵江中嶼。乘流未可登。

到岸

到岸停征棹。悠悠無限情。一舟橫野色。百聽廢灘聲。暝覺空江易。愁嫌獨夜生。臘殘猶道路。飄泊耻身輕。

雨中過安莊山

山徑崎嶇困不勝。青泥漣瀾倍難登。漫看石磴餘千曲。纔到蒼崖第一層。帶雨馬如寒夜犬。穿雲人似早秋鷹。自嗤疾步何堪羨。猶使奚奴訝我能。

天柱菴

天柱峰前石磴斜。迴廊複閣上人家。籠懸東粵能言鳥。塔放南溟弄色花。洋花一對雨捲簾山獨秀。臨溪日數變

命酒興偏除。不知得此操何術。笑指雲崖萬樹茶。

泊光澤縣西郭

雨後山雲黯不開。江城艤棹合徘徊。船頭剛近魚蝦市。早有腥風觸鼻來。似宋人小詩。

劉顯先

顯先字曉江。閩中人。雍正癸丑進士。官至工部郎中。曉江官工部。有能聲。其視職也。以楊藩之事為小人所中。雋士論惜之。

馬崑

郭李功成幸蜀回。一坏荒土足徘徊。可憐不負當時意。曾聽巴山夜雨來。

彭端淑

端淑字樂齋。丹稜縣人。雍正癸丑進士。由吏部郎中歷官至廣東肇羅道。

金牛峽

鬱鬱陰風號。稜稜石角銳。鱗鱗斧鑿痕。巉巖兩岸際。危徑碍行車。竹杖方漫曳。蒼藤掛狢猿。古木藏鶉鷄。俯仰天地窄。躑躅日月蔽。不因金牛貪。中外至今閉。悲哉蜀何愚。一關不再世。惟有五丁功。與峽長不替。

彭肇洙

肇洙字仲尹。四川丹稜人。雍正癸丑進士。由翰林院編修官至御史。

秋夕宣化道中作

向晚出南口。黃沙一掌平。涼風肅野艸。孤月照邊城。樹老蒼煙合。山寒白露清。人家秋色裏。處處暮砧聲。

彭遵泗

遵泗字馨泉。丹稜人。乾隆丁巳進士。改庶吉士。官至江防同知。馨泉有文名。領乙卯鄉薦第一。宗小

杜後宗大杜

七夕篇

微涼下秋葉。白露沾我裳。徘徊侶孤影。仰面視穹蒼。耿耿銀河脉。悠悠去路長。我欲駕赤龍。乘風叩九閭。矯首天衢外。鱗爪自飛揚。復聞青鳥至。促裝待翱翔。仙客爲余言。往來雲之鄉。已矣且休歸。百感出中腸。生死胡太速。別離多慘傷。生離會有期。死別杳無方。借問牛女星。何如參與商。馨泉失偶不娶。有摩詰之風。故有爲而言。

古墓吟

重壤何年閉。纍纍相參伍。斷碣橫荒榛。四垣穴狐鼠。寒風拂面來。愴然摧肝腑。服尤餌丹砂。求仙慕遐舉。脫神不脫形。骸骨尙須貯。嗟彼貪痴人。沒世思禦侮。鎔鐵錮南山。設疑七十處。機巧枉用深。握發誨盜豎。縱使長不虧。於生亦何補。古來大聖賢。天地可爲字。修短隨物化。精神照千古。哀哉袁公路。未死骨已腐。

過武侯祠

荆門遙撤漢宮墻。老後雲旗出益方。王氣夜收明月峽。賊星東曜紫髯王。千年風雨圍陵閉。一代君臣祀事長。自是吞吳遺恨失。不勝幽怨滿江湘。

摩天險閣劍關存。一旅潛驅至國門。歸命箋成嗤太史。殘家力竭哭王孫。武擔不斷萋宏碧。洛下誰招杜  
宇魂。頻過昔時孤憤處。惠陵風雨易黃昏。

悼亡

中饋紛拏事可嗟。向平初願計非遐。蘭堂燄燭方成采。萱背當階已謝花。豈是命宮逢磨蝎。寧同此歲在  
龍蛇。可憐新婦歸來日。不著粧衣只著麻。

過應山楊大洪故宅

黑風吹獄氣。陰陰何處招魂慰。夙心解脫龍淵歸。北寺毒流狗監指東林。大刀未試奸猶在。棋局翻殘恨  
總沉。每歎晚來邦國瘁。人亡何禁涕淋淋。

雨泊復行

草風吹雨晚涼天。睡思蒼騰客枕前。一路蠶叢山不斷。鷓鴣聲裏又行船。

張士炳

士炳字麗天。南部諸生。

自述

市遠塵囂淨。幽居日閉門。門開松竹逕。人在水雲村。跣足懸崖下。科頭古樹根。春秋無復記。但覺有寒溫。

周國器

國器字玉潭。大竹人。乾隆辛酉舉人。仕新都縣教諭。著有桂湖講義。

新安道中

詰曲羊腸道。征車出漢關。風來堤外樹。雲起望中山。疲馬獨吟苦。野人相對閒。麥苗春正好。驛路慰衰顏。

余嶧桐

嶧桐字仲響。華陽人。著有十三樓稿。

七夕

淡淡銀河夜。沉沉玉露天。鵲憐仙子渡。蟾共客心懸。白髮驚秋思。青燈隔綺筵。誰家競乞巧。兒女笑聲傳。

寄張紫望

歸路雙江隔。思家百慮兼。已難炊數米。那計食無鹽。細雨柴門掩。秋風客病添。故人張旭遠。詩韻待誰拈。

蔡時田

時田字修來。崇寧人。乾隆壬戌進士。改庶吉士。官至御史。有雪南集。彭樂齋云。雪南始學溫李。晚

拔詩文俱極沉博絕麗之觀。以科場事發論死人皆避其事而誇其才。

古劍四首

化龍躍入江。神物原無主。秋墳走妖狐。靜夜騰金虎。出匣割有聲。儼與雷電語。肝胆蝕泉泥。千金重一許。神光含古木。怪異動幃幌。讐仇隔千里。在處時一响。壁間發以室。精靈自來往。白氣每插空。徐收入柱礎。

鑄成斃千人。入土鋒仍淬。光氣入斗間。星辰失其位。世路歸坦夷。仗之輕細碎。把與結死生。天涯一燈背。床頭時一鳴。匣裏鏘秋水。囊之十餘年。天壤無知己。恥與蓋聶論。歸來自磨洗。騎驢入大梁。向人不爲禮。  
極事長吉

將赴青城從離畢渡江入筏村道中卽景

過江指青城。江村一灣綠。踏沙去洲渚。岸行入林麓。樹密靜行人。林深鳥側目。一坪淺草地。十丈古喬木。四圍佐濃陰。數點漏初旭。便可席其間。樹裏微風出。一坐訂終日。蟬聲聽斷續。未到六六峰。先此忘塵躅。  
由真人觀入山口蹊行至建福宮

一徑入山口。峽合路忽斷。路斷一蹊行。行人走石澗。石澗多于水。磊磊白石亂。因之水清淺。踏踏雙履換。雙履跡石次。析閃不越畔。彎樹散溪斜。清陰足一半。此間坐小歇。飲谷得所便。漱齒弄流泉。一掬冷然善。  
瀟灑出塵

初入青城過常道觀

入山森耳目。蒼深天地失。合沓聳青巒。葱蘢蘊山質。蒼蘼藏神理。煙靄滿欲溢。藤蘿染日月。子午多不的。萬古養蔚藍。天應苔蘚蝕。琳宮遙在望。茂樹隔澗密。仙人御綠髓。大是寧封匹。老作青城遊。咳唾成點碧。胡麻飽我饑。跌坐訂三日。

山中雨後

古寺高突兀。四山埋重霧。金蛇時一擊。雷聲欲破柱。隆隆在殿角。挾風雨與助。勢方作飄洒。終然成灌注。朝來百道泉。巖頭挂幾處。一夜山中雨。山間斷來去。亭午詫客來。問之已可渡。便擬腋青鞋。不襪走石步。雨後山益佳。白雲方在路。

將抵灌口

十里一柳村。陌上柳無數。柳下見田疇。田外仍柳樹。深秧圍茆屋。入去莽無路。時有荷鋤人。自繞阡陌度。

入峽四首

峽裏誤出峽。峰勢展船頭。峽裏更入峽。迫隘不容舟。亭午不見日。合沓萬木稠。束扼急湍瀾。重沓爭一流。前水若未伸。後水來奔投。糾繳相搏擊。水與水爲仇。風伯更助虐。淺澗無時休。舟行觸其怒。安得不汝尤。釋怨向水府。先謀鑿嵎嶺。象馬悉聽去。何愛乎黃牛。

峽窄水幽深。峽夾天繚繞。響應兩巖答。風入深灘凜。新險我所叱。愛此春巒好。天台與鴈台。不奈遊人騁。何如此諸峰。倒立出煙表。林寒蒼髮蔓。泉紳拖樹杪。謝屐不敢辱。神秀毓清老。天女露雄奸。下與人世杳。儘作正面看。嗟嘆殊又了。舟過尙回頭。雲中從縹緲。

胸有十二峰。不得安朝寢。披衣問船人。未暇理襟袵。其峰曾過未。急出露厥頂。芙蓉剛打頭。豁此昏眸爛。平生孰奇峭。值茲有天幸。况復新雨餘。刻飾曉粧靚。煙鬢任人看。向背各自領。一峰正詫奇。相失在轉瞬。一峰矜秀娟。梢頭但露影。想當風霧濃。半面徒延頸。蜂與峰爭妍。離立同邢尹。船尾更揚頰。空帳如雲鬢。



遙天峽口入。遠峰同孤迥。微茫帶殘雪。片雲亦清冷。風當定處閒。天從長去永。前行歷險灘。神致詔不定。過眼耽奇關。肝愁有怪猛。帛以尺五天。天縮入胸窞。偈以挂畫峰。峰倒入水併。何如天外天。悠然見山影。吟懷一以佳。心顏舒聳緊。

題畫扇

山外露遠天。山脚帶平麓。虛煙淡若無。寒雲宿古木。野色辨微茫。叢薄倚蒼鬱。孤村不見人。深林有茅屋。

崢嶸洲阻風歌

四山盡失如山浪。竟日鄰舟相擊撞。渡頭江岸集渡人。亭午無光日不放。兩岸不復辨馬牛。蘆洲一抹皆西向。渡聲拍岸來薄人。排激危沙猶逆上。渚昏沙起鳥飛還。江豚起拜驚折檣。劉毅英風想此時。破走桓元真豪宕。

秋晚自秦淮河欲抵白下因風雨所阻泊古渡

宿程望尚遠。雙槳到難憑。夜雨孤蓬客。秋鐘古寺僧。村喧爭渡口。星點過江燈。此夕秦淮水。隨風上秣陵。

紀事

使相籌邊靖廟謨。人歌來暮望柔逋。戰逾二八春秋戍。用至東南十萬夫。馬向桃關隨撤轡。兵登鐵嶺遞相扶。本朝王化通烏海。塞勒奔西早獻俘。

青城雜詩

關風伏雨赴青城。洞裏琳宮少送迎。隔斷乾坤支杖影。宕搖日月入鐘聲。六時巖畔聽殘漏。三素雲中謁上清。五月騎驢遊太華。不知來訪范長生。

昭君怨

妾向單于去。君王勿苦思。能作安邊計。勝在漢宮時。

夜泊

沙虛鴈影移。月明蘆花朗。時有打魚人。孤舟聞蕩槳。

李其昌

其昌字敬伯。成都人。乾隆壬戌進士。官至南籠府知府。著有漣溪詩鈔。敬伯工於制藝。刊行甚多。之今士夫鮮有談及者。集中纖巧體過多。如過七盤關。云山割亂雲。分蜀地寒斜。屏面帶秦風。割字斜字。元人陋習矣。恐傷雅道。故不錄。

秋夕登滕王閣


來步子安後。高登第一樓。殘霞依鶯起。片月湧鯨流。南浦人何遠。西山爽未收。誰將長笛倚。平寄一聲秋。

顧汝修

汝修字息存。華陽人。乾隆壬戌進士。改庶吉士。授編修。官至大理寺正卿。加一品服。冊封安南。息存氣宇巖巖。喜獎士類。官大理時。余甫得登中書。曾一見之。平生詩工。于應制。有賦得雲在意。俱遲。試帖一首。館閣爭先。傳誦今從。先大夫所編鴻案珠園集中。錄出壽歌一篇。蓋祝余祖父母詩也。息存與人濫作賀詞。可比此。還凡壽詩。俱概從刪。汰而獨登。公此作以紀實也。

祝李太封翁趙太夫人七袞雙壽歌

金山之嶺多靈異。芙蓉之溪饒薜荔。何人依山飲溪水。至今往往多仙氣。吾蜀李子真猶龍。執鞭曾記隨南宮。娛親膝下復十載。承命捧檄雨勾東。昨者掛冠返錦里。紆道海疆出蘭涖。青油橫棹邇花封。鸞鳳聲名殊聒耳。豈知仙吏關尹同。仙李蟠根卽乃翁。華陽之山有人至。公與仙姥俱方瞳。先時絳縣逢雙壽。吾蜀士夫如某某。鼠鬚斑管碧苔牋。侈頌南山酌盈斗。壺中歲月自長春。且看滄海會揚塵。蓬萊何必海島外。羅江又屆弧懸辰。萬人歌舞當衢路。仁侯燕喜美無度。盛事傳聞到十洲。願與抽揚翰林賦。吾聞青城太古初。居人壽考二百餘。今其庶幾一觀止。聖世淳樸同黃虞。又嘗聞之陰騭言。活人盈萬福遐綿。約計姚江被災戶。不下十萬皆生全。治行卓爲天下冠。併入我翁壽無筭。金山投老待歸來。刀圭乞取蓉江畔。



蜀雅卷十八

李化楠受業唐樂字填諱

化楠字廷節號讓齋羅江人乾隆壬戌進士官至順天府北路同知保舉知府著有石亭詩集石  
先生性豪善飲與人交坦率無町畦尤喜獎借士類丙子浙闈有本房所薦士柴子邦直惜其未  
售且孤苦播至蜀為置田宅入籍于羅後舉乙酉川榜人或尤之氣珠光不願也其愛才如此而蜀  
西從遊者亦以百計樂年成都雜詩云秋水文章入韓蘇蘇獨紹東坡追慕三十餘年凡酒醕  
友途命長君雨村訂交其成都雜詩云秋水文章入韓蘇蘇獨紹東坡追慕三十餘年凡酒醕  
向他人更問津意蓋指樂仲兄滄東也先生詩出入韓蘇蘇獨紹東坡追慕三十餘年凡酒醕  
耳熱必為人談蘇長篇斷句暗誦不遺故詩云心印遠從玉局傳又云韓蘇千古入隻字有深義  
乃自道也兩村銓部選蜀雅畢樂為舉先生石亭稿十登一聊以識  
全豹之一斑其立品治行則見侍讀吳諱省欽本傳不贊唐樂字識

七月二十七日自南村起行至德陽縣途中作

多病憚遠征出門欲何適世事暗相催人生會有役月黑曉光遲雨過寒氣慄荒徑細欲無疎林翠頻滴  
無人指行路但覓牛羊跡稍行漸平曠茅屋倚山壁高田種豆苗低田藝黍稷乍見貧者富萬顆堆玉粒  
東蕞散不收一一如人立瀟水清可飲綿江淺可涉鹿頭山亭亭可望不可即過此盡平川乾坤忽開闢  
青天浩漫漫遠樹紛歷歷晦明極變態煙雲為漱滌茲遊良不虛耳目一快愜日暮到城下作詩弔秦宓  
如村莊  
畫圖

田家雜興四首

蜀雅卷十八

四月麥已熟。堆積在平場。幸逢天氣晴。人牛相併忙。碌碡千百轉。磨礱去針芒。杈却場頭草。掀簸趁風揚。內包白雪團。外浮紅玉光。四時受氣足。一輶喜初嘗。譔笑對妻子。茲日爾其康。春禾旣得收。秋田亦須耨。青青北阪糜。淺淺南山豆。嘉種雖已植。惡草亦隨茂。君子與小人。強弱互競鬪。要令惡者除。嘉者乃獨秀。我聞朱虛侯。立苗欲疏透。非種必當鋤。茲理可細究。有田斯爲農。無田則爲傭。清晨披衣起。百十立市中。人家要皆去。早晚值不同。鋤禾百草死。刈麥疾如風。亭午饋食來。雜坐無西東。兩手快一噉。頃刻盤盞空。日暮各散歸。來朝還相逢。力作計雖微。亦有八口供。蓋藏如山積。盡屬主人公。算日霑升合。聊以救饑窮。歲入旣饒裕。秋來風氣清。老翁幸健強。倚杖笑盈盈。念我諸親友。春來各有營。農事日夜忙。不得相合并。焉能久不顧。庶往致其情。蹇驢當風嘶。烏雀樹間鳴。主人驚客至。嘻笑出相迎。入門無他語。先問麥收成。語罷出酒漿。盤饌羅縱橫。兒童驚挽鬢。杯盡輒復傾。出門已酩酊。歸路踏月明。

孤兒行

孤兒早起行採薪。手皴足凍鼻酸辛。上山多狼虎。下山多惡狗。孤兒了不畏。但畏家中兄與嫂。浩浩風雪。枯葉蕭騷。一束不成悲且號。腹中饑餓身上單。雖有捶楚安得逃。但免腹中饑餓身上單。雖有捶楚安得

逃。末重一語尤妙。

烏棲曲

香滿空庭月初出。啞啞啼鳥傍簷宿。閑窗玉指自調絃。墮淚無聲起剪燭。長檣大扁遊何處。丁寧莫向倡樓去。願君心似船頭纜。有時繫向儂家住。七子不能遺其隻字。

### 種田戶

種田戶業良苦。叱犢扶犁耕瘠土。春忙力盡幾支柱。又屈陽驕天不雨。艱難幸得值有年。安冀倉箱益萬千。烹羔酌醴招鄰里。解囊糶穀輸官錢。官錢不欠儂心樂。免教催科受敲撲。那知事情多變態。正供雖完官事在。東家犯罪我爲隣。西家爭訟我中人。爲中爲鄰累無已。差傳票喚何能噴。一到官署遲未理。門前守候動經旬。官坐高衙方飲醇。司關如虎寧堪親。一腔憤懣向誰訴。不敢言兮焉敢怒。旅店晨昏度淒涼。回首田園春已暮。春深未得勤耕作。眼見蒿來田卒汗。又況吾姚訟師胸有矛。頃刻海市與蜃樓。一言不合休不得。非控搶奪卽控偷。何曾交手已啾啾。流血號呼拳碎頭。筆端造次奔魍魎。清白良民受冤枉。籤拿鎖繫陷法網。由渠玩弄從股掌。今歲不結又來歲。彼爲大海我精衛。尾閭不洩尙茫茫。啣填力竭且垂斃。新穀未登場。剝肉聊醫瘡。妻孥淚暗傷。不是年歲荒。傷哉貧至此。噫嘻憊甚矣。安得賢侯視我如赤子。事事入人心。曲裏聽爾言。爾勿哀。我亦身自力。田來固知不剪稂。莠良苗災。連下二首。絕似香山新樂府。

### 欠糧民

欠糧民。縣差促來催比頻。一一喝令伏塔下。但見衣襟露肘皮肉龜。或老或少相扶拽。堂上長官詢緣因。去年糜下今幾月。粒米無輸何逡巡。糧從田出須人力。豈或遊蕩荒隰畛。三時有秋九穀舉。眼見紅腐倉

倉陳別戶完納皆最早。獨爾拖欠真可嘆。縣官呵咄言未絕。中有老翁向前說。長官可容聲訴乎。題起源頭淚嗚咽。田必有糧何容諱。我糧雖有田則未。無田因何由。老翁再叩頭。田在元明間。曾有祖產傍海陬。當年頗稱膏腴地。歲歲每有千箱收。爲苦潮汝不時至。年深久刷成沙洲。至今已作鰈鱗窟。荒荒一片泥淤浮。後世無田那餬口。爲人作傭乞升斗。少壯猶能力經營。今已衰疲成老叟。朝不保夕何待問。國賦無逃甘守分。既無稱貸家。又無可典糶。事已至此其奈何。敢忘父母諄諄訓。我聞此言心爲悲。撫之不暇安忍答。爲民請命牧民事。今無此例空垂洩。薄俸不足起衆疾。何以對我老疾黎。他日上官行部至。告之亦復無所施。豈真無所施。莫似春陵但吟詩。

題伏虎寺僧畫虎歌

林深月黑初出走。掉尾草間自抖擻。松聲颯颯斑奴來。空山無人一回首。夜聞咆哮驚雷電。頭爲震搖股爲戰。明朝寫向屏幃間。恍惚重岡陰雲變。知君前生善覺師。大空小空旁繞之。想其下筆身作虎。正當寅日風生時。嗟爾稱爲百獸長。真氣自可逐魍魎。莫學江乙客王門。謬將威柄假狐黨。有鼠格論

洛陽行

君不見金谷園中草木春。一朝委葉化灰塵。又不見北邙山上塚高凸。年久穿作狐兔窟。榮華富貴安在哉。茫茫萬古一骸骨。世間那得有長生。要於死後留其名。香山老人真達者。廿年樂道林泉下。同時並開綠野堂。後賢亦有耆英社。清風明月不費錢。酒旗詩鼓自年年。煙雲澹鷓開中味。紅紫芳菲醉裏天。人生



萬事不自保。歲月消磨人易老。功名不恨得來遲。富貴應須退身早。

我所思兮三章章八句

我所思兮北堂親。顏衰齒暮髮如銀。遊子天涯不相見。長路漫漫暗沙塵。迷離塞草淒復碧。夢裏不知身是客。魂魄飛去暗相依。醒來仍自關山隔。

我所思兮連理枝。同心同氣友兼師。自從分手綿州路。三年不見來何遲。蜀道迢迢幾千里。人事蹉跎日月駛。兩弟近來復何如。老兄於今真老矣。

我所思兮祠堂側。異卉名花經手植。池塘春水綠生漪。竹外柳絲翠如織。林泉佳氣日氤氳。喬木陰森挂夕曛。主人到老不歸去。負却溪山一片雲。似大蘇

東門

步出東門去。行行復向西。水深江面闊。雲重嶺腰低。僧寺遊將遍。林煙望欲迷。枝頭逢好鳥。相與盡情啼。

道輿

啓戶山長在。無心地轉幽。晚煙迷石徑。飛雨過江樓。往事思如夢。浮名念早休。東籬黃菊滿。不醉亦風流。

同羅維陽吳冲山及六弟鳳來夜坐

共是他鄉客。飄搖任轉蓬。夜驚迴谷雨。春捲落花風。細路連村黑。衰顏得酒紅。幽居何所事。長嘯碧天空。

龍門關寄懷新明府菴溪關路菴溪所開

崇關高百尺。登眺得遐觀。塞石連雲抱。邊山帶雪攢。危岩防馬蹶。細路等蛇蟠。鍵戶憑天險。營城拓地寬。前朝嚴戍守。昭代樂清安。鷄犬兒童放。牛羊婦女看。濛濛煙在樹。淪淪霧平巒。聞昔多頑獷。何年費剗剜。羊腸忽開闢。鳥道失艱難。鬼斧心甘伏。神工胆亦寒。扛來千萬力。步去再三嘆。憶昨筵初秩。于今醉尙殘。一官容我懶。兩日盡君歡。回首龍門遠。相思廢晚餐。

謁龐靖侯祠

夾道陰森漢代松。靖侯祠墓白雲封。功開西蜀人誰識。名冠南州士所宗。不改蒼山長鬱鬱。依然綠樹自重重。漫言落鳳難消恨。明月相歡有臥龍。祠內並祀諸葛武侯。

餘姚署中偶作

爲民父母本無難。無擾方能境內安。德化鳴梟皆赤子。政除猛虎卽清官。城樓每爲聽潮上。邨寺多因驗地看。了却簿書無一事。訟庭袖手看盆蘭。

恤囚吟

一入圍扉絕可憐。求生何計死徒然。諒難三宥全開網。空有千愁孰與懸。吏卒無情呼黑獄。妻孥有淚滴黃泉。傷心久罷團圓夢。況是饑寒疾病連。

切骨嚴刑痛莫支。況逢暑濕並蒸時。言多不盡憑誰說。病到垂危只自知。獄繫十年灰已死。冤成一字案終疑。可憐此際須詳慎。頭上青天那可欺。纏綿悱惻讀之令人淚墮。

伊陽早發

夜半秋風送馬蹄。穿岩度嶺怯衝泥。孤村石徑環山谷。小市人家隔水溪。豈有盤飧供白酒。依然豆粥雜黃鷄。鄉關此去無多路。回首雲山西復西。

別密雲縣

百里檀州白水濱。二年魚鳥識幽人。徘徊尚有登臨興。轉變聊隨夢幻身。落日孤村牛背笛。山橋野店馬蹄塵。寄言鄒子休吹律。寒谷於今遍是春。

太白故居

在青蓮鄉。去漢波渡二里許。

騎鯨人去跡猶留。冷淡村煙弔李侯。奴視權閹真有骨。詩非老杜竟無儔。秋風落日漫波渡。夜雨荒原粉竹樓。太白星精長不死。龍門俎豆肅千秋。漢波渡上舊有太白祠。今為龍門書院。

遊劉敬躋園二首

並序

敬躋先人字亮。字烈。字城。崇正時。並為顯官。園其故居也。連日飲酒。索予作詩。

先朝閱閱舊家聲。別館閒亭幾歲更。千古功名付杯酒。一時勝敗落棋枰。近山綠水依然在。戲水紅鱗特地明。僻性自來耽野趣。名園佳賞慰平生。

傍舍橫斜一逕開。芒鞋小步踏殘灰。將軍蟻蝨生刀後。俗子蜉蝣撼樹來。日月無情春色老。乾坤有憾夕陽頽。主人為說山茶好。待我高秋竟種栽。敬躋出先人詩集見示。率為人改竄。故云。

廣元山中見梅花寄贈劍州廣文何玉書

噴鼻寒香處處聞。窮山絕嶺有餘芬。江南春色憑誰寄。劍北幽光與子分。冷雀啄殘千樹雪。高人衣惹一溪雲。遙知何遜詩成後。索笑巡簷已半醺。

沙嶺阻雨

無端小驛滯行裝。好雨留人六月涼。濃抹山雲橫紫塞。亂流野水瀉紅塘。瀉名在團安界內長四十里年豐信有千家喜。河廣難將一葦航。小酌三盃閒眺望。四圍煙樹晚蒼蒼。

月夜由宣府至懷安道上作

馬首東西若轉蓬。夜深人靜思何窮。天光澹蕩消殘暑。樹色霏微倚大空。沙草螢輝風定後。山莊犬吠月明中。自慚不是乘槎客。路斷銀河莫可通。又似晚唐佳作

過馮家林舊日讀書處追悼趙志遠師有感

風流儒雅是吾師。立雪難忘問字時。杵臼程嬰都不見。誰憐趙氏只孤兒。

蜀雅卷十九

晏 昭

昭字玉齋富順人乾隆戊辰進士庶吉士官檢討

哭鄂太傅

不奉芳型已八年神勞樞府為心懸騎箕忽報成今古調鼎何人更後先聞道龍顏親問疾可曾鳳閣預籌賢衡茅雖自甘終老猶為蒼生一泫然

何明禮

明禮字希顏號愚廬崇慶人乾隆己卯解元著有斯邁草心謂集愚廬正集續集愚廬少遊宜興古文之法其才博而肆蜀中文獻半貯腹笥當代巨公多就焉潦倒場屋三十餘年已卯始與余同舉於鄉年已五旬餘矣每執弟子禮事之而愚廬引為忘年交相得歡甚庚辰北上試卷已擬高魁矣旋因小講用十二轉字太奇遂落第從此遍齊梁歷燕趙益以詩酒自娛再上公車終不遇客於山左禹城周令趙亭署中病卒臨卒猶作詩謝主不吝君老手齊巖城雷轟日送迎甫吟二句即瞑目猶免頭項赤勇因不遂萊山島不似人問也余詩亦以陵既而曼情况之

南天門

每為人誦之

遊仙擊劍之學嘗有調鼎圖一卷屬余題大率蓬萊山島不似人問也余詩亦以陵既而曼情况之

蜀雅 卷十九

盤道扶雲上。霧捲天門開。飄飄出世界。洒洒罡風來。松聲搖萬壑。鱗鬣掣奔雷。神森骨珊珊。詎宕煙霞堆。懸知天帝近。星漢共昭回。我欲躡天宮。寒芒摘斗魁。燦爛雲錦裳。天孫爲我裁。隻手扶瑤闕。長嘯金銀臺。肯學岩棲子。鑿石倚山隈。

乾坤亭

長子乘乾闢天門。手握靈樞定乾坤。兩儀交泰初細縷。渾淪元氣此中存。日居月諸東西軒。丈人天柱作籬藩。知水仁山序弟昆。邱陵拱衛列兒孫。二十八宿手可捫。峭壁巉岩虎豹蹲。飛泉千尺浪雷奔。觸石膚寸湧雲根。龍峪開闔相吐吞。綠霧蒼煙迷朝昏。天鷄叫破扶桑暎。蒼茫俯視萬家村。濟深汶泗帶一痕。千山蟻聚與蜂屯。松濤颯颯風雨翻。蒼龍捧駕丹鳳騫。花閒草軟鳥不喧。採藥何須問桃源。手携姪女過南園。鑿開石釜調羹殮。整理絲綸釣修鯨。飽飫沆瀣養丹元。仰天坦臥舒心魂。栩栩一夢謁天關。蹀躞忽聞響腳根。諸君何來入吾禪。

題盧伴樵百鴈圖

伴樵盧子書畫癖。三年偃蹇吟床簟。病臥還乞山水靈。陡起揮毫憑左擘。豪氣不因困頓消。酣醉淋漓興猶昔。爲余寫鴈生機騰。屈指計之數盈百。一部十七此中尋。尺幅未覺乾坤窄。天際冥冥作者七。亮公廿二風雲赫。漸達初上羽爲儀。寶塔題名永留跡。元愷未登勢盤旋。衍衍十亂尊盤石。回首西山毛羽摧。黃農已歿將安適。瀛洲競進聘才華。竹林竹溪煙水碧。偕老誰誰致足樂。伯仲叔季序絡繹。我得此圖印胸臆。

中。高天大地形無役。詩內俱附會百字  
典故雖巧而不露

觀仲松嵐明府蜀征日記爲作長歌

捫井絡。上青天。古來名臣國士半入川。文翁高。跌關石室。千秋學舍此其先。袴襦叔度愁來暮。叱馭王尊  
欣着懷。濂洛風行開道脈。篋叟警叟發真筌。琴鶴冰心照江水。懷柔遠略時籌邊。勳名爛熳垂青史。更有  
鴻章佳詠付鸞牋。集記古今昭風土。方物益部揚芳鮮。他如石湖入蜀前後皆有記。放翁遊記復連篇。漁  
洋當代推宗工。驛程兩度手爲編。竊恠造物區區誠何意。故遣高人奇士登山涉石勞。臍胼嗚呼噫嘻吾  
知之。天私我蜀豈云偏。借蜀山水抒靈蘊。雅調好翻蜀國絃。清名惠政作符節。長江峻嶺亦良緣。松嵐明  
府今才子。高文典冊嬾前賢。大江南北齊頰首。瑤材杏苑難比肩。競看威鳳翔瀛島。倏覩雙鳧振翩翮。四  
月離燕薊。五月度秦阡。懷人弔古飛逸興。奚囊麗句壓錦韉。中原片楮收拾盡。東都西京嘲磨研。烏道羊  
腸經絕壑。虬龍虎豹躡層巔。北棧南棧中間相距一千四百有餘里。沐雨櫛風帶雲穿。朝攀天梯暮摘星。  
躔蛇虬擁道。蛟螭騰淵。寒花草藉。老樹藤纏。山城鬼嘯。野市虎眠。時起時伏。乍却乍前。柴關槎枒劍關削。  
鷄頭倒挂牛頭懸。僕隸喘汗頻欷歔。驢騾仆蹶苦連遭。起視明府何所事。豪吟正自握丹鉛。邑乘輿誌誰  
能究。一一都從胸中筆底吐。雲煙峻如峭壁奇。峯當面起。婉如平岡漫坡相曼延。快如金鞍駿馬馳平坂。  
清如飛瀑寒流漱石淨。涓涓竹韻松濤鳴天籟。荒林午夜聽啼鶯。蘇海韓潮入林同把臂。瘦鳥寒郊那爭  
妍。陂盡平來梓潼。撫琴縱轡過沃野。塵襟灑灑骨僊仙。浣花江頭裁新錦。平雲亭下問桑田。五斗雖貧八

斗富漁獵百代歸陶甄。訟庭花落園草長。泮林飛躍皆魚鳶。嗟余淺陋僻井底。文淵學海謬尋沿。幾載杖策入京里。三春花飛零華顛。齊韓楚趙曾遊遍。馬煩車殆旅魂牽。亦自客夏發齊水。險阻踰越道里千。東岳西嶽猶在目。名區勝概景儼然。却恨秦莽橫胸臆。囊筆何能志夷堅。捧讀日征記。還疑重往還。官柳依依草芊芊。華峯又放玉井蓮。其如日近長安遠。坐老名山空自憐。他日青雲驥許附。雖爲執鞭欣慕焉。

入峽

夔門穿一線。怪石插流橫。峯與天關接。舟從地窟行。亂猿昏月色。殘葉冷江聲。神女知何處。時時雲雨生。

斗母宮

山斗原同仰。仙宮可奉真。樓高涵翠靄。殿古隔巒塵。繞砌香花細。當軒鳥語馴。炎天全遠暑。旭日半如春。謠諠祥和集。振振禱祀神。三男初出震。萬彙總生寅。允矣鍾靈秀。于焉降甫申。篤生微不至。陰隲錫凡民。感應寧無據。報施亦有因。保之惟大德。宜爾賴深仁。物候清明日。風雲際會辰。請看廊廟器。都是石麒麟。

新灘

數里濤聲先蕩魄。艤幢一葉浪花翻。船空怕觸蛟龍怒。路轉還逢虎豹蹲。衰草寒煙迷故鬼。懸岩落日老啼猿。前途八九羅雲夢。試把長江一氣吞。

重慶府

城郭生成造化鑄。如林舟楫兩崖邊。江流自古書巴字。山色今朝畫巨然。烟火參差家百萬。波濤下上浪



三千鑼岩月峽誰傳出。要使前賢畏後賢。

寄懷張太史鶴林年兄

司馬文章漾錦波。瑤林平步拂煙蘿。玉爲堂署金爲簡。鶴在雲霄鳳在囚。濁酒知于同酌少。清名正在  
錢多。喪家笑我真如狗。舊謔寧能忘駱駝。

寄懷同年李羹堂

別來詩興近何如。不得羹堂一紙書。內翰文章曾欲試。堂出京時羹堂擬考中書。年翁官職可能除。風清徐孺新書榻。  
月落黃公舊酒爐。嗟我離羣千里外。夢中猶怪汝遷居。京寓去羹堂咫尺朝夕過從。後羹堂移寓而予亦來濟南。夢中猶嘆其遠也。覺而黯然並誌之。

寄懷同年張七石臣

無緣富貴復何疑。命也天乎一聽之。蟻爲泥深頻覓穴。鳩緣性拙又遷枝。三條短蠹同燒夜。半醖浮蛆獨  
酌時。槐舍風清天漸冷。長逢涼月寄遙思。

初夏安化寺同人對雨得初字寄雨村

廿四番風信已疎。天公著意雨徐徐。落花對客三春後。折柳逢人四月初。暖浪乘時添鳳侶。寒烟帶潤上  
蝸居。豐穰儘有農家樂。莫便窮愁嘆著書。

華不注

千古兵戈一笑秋。猶傳跛子逐三周。天然綠翠芙蓉好。不見題詩李白樓。

大明湖

皎皎澄湖接玉京。夜闌銀漢落無聲。最宜雨過秋光後。一片蘆花帶月明。

張 鷟

鷟字鶴林。成都人。乾隆寅辰進士。官至檢討。有鶴林詩。鶴林為吾同年友。其為人冲和澹雅。無論十月。初五日卒於京邸。余既哭之。即索其生平所為詩。編次成卷。詩多做法。東坡拔其尤者。入選其餘。序而授其子。繼以不負良友之託也。嗚呼。子歿。人榮俱亡矣。抄錄一過。輒不禁月落屋梁之感也。

冬夜書懷

弱冠弄丹墨。窮年觀書史。抗志希古人。意不在青紫。蹉跎三十餘。歲月如流水。客路羊腸盤。微名鷄肋似。我生竟何成。中夜汗流泚。

嗟予亦何幸。有弟復有兄。兄本嚴師長。弟亦賢友生。早歲篤歡愛。門戶同支撐。朝歌暮復嘯。貧賤有餘榮。一朝賦遠別。悠悠三載情。何時對床臥。夜聽風雨聲。詩詞古人似弟。則吾弟也。與樂城同一境界。

我昔出門去。兒來牽我衣。老妻背面哭。兒問何時歸。驅車萬里行。遠逐鯤鵬飛。豈屑守蓬戶。兒女徒傷悲。比來三四載。壯志日漸微。號寒恐不免。夢想時依依。寒鷄自悲啼。飢鼠長咬齧。由來羈旅人。孤詠等蝸蝨。

寒宵閉戶坐。火冷燈燼滅。小院寂無人。庭下揖明月。多憂少睡眠。感時念離別。故作繞床行。微吟待明發。情真境真。皆肺腑中流出。設身處地。亦不能到。

癸未臘月居停致梅花水仙二盆詩以賞之

飲酒不求醉。半酣興味長。看花不必多。踈淡含眞香。北地苦霜雪。歲晚花木僵。何人工灌溉。温室回春陽。孤根強盤曲。纖頭時低昂。莫嫌生意少。卽此襲餘芳。

梅花如仙人。水仙如仙女。天然兩仙客。爲我伴羈旅。無風韻自清。有月香更古。夜靜寂無人。獨對二花語。松竹歲寒交。芝蘭同心侶。何當一樽約。共入此室處。全學東坡而得其骨。

秋日小齋觀芮後庫李慰堂作書

有客昂歲來作書。握筆爲我臨黃蘇。松烟蘭屑和染濡。玲瓏筆格紅珊瑚。是時秋爽氣清虛。清風習習來庭除。試旁觀之樂何如。得意豈異蘭亭乎。芮君天機駿有餘。興劇一揮百紙無。烟雲變滅纔須臾。書成滿眼蟠龍魚。恂恂李子眞醇儒。筆勢和緩體自殊。眞書八法合楷模。迥如寒冰在玉壺。意到筆隨法亦俱。世間嚴放徒區區。快馬奔踏蛇綫紆。工拙曾不爭疾徐。嗟我兩手拙於烏。雙鈎妙帖不可摸。偶學弄筆如吹竽。世人不好強自娛。人生技巧爲人奴。好辭工書皆癩瘡。能者不閒拙安居。鐵裏門限何其愚。咄哉二子慎無迂。從我終日飲醍醐。自有眞趣忘形軀。何用臨池苦拘拘。

秋風歌

燕山九月風怒號。千林落木聲蕭蕭。雲霾砂走白日匿。黃葉上舞霜天高。入夜風聲猶不已。撼幃排闥驚客起。布衾多年踏裏穿。似潑寒宵十斛水。我官於京長苦貧。披絮瑟縮體難伸。却念長安十萬戶。歲暮豈

少無衣人朔風起。今天雨雪。手足凍龜。肌膚裂。安得大被覆千家。盡使窮簷生暖熱。即杜工部安得大廈千萬間意也。寫得更

夜

暝色來高樹。簷前鳥鵲歸。雲開孤月上。雨後一螢飛。兒女情空斷。功名願尙違。八年鄉井夢。別久但依稀。  
妙景可想

夢遊

雨餘芳徑草萋萋。花滿閒原柳滿堤。山色遠含新翠黛。湖光近泛碧玻璃。牧人叱犢身先跨。釣侶分魚手自携。最是夕陽留客處。一灣流水小橋西。

生日憶家

驚秋南去鳥茫茫。眺遠徒增歲暮傷。三十吾生一彈指。五千客路九迴腸。朔風漸起衣裳薄。去日難留髮髮蒼。把酒忽思庭際樂。蜀西冀北鎮相望。

元日早朝和李羹堂同年元韵

天階銀箭尙催更。禁苑新鶯向曉鳴。旭日漸升瞻豹尾。和風徐引入鸞聲。芙蓉闕暖雲輕卷。鳩鵲樓高雪倍明。隔仗氤氳香篆裊。笙歌達旦滿重城。

送願息存大廷尉册封安南

平明捧册下青霄。桂郡珠崖道路遙。秋去黃花迎使節。春歸楊柳映征轡。百蠻碑版傳荒服。三殿泥書降聖朝。載得聲靈通萬里。論功應不讓銅標。

宮詞

簫聲隱隱渡銀河。望斷青鸞影未過。遙意離宮三十六。不知何處月明多。力舉

七夕辭

仙橋鶻水接紅雲。夾岸笙歌遠近聞。牛女豈愁銀漢迥。却嫌烏鵲太殷勤。用意

呂林

林字宣茂梓潼人。乾隆壬午舉人。

錦浪桃花詞為張麗天明府作。屬天名風詔宛平時解任將歸

錦江雪浪連天起。片片桃花逐春水。迥首東風別恨多。嬌姿艷態波中委。洛妃鏡裏洗紅粧。天孫河畔濯新綺。擊碎珊瑚翻血濤。剪斷朱霞落寒沚。遊魚追逐吐還吞。桂楫招邀行乍止。宛轉天台歸路遙。為憐灼灼廢之子。宋玉墻東魂欲銷。崔郎門外心應死。海山一放歲三千。不及汀蘭與岸芷。南北飄殘踏作泥。九十風光空負爾。武陵還有問津人。重來為入仙源裏。

燈市

春燈百種媚。雙目不暇給。少年不看燈。回頭却看妾。

周開豐

開豐字駿聲號梅厓巴縣人康熙庚子舉人歷官福建直隸龍巖州州同

畫眉隴

晨露霏微下朝暾隱約明支筇足幽興一路畫眉聲

李其椅

其椅字鳳木號儀甫通江縣人戊午舉人官巴縣教諭

梨塢

朝塢開梨花夜塢照明月花月影交橫杯色同玉白主人醉眼蒙道是陽春雪

吳崑

崑字奇誠號明軒江油拔貢官湖北監利縣

閏月九日晚登龍泉山漫吟

十年泛宅亂蓬蒿忽爲龍山野興豪舊事笑經成畫餅芳晨誰復索題糕僧樓行客沾村釀溪月留人照  
布袍勝會難逢重落帽白雲飄盡首頻搔

# 蜀雅卷二十

流寓

王寡郎

寡郎姓字里爵未詳。彭樂齊蜀名家詩略云：寡郎不知何許人，亦不知其姓氏，自謂不讀書，然喜吟詩，亦時有佳處，為人送文書得錢，則沽酒自吟，莫知其所終。

白帝城

忽見雀飛處，人傳白帝城。山形猶未改，世變幾回更。灑潏何曾險，江流不肯平。興亡千古事，無故客愁生。  
顧息存云：老健。

登成都八角樓

益州吾夢古蘭州，春日頻登八角樓。遙望千山皆不是一層雲，樹一層愁。

彭齡

齡字幼朔，里居未詳。幼朔明末嘗寓蜀之潼川州，自稱鄒長春，常熟人，顧雲鳳為州守，從諸生得其填詞異而物色之，戴高簷帽乘輿以來，守與語，說激多奇，因而稱規之，遂

徒步往還多談容成御女之術，已而去，不知所終。順治初年有人見之登萊山中，僕從車馬甚盛，後不復見。

偶題寺壁

小軒幽寂偶徘徊，落落修篁曲徑開。滿地蒼苔鞋子印，無人知是赤松來。

絕句

崎嶇歷盡入林邱。瀟灑襟懷象外遊。閒向岷山高頂臥。覺來到處是瀛洲。

黃霖

霖不知何許人。年八十餘。僑寓成都。善畫菊。自號菊花老人。

歸農

我愛騎驢婦坐車。兒肩書籍僕挑花。出城未到青羊市。先問橋西賣酒家。

畫蟹

不食霜螯二十年。未曾舉筆口流涎。何時得到江南去。明月蘆花繫釣船。

宿士敏

士敏。夾江人。自號臥雲子。外紀士敏字元魯。獻賊陷蜀。追之。士敏治裝赴會。至千佛岩。從馬投江。馬死。士敏泗水得生。賊見馬浮於江。信其已死也。置不問。士敏遂乘夜逃匿雅州山間。易姓名為臥雲子。終身不出云。

石門

靈峯人不到。雲鑲石門幽。一夜溪頭雨。桃花出洞流。藥香來白鹿。苔軟臥青牛。聞有真師秘。高高不可求。

道宮

絳闕開清壁。丹梯上紫微。松聲泉共落。鳥影葉俱飛。花引樵人入。雲隨道士歸。仙靈未可遇。悵望石巖扉。



上二詩俱有高  
山流水之趣

秋意

溪動螢過水。松涼月在枝。此中無靜者。秋意有誰知。

蔣超

超字虎臣。金壇人。生時其祖母夢峨眉老僧托生。長亦自言夢身是僧。早年成進士。狀元及第。入翰林督學北直。假歸。溯峽遊峨眉。寓伏虎寺。長蔬。一日索筆題詩八句。念佛而逝。

詩偈

脩然猿鶴自相親。老納無端墮孽塵。妄向饒湯來避熱。卻從大海去翻身。功名傀儡場中物。妻子骷髏隊裏人。只有君親無報答。生生常自祝能仁。

張清夜

清夜字子還。別號自牧道人。著有潭東草。全蜀詩話道人先名暉。本長洲諸生。不得志。乃溯江入

武侯祠之西偏。一琴一榻。蕭然自得。年八十餘。乃卒。所著詩古文甚夥。余游武侯祠。見弟子宗繩始獲觀其全集。其道孫徐本衷亦翊冠能詩。有和余見贈絕句云。少年落落志難同。夙夜精勤繼祖風。不受塵寰煙露惹。飛身直入廣寒宮。

登太白嶺

南浦重陽日。登高臨太白。縱觀鐵鳳低。始知滄溟窄。傳言太白仙。於此凌雲煙。蒼茫不可即。遺躅山之巔。

山巔有古井。日照含空影。旁蔭千年松。上閉鍊丹鼎。泠泠响石鐘。廓然聲外逢。我亦欲飛去。青天騎白龍。  
似太白

題張耐觀白猿舞劍山水手卷

斷虹三百丈。化作芙蓉鏢。猿公兩手持。霜雪紛錯落。今日一見君。豪氣猶凌雲。隻身走天涯。雌雄何必云。雙松多勁節。片石餘高潔。凡上有奇書。閑來獨檢閱。箕踞儘悠悠。光涵溪水流。虛空漾白日。慘澹千山秋。

起語高挺

謁北地王祠

皇天不祚漢。王業終西陲。末造挺義烈。矯矯千古儀。一戰再三戰。當爲社稷死。恐貽後世嗤。忍作降天子。降表出世家。折衝無反車。佐命胥反首。文孫獨磨牙。廷諍不可得。廟見心無瑕。霜鋒斷秋情。熱血聊薦馨。高光信難熈。寧復遜桓靈。五行本無常。五倫烏可移。冠履各倒置。胡能一朝羈。吁嗟乎。河山縱失節。不失二十四帝爲解頤。  
結語神氣高渾

蓮花吟

池上仙人嬌欲語。亭亭整袂香如許。綽約凌波踏鏡來。綠雲擁扇空中舉。自是天然淺淡粧。風鬢雨髻佩霞裳。不枝不蔓非凡質。怪殺當年比六郎。卻憶西嶽蓮花頂。頂上一潭名玉井。其中有藕卻如船。花開十丈擎空影。何日移根種此間。金莖承露玉爲盤。孤芳不染人間色。雖垢真同世外看。我來別喜神清靜。晶

英向日浴真性。秀映靈淵可悟觀。鳶飛魚躍花涵靜。

廣元舟中

行來雲水合。蘭槳破沙汀。巖際雕千佛。山尖聳一亭。溪流長送碧。岸草漸知青。明日春風至。扶筇入畫屏。

山行

日午山逾靜。行來又幾層。竹鷄啼密樹。松鼠走危籐。倚石憐無力。探奇愧未能。眼前何限意。蒼翠晚煙凝。

流水

不作奔濤勢。惟餘漱石聲。落花應有意。紅葉自多情。人耳心堪洗。無絃調更清。千山明月夜。曲澗小橋橫。

自然流出

春草

東風吹細草。隨意發春泥。原上情何限。天涯人自迷。色憑花瓣襯。嫩與麥苗齊。落日揚鞭外。青青送馬蹄。

蘆花

生成骨格清於竹。瘦影蕭蕭劇可憐。兩岸花明殘月夜。一灘霜皎薄寒天。學書空羨堪爲筆。納被何妨竟作棉。愁絕懷人江水畔。那能長繫釣魚船。

秋日有懷喬太守鐸

錦官別後炎雲盡。秋水懷人獨倚樓。梧葉飛時數點雨。蓼花明處一灘鷗。材非有用能全跡。水本無心自

在流寄語羈栖喬太守脫身莫負五湖遊四語於靜處得之

次答李見山過訪不遇

荷淨清香遠心空白日閒因從採藥去帶得暮雲還

題畫

綠楊三月繫春情落盡桃花春水生一葉扁舟人獨坐滿天風雨過江城

海明

明字懶愚一字破山大竹人住嘉興東塔寺後歸蜀有破山語錄破山姓蹇母徐氏俱亡遂棄妻

從萬丈懸崖墮落而醒一參雪橋再參湛然後參天童密和尚得法雄踞九山名聞四海明詩綜  
詩話張獻忠殺人之多較黃巢百倍自甲申正月犯蜀陷重慶悉斷民右手既破成都僭號大西  
改元大順授其義兒孫可望為平東將軍監北將軍監九營李定國為安西將軍監十六營劉文秀  
為僑撫南將軍監十五營艾能奇為僑定北將軍監二十營次年五月可望報一路殺男子五千  
九百八十八萬九千九百五十餘萬定國報一路殺男子七千九百餘人殺女子八千八百餘萬文秀  
報一路殺男子九千九百六十餘萬定國報一路殺男子八千八百餘萬文秀  
與焉於四百餘萬此外各營分剿川西北所殺之數及獻忠僞御營殺人數目自有簿記蜀則不  
楚則楚盡乃殺共起之秦人後令量之以度不及者皆死駐西充時尚存兵一萬食此三十萬逾兩月  
則則宰割者過半矣相傳破山和尚嘗勸賊帥李止殺賊帥以羊豕進曰和尙食此吾營對刃破  
山遂食之此破山之徒汝雪通醉載之語錄者綏寇紀略謂獻忠往市糈徑前抱公屍而殮述之  
魏叔子文集釋海明傳燕湖僧海明聞故簽事金公被刑乃乞貸往市糈徑前抱公屍而殮述之  
詞阻之不為動卒殮公載歸燕湖僧海明聞故簽事金公被刑乃乞貸往市糈徑前抱公屍而殮述之  
詩何則來人多有旨歸彼獨別開一路如鳳皇自鳴不知宮商如獅子自吼不解聲調當于筆墨行

未施吟哦未吐時。具一隻眼。則知破山和尚詩。並非逆行也。

### 山居卽事

幾年勘破是非關。小結茅茨擬住山。園裡竹鷄晴引子。崖前石虎老生斑。一條心事弓弦直。三個柴頭品字灣。法法拈來皆活句。更餘何事可躋攀。

### 送微言之蜀

竹方床上幾經秋。忽地翻身問話頭。走起欲拈行腳事。草鞋先到楚雲樓。

### 永慶寺

踢倒須彌鏡影空。逢人徒鼓舌尖紅。黃鸝不識吾生意。叫落庭前一樹風。煙帶

### 白兔亭

磊落山川忽地平。雲巢月窟兩關情。於中白兔今何在。只有巖前瀑布聲。

### 示四不侍者

倒騎驢子上揚州。卻似當年跨鶴遊。邵伯湖邊親說與。紅塵飛處莫停舟。

### 寄炎雪禪友

嶺畔桃花相映紅。恍然如醉薜蘿中。通身長出參天棘。刺殺山頭瞌睡翁。

### 通發

通發字師遠內江人有山居草

再過永慶寺

山涌孤城外舟行一水前落花柔櫓撥斜日斷橋連  
丈室依林住雙扉倚竹偏再來情不厭知是主人賢

丁用

丁用姓張字雪機遂寧人

舊志雪機少善應教偶聞人言遂感悟靜坐數年深有所得印證於天淵和尚年七十二卒卒時彩雲繞寺人異之

山居

傍樹修庵倚翠岑煙霞繚繞白雲深愚痴自合棲泉壑潦倒何妨論古今  
怪石溪邊無過客浮嵐巖下有鳴禽始因人道藏幽谷截斷攀援更莫尋

行密

密字澹竹義眉山僧

寄義眉開達

層巒碧落萬年煙紅蓼江頭橘露滋寒雁一聲頻寄語茄瓢箬笠枕雲眠

通醉

醉字丈雪義眉山僧

臥雲菴

七重天末號峩眉。樹裏老僧下榻遲。八十四盤行欲盡。青山湧出象王兒。

性一

一字貫之。健爲人。峩眉山僧。少于觀音寺三濟和尚出家。與其徒建伏虎寺。

宋玉洞

石洞陰森渾沌開。天然雲物自崔巍。分明鐵壁銀山老。誰湧瓊樓玉殿來。谿畔猿來攜子去。門前鶴喚引雛回。丹爐萬古遺僊跡。惆悵荒煙動客杯。

行喜

喜字雲峩。峩眉山僧。

送印光禪師禮峩

正值春和柳眼開。折來相餞當茶杯。草鞋得到最高處。攜取峩眉山月回。

永宣

宣字化機。峩眉山僧。

山居

九日柴門雨亂飛。禪心無住客來稀。西風不管黃花夢。林鳥山雲各自歸。

牛心寺遊雨

幽徑荒苔寂。千章古木橫。雲來迷洞口。雨過濕流鶯。殿僻涼生遠。谿深霧到輕。松陰聊對座。返照起新晴。

兩山

山字荆門。峩眉山僧。

四會亭

雲近天垂一鑑空。天邊春擁梵王宮。山桃花上輕含雨。烟柳枝頭軟帶風。錦繡妝屏鋪殿北。笙簧吟鳥過樓東。旭晴細向臺端望。不是山中是畫中。

海源

源字可問。峩眉山僧。

峩眉早春

菲廬情淨只幽巡。日對晴巒數點新。疎壁嘗留穿牖月。垂楊偏送隔牆春。止居不過三間屋。坦率惟捐一點塵。慚愧谿山無箇事。虛牕高臥一閒人。

別鄉友

多年未覩南來雁。影落峩眉下翠微。三笑虎谿留不住。乘風又望海天飛。

元温

温字瓊日。峩眉山僧。



登義

不到崇高處。安知壁岫懸。路頽山霧接。橋斷野雲連。秀目青松柏。清心冷澗泉。半輪秋夜月。千古照巴川。

照裕

裕字與義。義眉山僧。

義嶺秋

萬籟吟風紅樹顛。杖藜閒步洞山前。疎林過鳥知寒露。古木留蟬噪暮烟。寂寞泉聲依玉峽。蕭條梵宇長金蓮。曉鐘何事朝來急。敲落晨星散碧天。

福岳

岳字禪明。義眉山僧。

白水寺

勝遊山寺古。幽賞出奇蹤。石磴穿雲細。松梢帶雨濃。漱心臨白水。寫意坐青峯。問道何年闕。殷勤說惠宗。

元英

英字肖白。義眉山僧。

山居次韻

抱拙林泉下。安貧任意閒。無絃琴易操。有韻句難刪。雨過雲初曉。風回戶自關。故人何處見。梁月轉青山。

覺和

和字屢生。峩眉山僧。

懷表

謁罷峩眉嶺。常懷第一峯。臺高常見月。山靜獨聞鐘。古雪搖瓊蝶。飛泉掛玉龍。何時重躡屐。散步倚雲松。

馮氏

氏。叩人。劉睽度室。王漁洋隴蜀餘聞。劉道貞字墨仙。叩人名士也。明末起兵討張獻忠不克。病卒於軍。妻子皆遇害。其子睽度妻馮氏。詩甚清婉。有春日即事云。

春日即事

閑步小橋東。黃鶯處處逢。梨花風雨後。人在綠楊中。凄婉欲絕。

馬士騏

士騏字韞雪。晉城人。張應垣室。從沈歸愚別裁錄入。

齊雲樓

凭闌天際盪心胸。一片雲飛接岱宗。縹緲層檐疑結屐。寂寥臥榻笑元龍。自傳家學三千衆。誰數仙居十二重。爲問芙蓉樓上客。何如東海表齊封。

楊雪娥

雪娥彰明女子。

雪

乾坤一夕地同天。白日無端影倒懸。人愛落花夸六出。我憎飛絮又三年。銀裝裊裊輝簾外。玉屑霏霏繞座前。酌酒深閨無別祝。先為聖德兆豐年。

高氏

氏華陽人。提督四川威信公岳鍾琪之妻。封一品夫人。夫人能網弓馬。善理軍政。威信公每出征。戰中內外莫不肅然待。人以寬亦能詩。

常與公唱和其歿也。公哭之詩云。五載西曹我困危。長安寄食賴謀為。全家幸得歸田里。相守翻成永別離。一字如金愛惜之。卻因相敬故如斯。從今永閣閨中筆。自此無人解和詩。鬢增白髮面增癯。行亦無雙坐亦孤。仍向合歡床上臥。入簾涼月照鰥夫。

雨中看芙蓉花

芙蓉花面艷粧新。細雨微風洗庾塵。有淚卻同湘女恨。無言寧有息嬌嗔。遙思洛水凌波襪。想像華清出浴人。相對莫愁秋寂寞。一生顏色不傷春。立品高潔

和芙蓉花韵

深淺芳心濃淡容。寧甘肅瑟對西風。拒霜縞袂嬌還怯。映日胭脂暖欲融。冷頰曉凝秋露白。醉顏潮暈夕陽紅。錦城萬里芙蓉月。勾引鄉魂入夢中。

新月

一痕印破碧天秋。半面修眉婉轉浮。疑是廣寒猶閉戶。珠簾不挂側金鈎。

咏蕉

寒蕉雨浸碧粉紵。似浣湘江六幅裙。夢覺午晴回枕看。梳風擘絮一窗雲。

咏畫中美人

鏡中窺影喜如真。誰信豪端幻出身。一捻胭脂污玉頰。卻疑曾佩守宮人。

巫雲

巫雲姓韓氏。華陽人。為蜀中名妓之冠。巫雲善歌舞。名重一時。後竟出家為尼。臨去有留別人詩云。散盡金釵不列行。漫歌其雨怨朝陽。從今了却前生債。

花自烘然水自涼。又云。漫化巫山入夢雲。向人重著海榴裙。年來杜牧風流減。撲被無香夜不熏。蓋巫雲時亦老矣。

鈴兒草

衆芳燦爛獨青青。賺得明皇仔細聽。寄語流鶯今日去。春風繫遍護花鈴。

白鶴翎

漫道秋來花事稀。看他皎皎玉為衣。風寒月淡空庭靜。鶴立東籬勢欲飛。

萬氏

萬氏成都人。李雨村妾。氏秉性幽貞。關於吟咏。辛卯之七夕。始歸於余。僅粧之日。曾有贈詩十首。是年冬從余來京師。相得歡甚。燈前花下。無刻分離。癸巳四月初六日。以

產第四女得惡露疾而終。余一慟幾絕。望於石芝菴。尚記其遺詩一首。

暮春遣悶

春花度盡百花顛。燕老鶯愁晝欲眠。敗絮因風還自舞。落紅無主更誰憐。雲疎夾透斜陽影。樹密低烘晚照烟。底事浮沉皆夢幻。等閒覷破卽神仙。四語似謔。

趙昱降筆

昱青城人。隋煬帝時爲嘉州太守。入水斬蛟。以除民患。後入山得道。遂不見。唐太宗時。有見昱乘白馬引白犬。腰弓挾彈。以從。遂奏上封爲神勇大將軍。廟祀灌口。明皇進封赤城王。宋張詠治蜀。禱祠得神助。事聞封川主清源道妙眞君。今蜀人多祀之。有巫者降神。大書於灰盤云。

煬帝宮前草。秋來不復青。苑中螢百萬。散作雨餘星。

龔完敬鬼

完敬字潛石。彭縣人。崇正丁丑進士。官臨安府推官。順治末年。有土子客成都。旅舍與友人聯吟。忽聞舍旁芭蕉下有聲。覓之不見。重挑燈開。龔完敬也。明日使人迹之。但見瓦礫煙草而已。遂以其土封之爲尙書墓。

蕪城歌

暗拋紅豆淚盈把。委佩當年悲艷冶。一坏黃土玉鈎斜。切莫燒作鴛鴦瓦。西河集。獻忠破蜀。完敬受僞戶。赴省考選。至日午。忽下令盡殺之。完敬伏地不能起。以爲慢令也。並遇害。見後鑿錄。

青羊宮吟一首

青羊宮。獻忠殺。應試舉子三千人於此。蜀平後。有道人偶夜遊。見古柏下有二人攜手聯吟曰。只須飲醇酒。不用讀離騷。一誰是真名士。千秋恨未消。人

槍鏡二首

內江士人讀書崇天寺僧房。一夜聞後園有人吟詩。聲甚清越。士人潛聽之。遂錄其詩。明日邀僧人至其地。了無蹤迹。掘地二尺。得槍一鏡。一後遂寂然。

槍吟

攢竹黍苗直。鑊銀柳葉銛。百交鋒不滅。所刺甲無堅。霜女飛花亂。神蛇掉尾圓。技成烽燧靖。施巧是何年。

鏡吟

誰將匣裏月。挂向碧雲邊。光映三秋水。清涵五尺天。時時芒自吐。夜夜影長圓。不爾寧埋照。無勞醜女懸。

碑識

迴瀾塔碑識詩

修塔余成龍。拆塔張獻忠。歲逢甲乙丙。此地血流紅。妖氣滿川北。殺氣遍川東。吹簫不用竹。一箭貫當胸。

我朝肅王入蜀。箭斃張獻忠。其言始驗。

諺語

潼川諺

烏為食傷。人為財亡。又。草生一季。人生一世。

綿州諺


藏藏藏。爾西我東。分明瞥見。妝著妝。蟻蝻歌。蜻蜒舞。蝦蟇吹簫。鼉打鼓。

羅江謠

水灌姚家營，羅江出翰林。

蜀雅 卷二十

十一







涉上停雲集

孫星衍編

本館據岱南閣叢  
書本排印初編各  
叢書僅有此本

涉上停雲集卷一

清 阮 元

江蘇儀徵人。已酉翰林。督學府詹事。山東學政。今內閣學士。兼禮部侍郎。浙江學政。

明湖小滄浪亭。荷花盛開。遲孫觀察東來不至。作詩速之時。馬秋藥比部。武虛谷進士。桂未谷廣文。顏運生博士。朱朗齋文學。並在歷下。

濟南亭館傍湖開。湖上西風且漫催。萬朵荷花五名士。一時齊望使君來。

孫星衍 江蘇陽湖人。丁未翰林。山東兗沂曹濟道。

次韻答阮宮詹同年東招即往歷下之什

芙蓉池館報花開。驛騎傳詩一夕催。不為時需訪碑使。元時設此官。也應天與聚星來。

桂馥 山東曲阜人。庚戌進士。候選知縣。

次韻阮學使小滄浪亭懷孫觀察之作

湖裏蓮花四照開。道旁驛騎遞番催。人間天上中秋近。可要乘槎犯斗來。

阮元小滄浪亭雅集詩序云。湖中花事將殘。最後得碧蓮一枝。四朵共蒂。時觀察以車覆傷足。至秋半始由天津汎舟來濟南。未谷詩似豫為兆者。

吳錫麒 浙江錢塘人。乙未翰林。

次阮學使韻送淵如

濟南名士燕頻開。蓮子湖頭信屢催。此去更應清到骨。鵲華秋色馬頭來。

張問陶 四川遂寧人。庚戌翰林。

七月廿九日淵如前輩招飲次韻贈行

花底長筵次第開。恩恩驪唱莫相催。樽前讀畫先搔首。何日明湖載酒來。

伊秉綬 福建寧化人。己酉進士。刑部主事。

次韻送淵如曹長

車騎東都祖帳開。明湖簫管繞城催。一從杜老題詩後。名士皆趨歷下來。

曾傳臚唱五雲開。暫別仙班使節催。相送好拈韓子韻。祝君成政更歸來。

昌黎送鄭尙書之嶺南節度序云。韻皆以來字者。祝君之成政而來歸也。

方體 安徽績谿人。庚戌進士。刑部主事。

題同前

千年伏鄭面重開。時淵如校馬鄭注古文尙書成。湖上名流讌集催。絳帳笙歌休散歇。使君今抱壁書來。

徐嵩 江蘇金匱人。丙午舉人。

題同前

北渚壺觴花底開。鵲華秋色簡書催。二公共有雲山興。我亦思隨李杜來。

周雋 江蘇元和人。丙午舉人。

阮學使孫觀察招同諸名士小滄浪亭雅集。卽次前韻題圖冊四首。

湖上明窗四面開。華鐙客散鼓聲催。春光落後秋花發。前度曾來今又來。  
南湖清削翠屏開。好景恆愁暮色催。我擬遲他蟾魄滿。夜深還棹小舟來。  
名流勝集讌頻開。觥政吟箋次第催。此是伯時真粉本。應教都入畫圖來。  
西湖秋淨鏡奩開。攬勝休憑畫鷁催。策杖試過天竺路。一峯奇絕是飛來。

余鵬年 安徽懷寧人。丙午舉人。

題同前

荷花落盡葦花開。湖上西風鬢上催。不爲故人聯舊雨。凜秋爭肯四回來。  
讀書捫碑生面開。詩成不要鉢頻催。鐵公祠裏吟風葉。送到欄前作雨來。

孫星衍

自歷下之官兗州道中卽事

驄馬紅旌靜不喧。王京回首憶高寒。三齋名士爭投刺。一路青山送到官。使者車單如客過。聖人家近借

書看時清不用矜風節。慚愧儒冠換豸冠。

趙懷玉

江蘇武進人。庚子獻賦中書。

次韻寄淵如觀察

衡門雪後少塵喧。有客書來正歲寒。行部又添新得句。趨庭卻喜乍遷官。桑經注好關心讀。魯國山多放眼看。作宦盡如君快意。爭教人不想彈冠。

韓對

江蘇吳縣人。丁酉拔貢。前廣東高廉道。今刑部主事。

題同前

姓氏天題墨未乾。點烟杯水迴生寒。得觀海處皆奇境。能讀書人是好官。魯國諸生門下列。嶧山傳刻馬頭看。遙知兵衛森嚴地。猶戴戎裝子夏冠。

何啓贊

湖南湘潭人。己卯舉人。前浙江義烏縣知縣。

次韻贈孫觀察

戟門畫角不聞喧。祇覺霜威撲面寒。三鼎甲中真國士。七才人內幾高官。戾天鴻雁攔車過。在野鷹鷂立馬看。周政魯邦欣藉手。定知有客慶彈冠。

周雋

題同前

芝蓋飛飛路折盤。九秋晴色不知寒。樓臺極目連孤嶂。雲鳥依人問紀官。泗上諸侯千騎領。東家車服萬年看。詞臣持節添風雅。夾道爭窺柱後冠。

楊元錫 江蘇陽湖人。

次韻呈舅氏淵如先生

驄馬南來萬姓歡。壺冰比潔玉山寒。四州使節唐觀察。三殿絲綸漢史官。泰岱雲生飛蓋轉。大河秋靜放舟看。六條按俗書千卷。如此清標稱法冠。

孫星衍

乙卯歲小春下旬。隨河帥李薊林先生乘敝舟巡工。涉上是日風寒。歸後蒙惠海龍裘賦謝。

重臣督濬屏前驕。直似乘槎下斗牛。民俗共欣瞻露冕。銜官也許上仙舟。較量碩望三門柱。比例詞源萬里流。好繼謝公傳七埭。年年春水送千艘。謝公七埭。事見水經注。疑今濬莊以此名。埭臺音相近。

戟門披得翠雲歸。似此知音自古稀。什襲未應輕換酒。提攜只覺媿傳衣。重來東閣春風暖。此去南湖朔雪飛。時往南旺湖一帶勘視濬工。遇大雪。一日拜恩逾挾纊。願推公惠到民依。

李奉翰 漢軍正藍旗人。山東河南河道總督。

借淵如觀察會勘濬工詩謝贈裘次韻相答

相攜乘艦代鳴騶。軫念糧儲轉木牛。春水未生思共濟。冬渠待濬幸同舟。經綸有策來名俊。疏淪無奇在暢流。勘後預籌宣洩日。碧波蕩漾送輕艘。  
裘敝何勞麗句歸。相知傾蓋此風稀。老夫媿比和凝愛。御史休嘲晏子衣。射策紅綾非偶錫。疏河白簡尚頻飛。君恩民事同肩荷。萬里香山或可依。

王宗敬 山東濟寧州人 僑買生

恭步孫觀察勘工涉上賦詩呈河帥贈裘二律原韻 卽謝太白酒樓招飲

涉上巡工駐絳驄。時當七曜會牽牛。時將長至錦袍采石同崔月。秋水南池上杜舟。千里河渠沾德潤。四方賢俊仰風流。從茲都水添名士。定湧文瀾送萬艘。

按經治水望羣歸。贈得珍裘遇所稀。兩首新詞酬紫綺。一時名士羨緇衣。延賓高閣清尊倒。祭食仙魂逸興飛。觀察每飲輒以酒肴勸太白象詩酒英豪追李賀。摩娑幢石幸長依。

玉德 滿洲正白旗人 山東巡撫兼提督軍門

嘉慶元年正月勘工東昌孫觀察以其從祖明大宗伯文介公殿試第三人及第策屬題爲賦一律。望陵甲第裕才名。峻潔堪推輔世英。當代文章傳內外。於今筆墨見蓬瀛。疏糾西廠忠貞著。學講東林禮



樂精魏黨陰謀遭貶戍聞斯文介公字偉績邁明卿

孫星衍

呈謝中丞師賜題先文介公殿試策二律次韻

萬言射策撥科名。題品今逢一代英。魯國銜官欣立雪。舊官西曹時公爲舉主蘭陵家學媿登瀛。元戎小駐旌旗肅。

東閣閒情筆硯精。文字倍增風節重。清時大雅屬公卿。

冰壺水鏡比身名。戴斗才華壓國英。愛日再來升岱觀。潤河千里到滄瀛。白雲私幸傳衣久。華袞全憑論

史精好。把驪珠勒圓石。幽光隔代慰邪卿。

周雋

觀有明孫文介公廷試卷敬誌一律

應詔千言擬致君。魯陽戈好日斜曛。政稅已極誰能掃。諫草因多不盡焚。選侍園陵隨逝水。黨人燐骨泣

秋墳。忠肝古誼文山策。展讀當窗手再薰。

孫星衍

斷獄方輿歸涉上道中口占

林臯風景似南徐。霧濕紅旌日上初。雀角未消還廢舍。雪寒何事又隨車。前到臺庄。載抄閱督實財。及巡工南旺。皆值雪澤。關心

荷澤分流水。獨山湖。即古荷澤。著手桑經一卷書。旅食怱怱辭授粲。尙慚肘後露金魚。

周雋

次孫觀察鞠獄南陽鎮元韻

乘驄踏雪往來徐。知是甘棠輟訟初。折獄已持金作鏡。飛花便屬雨隨車。胸無世上難平事。腹有人間未見書。樸學媿教叨共載。豈應同隊說龍魚。

孫星衍

十月十一日巡視曹單河防作

平沙風緊射征裘。近臘冰澌尙急流。兩戒忽分南北亳。一抔須障竟徐州。居民晚歲輸薪束。候吏寒更報水郵。龍節一雙來澤國。可能當食不紆籌。時兼署山東通省運河道。

周雋

和觀察閱視河隄元韻

隄路飛塵暗翠裘。旌干晴色映寒流。千金北盡宣房築。一水中分節度州。日暖畬田收滯穗。波恬鈴館罷傳郵。而今濮鄆皆腴壤。賈策平平漫借籌。

觀察招飲任城太白酒樓作

晴日輕鷺翼畫翰。閒攜賓從試登樓。雲山四面歸憑眺。文酒中宵備獻酬。小築林亭傳許簪。鍾城有許主簿祠。夾河燈火似蘇州。層城不改仙人去。誰把清吟紀勝遊。

楊元錫

太白樓讌集次周曼亭孝廉韻二首呈淵如舅氏

輕風習習轉雙輪。朋酒相從上此樓。明月已隨詞客去。彩毫還與謫仙酬。莫嫌醉眼空千古。直望齊烟識九州。難得使君休暇日。好吟新句誌清遊。  
狂客同來共彩翰。偶瞻遺像一登樓。才人若不分今古。酒盞應教共勸酬。知己千秋懷賀監。上書此日憶荊州。憑闌我竟忘歸去。乘興須當秉燭遊。

陸嗣宣江蘇武進人。

淵如觀察招飲太白酒樓作此奉謝

登樓且莫問青蓮。憑眺風雲喜欲顛。南畝麥苗新得雪。東山橘柚舊含煙。苦吟我媿逢詩伯。縱飲誰能學謫仙。今日主人還愛客。肯教勝事讓當年。

周雋

觀察攝篆運河。巡視漕渠。予與鄭柳田文學偕行。舟中風雪。得律句一首。柳田補圖。

城闔小隊靜芳塵。都水初兼采鶴巡。雙槩溯風當十月。一尊聽雪有三人。畫呵凍墨無心淡。詩戒陳言着意新。候吏莫嫌清簡甚。使君儒雅是天真。

蔣因培

江蘇常熟人。

題孫觀察任城放棹圖

燭影幢幢照水紅。遙看青雀夜乘風。沿隄草木都生色。新在詩人管領中。亭臯風景近城隅。雪後寒雲淡欲無。試向篷窗占象緯。文昌星影聚南湖。此間來往是通津。官舫時時熾水濱。問有使君清興否。樓頭笑煞謫仙人。千秋妙墨貯雲煙。主客風流盡可傳。願爲儂家重寫照。就中添个運租船。

贈淵如觀察

早聽鸞音下嘯臺。因培得觀公詩。在公客大梁之日。十年引首隔蓬萊。喜看豸斧班春至。恰向奎婁舊次來。著錄有書皆史

筆。搜羅到鬼況人才。時公徧訪古。人陵墓。本師真見傳衣鉢。海內龍門蕩蕩開。

才持一刺到門投。開閣論心笑不休。爲我追逋眞火速。逢人延譽見風流。穹窿高塔陪吟嘯。爛熳長筵共雅遊。自覺氣粗言語大。藥籠新爲狄家收。

正月廿三日淵如觀察枉道過訪復用前韻

夜占紫氣滿層臺。曉起衡門闢草萊。十里烟霞凝望遠。一聲叱撥隔花來。招要野老看天使。慚媿高軒過鬼才。好是東風知雅意。玉梅一樹斬新開。井中車轄敢輕投。花底金鞍願少休。笑我此濱真寂寞。得公一過也傳流。叢殘詩卷論今雨。撩亂茶烟話舊遊。問到春耕先色喜。土膏初動雨初收。

周雋

浣筆泉太白祠和壁間韻

似鑑如圭半畝池。當階仍傍謫仙祠。小樓疎爽看雲處。遺像清嚴酌醑時。記託平泉方鑿壁。景留芳草怕題詩。摩挲儘有驚人句。除却紗籠恐不知。

鉅野縣道中

簇簇星旗事急程。荒城官吏罷將迎。三更車馬衝寒到。百里郊原似水平。麟冢月明碑影直。魚鈴風靜柝聲清。遺蹤欲問河流改。捫薜難酬訪古情。

馮培

江蘇無錫人。戊戌翰林。禮科給事中。

寄淵如觀察

孫郎天人流。才名噪弱冠。目故無餘子。高歌白石矸。竹素窺姬孔。金石挾秦漢。捫天象緯羅。指地輿圖按。

六書辨凡將。一一肉串貫。百篇追太白。一一珠胎粲。揮斥溢人海。豪舉從所翫。家無隔宿儲。到手千金散。裁掄詞苑英。旋執秋曹判。文人無不可。著述隨牘案。記屏上考登。分節頭銜換。行觀鄒魯風。名士即名宦。搜古嶧山碑。防汛黃河岸。政成琴就調。道重鼎非贗。慰矣東人望。治績報公旦。

孫星衍

鄒縣山程訪女媧遺蹟

一山如匡疊石方。按古圖籍疑承筐。元和志。任城有承筐山。即鄒縣此山也。女媧欲出混沌死。剩有朽骨支天荒。披榛三里得

遺廟。結構盤鬱松青蒼。延緣石級剔碑版。瞻拜廟貌登堂皇。儷皮昔日始嫁娶。民俗傳說呼爹孃。此邦風

姓接風后。任國不祀顯史亡。千年祭賽足香火。三縣交錯迷圻疆。女媧遺跡。唐隸任城。今隸鄒縣。兗州。皆即今魚臺縣。兗州。皆即今魚臺縣。兗州。皆即今魚臺縣。一坏究竟落何

許。道士指點依前岡。山陽舊是伏羲葬。鬱鬱陵冢遙相望。晉皇甫謐云。伏羲陵在山陽。唐李吉甫十道志云。在兗州。皆即今魚臺縣。兗州。皆即今魚臺縣。在

於古無我來訪古契太始。自媿識字充中腸。長天不了日斜出。四山迴合身中央。心空萬里見虛白。眼過

百事如秕糠。居人淳樸聚三五。口說上世遺陶唐。愬愬不及飽雞黍。却笑旌旆前飛揚。出山恍惚問甲子。

歲除已逼何奔忙。

周雋

驅車任城南。有山平地起。駭駭何盤盤。錢削盡如砥。其前得遺構。云是女媧里。伊昔庖犧氏。觀察破太始。想惟寡兄弟。厥妹代天紀。斷鼈奠傾闕。四維壞復理。神功地天通。雖女即男子。豈如後代朝。政出垂簾底。其地任宿舊。數典實祖妣。明德固不朽。報本亦千祀。惜哉人祖稱。廟類曰人祖禮褻意近鄙。豈有古聖人。兄妹夫婦理。會當議分奠。一肅神人體。吾友孫使君。嗜古世莫比。碑版備秦漢。鼎彝羅棊几。桑經百萬言。反覆洞底裏。按圖索遺跡。計里直掌指。雙旌涉上來。軒車此暫止。捫蘿讀斷碣。瞻像嘆傾圯。乘輿得長句。軒昂字向紙。留此金石文。足以補古史。

又

碧嶂周遭石磴盤。媧皇遺構激風湍。蛇身卦衍坤爲母。鼈足功先火紀官。置地眞教生女重。補天始信作君難。凝旒自是神靈事。莫作臨朝一例看。

薛城過孟嘗君墓

邁種寧嫌五月生。首開豪舉壓春平。一身獨得容姦力。萬載猶傳市義聲。荒冢久湮尋兔窟。小城早度聽雞鳴。車中我亦無能客。收責何嘗爲一行。

孫星衍

嘉平望日自涉上回兗州是夕大雪

四番雪澤逐征車

余至臺庄南旺魚臺及歸兗州皆值雪澤

歸夢欣然對酒壺他日飛蝗寧入界明年春水早生湖

七湖濟運以隔年雪澤

旺泉

鋪張東閣開詩境。粧點南樓作畫圖。孤負登臨好光景。朔風向曉又長途。

正月十一日同黃小松司馬至嘉祥山中訪武梁石室畫象小松作圖紀遊

石室千年為爾開。翠微訪古共徘徊。高寒到骨清如許。卻喜無人帶熱來。

一雙石闕半埋塵。萬樹桃花孰問津。只有姓名先我到。

前年司馬重葺武氏祠立碑題碑陰

摩挲疑是再來身。

把臂梁園近十年。雪鴻忽聚此山前。畫圖他日傳佳話。金石交情翰墨緣。

黃易 浙江錢塘人前運河同知

次韻贈淵如觀察

梁苑鄒枚幕府開。古碑堆裏共低徊。誰知踏破荒苔碧。親向祠堂捫石來。

袞袞長安踏軟塵。猶從絕學破迷津。而今按部兼搜古。政事文章併一身。

翁阮衡文六七年

謂翁覃溪阮伯元兩閣學

八騶難得到碑前。公來便欲添祠屋。文字精靈定夙緣。

周雋

淵如觀察偕黃小松司馬紫雲山訪武梁祠石室繪圖索句得排律八韻

絕巖留遺構。空庭闕古祠。野雲荒徑合。小隊子旌移。劍珮看前製。鸞龍出異姿。指冰捫薜蘿。墨淡揭碑遲。



獨有狂司馬。居然老畫師。攜筇衝凜冽。點筆詫淋漓。耆好同千載。風流映一時。茲遊嗟未與。撫卷爲哦詩。

顧禮琥。江蘇吳縣人。甲辰進士。兗州府泉河通判。

題淵如觀察紫雲山覽古圖

春燈照眼墨華明。漢蹟斑斕四座驚。丙辰新正初四夜。在觀察座見黃小松司馬所藏武梁祠畫象。欲向紫雲尋舊碣。先從紅藥認題名。冊後題名

有書觀於紅藥山房者。武梁祠闕今重顯。文字因緣此合成。難得花驄停半日。野人擁道剪榛荆。

當年金石誌元嘉。深閉山扉跡漸賒。持節名公都未到。學使翁阮二公先後東來。皆未親歷。探源今日最堪誇。新編布景人

如玉。老樹初春榦不花。爲問仙津原咫尺。古香引客入烟霞。

管世銘。江蘇武進人。戊戌進士。浙江道監察御史。

曹南晤淵如宅相別後寄贈

詢原按部兩停車。相見風期不改初。且喜習趺仍隱步。足傷初愈。似聞邊腹更添書。近有聖人家近借書看之句。得情成讖

勞詒我。時鞠匿名飛書案。爰書悉本初牘。勵志新詩足起予。衆裏唯思共君語。十年翻恨剪燈疏。

孫星衍

金鄉城西北訪漢扶溝侯朱鮪石室

東緡城北古邱橫。誰把桑經問九京。清興忽來捫碧蘚。野人相聚看紅旌。扶溝功在名灰冷。荷水流枯路

砥平幾度滄桑留片石。羊公一過不勝情。

馬履泰

浙江仁和人。丁未翰林刑部員外郎。

將去歷下留別淵如同年

才人愛慕學人傾。同望稽稽使者旌。公著自能無滯事。李諧何害作徐行。壩除稅政聊攻愧。刊盡奇書耀  
挂名。我欲還朝誇向客。國家科第與豪英。

孫星衍

答馬秋藥同年比部

時主講樂源書院入都補官。

歷下相逢酒共傾。忽聞北去曳心旌。螭頭謁帝同時入。比部以第九名進士。改庶吉士。雞舌趨朝作隊行。予與比部同時補官。西曹。又同司總職。  
未必官清逾客況。怕逢人說剩才名。五龍潭上聯吟處。他日愁來數落英。予在歷下。屢與諸名士會於五龍潭精舍。

周雋

別後寄懷淵如觀察

我車東邁使旌西。小別悠悠意惻悽。真是秋蓬隨地捲。非關海燕擇梁棲。將軍善飯終思趙。策士能竿盪  
適齊。涉上酒痕樓上月。一時回首魯雲低。

過柳下惠墓口占

東郡城西路。勞勞車馬過。沿堤絲柳嫩。拂面惠風和。高壘今猶在。豐碑喜未磨。無人禁樵采。死士竟如何。  
二月十五日。淵如舅氏招遊浣筆泉。講集。即席得律詩二首。

輕陰漠漠雨餘天。共訪詩仙與酒仙。深喜昔賢留勝蹟。誰將俗筆浣清泉。花當月半光偏好。節過春分景正妍。廉訪風流聚名士。高燒紅燭列長筵。

芊芊草色碧於羅。春水初生綠滿河。詞客直聯千載上。酒人偏較八仙多。時同席共九人。長吟盡與唐音叶。好古忻將漢碣摩。是日先至學宮觀漢碑。若使奇才合今古。不知狂興更如何。

何啓贊

淵如觀察招飲浣筆泉用壁間劉荻江韻

放生連日過南池。又揀春明謹舊祠。活水瀾迴延客處。殘碑土護賞心時。季真座下宜酬酒。太白庭前好說詩。名士風流名宦樂。曠懷欣使野人知。

楊元錫

淵如舅氏招飲工部南池復登太白酒樓賦呈一律

水上亭臺郭上樓。才人一過便千秋。閒攜尊棹來憑眺。醉拍闌干共唱酬。是處春光真淡泊。如公雅量自

風流隄邊士女皆回首。好看花驄共客遊。

孫星衍

春日行部曹南道中卽事

千株楊柳萬株花。想見春山綠到家。不是羽書鳴驛騎。一宵魂夢在烟霞。  
廢舍愔愔去恐遲。廉車心跡有誰知。寒帷一樣看春色。不及江湖跌宕時。

魏成憲

浙江仁和人。甲辰進士。刑部郎中。

郟城道中寄懷淵如觀察

臚雲況是白雲司。膚寸成霖及此時。近聖人居觀習禮。多名士地愛論詩。鄜元注裏春行部。  
君按部。以水經注自隨。時  
有考倉頡圖中昨問奇。君屬兩峯山人。繪倉頡制字圖。爲過昔人傾蓋處。折疏麻更寄遙思。

孫星衍

江南欽使亮魏兩比部過境不晤作詩見懷次韻奉答

同寮猶恨隔曹司。況是臨岐悵望時。天上使星虛候氣。江南驛騎早傳詩。尊鱸一水鄉心動。雲鳥遺封故跡奇。東閣朝朝懸榻在。好攜紅豆慰相思。

亮保

滿洲正黃旗人。口進士。刑部員外郎。

奉酬淵如觀察卽次魏春松韻

追隨昔在白雲司。每趁公餘相對時。愧我空疏常問字。感君獎借喜論詩。墨梅令譽真堪羨。霜鏡循聲未足奇。珍重瑤華勞遠寄。朗吟應得慰遐思。

楊元錫

奉贈淵如舅氏律詩六首

早通仙籍到蓬萊。繡服今看領外臺。屬吏共知傳美政。舉人難得負奇才。壺觴北海交偏廣。裙屐東山讌屢陪。回首梁園作賓客。少年詞賦豔鄒枚。昔同客中州。

緇帙頻繙愛著書。之官恰近聖人居。嶽邊雲映譚經席。海外人停問字車。舅氏官翰林比部。時有高麗使臣來訪問奇字。去冬安南使臣阮光裕乞書。

按部早懸除暴令。治河先濬富民渠。

時濬濟泗河。通兗郡水利。

賈生策問揚雄賦。福命於公竟不如。

官衙日暖聚天倫。若箇如公樂事真。小院有花娛大母。萬家被澤慰雙親。最難處貴還忘貴。更喜能貧不患貧。況是鴿原擅才調。池塘春好紫荊新。

幾年爲客到長安。留我高齋得盡歡。紫陌尋花千日醉。旗亭顧曲萬人看。入林便覺春風暖。倚竹應憐翠袖寒。賴有狂名酷相似。紀遊詩句遍層巒。

頭顱如許畏無聞。傳世誰工孝綽文。縱飲未妨狂喝月。豪吟却喜意凌雲。風流敢詡稱同調。標置居然是

出羣。用晉書殷浩謂  
甥韓康伯語。此去莫忘登岱約。好看天近落霞紛。

春風解識渭陽情。柳眼青青對客盈。入幕花園高士榻。登樓月墮謫仙航。項斯深感逢人說。無忘空傳似

舅名。每共雅遊同嘯詠。媿將姓氏並公卿。時刊則停雲集  
附刻拙詩。

孫星衍

題南樓却扇圖贈吳山尊妹丈

廣樂聲中翠燭然。荆釵出拜畫堂前。料量嫁事分清俸。不抵長安賣賦錢。

一夕爭傳蕭史來。婿鄉難得有仙才。他年泗上尋遺蹟。便指南樓作鳳臺。杜甫南樓在兗  
州府城內。

沛上春波處處生。送君千里到蓬瀛。畫眉莫費凌雲筆。天子臨軒問長卿。

王復。浙江秀水人。  
偃師縣知縣。

次韻寄淵如觀察

排來畫戟淨浮喧。驛路陽和未戒寒。持節行吟瞻闕里。望塵伏謁笑卑官。繡衣喜溢庭前舞。書尺多頻帳

下看。海內才人齊仰首。一時爭望進賢冠。

孫星衍

曹南督送赴楚官兵寫守禦方略寄畢制府

一篇墨守寫辛勤。手署頭銜上制軍。作宦未深思入幕。在公幕府八年。談兵漸慣當論文。蕭蕭車馬辭曹渡。漠漠雲山望楚氛。也似西師埽回鶻。番回蠢動時。隨公在關中。盼公投筆樹功勳。

李鑾宣 山西靜樂人。庚戌進士。刑部員外郎。

贈別淵如同寅時觀察山左

東海於今表大風。昔人箋注摠雕蟲。直從邱索參書契。萬古斯文日載中。君著有日躔考。斗建辨等作。

手摘擎天太華蓮。君在關中。最久。又登日觀躡雲烟。盪胸應有驚人句。誰似洪厓許拍肩。謂洪稚存太史。


傳書古本藏經壁。近刻古文尙書馬鄭注。說禮新階重曲臺。讀君三禮釋周禮表及五廟二說辨。能釋諸家聚訟之疑。拜得監司方岳命。繡衣今見絳

帷開。


畢裕曾 江蘇太倉人。戊申舉人。

送淵如觀察之鎮

前旌遙指曙雲開。嶽色河聲亦壯哉。東海便應歌惠政。倉山早已歎奇才。袁簡齋太史目君為天下奇才。姓名不藉官階重。事業原從經術來。試向天門高處望。文星奕奕傍三臺。君紫雲天。文家。







同人唱和詩集

黃丕烈編

同人唱和詩集


本館據士禮居叢  
書本排印初編各  
叢書僅有此本

壬午新正同人唱和詩。堯夫取以付梓。俾一時嘉會流傳不朽。大賢高致。固非世俗之見所能窺其萬一也。惟拙作有因注始明者。如敢向同年說同館二句。棟華與予壬子同舉鄉榜。壬戌大魁。予忝翰林。教習。鶴人出桂文敏門下。戊辰廷試。予忝讀卷。為霖自養東山望。謂竹堂前輩。愛日常殷北闕情。予與鶴人先後告養。稽古人尊少傅桓。竹堂曾入直上書房。附識于此。庶後之覽者藉資考證云。

道光甲申立秋日潘世恩書


昨日草草杯盤。而情話頗暢。想弟亦同此情也。所要四元詩錄上查收。侍萱春波卷題訖。奉繳。祈轉致。順候。即佳。不具。

韞玉頓



# 夢境圖唱和詩集小引

夫天下事皆夢境也。然夢境必有實事以生之。如修志實事也。修志有竹堂芝軒兩先生實事也。予忝隨兩先生後實事也。乃忽遇諸夢境。則全乎虛矣。然明明有詩句意。又可解不可解。似非無因而至者。安知夢境之有實事邪。予喜徵夢。因刻夢境圖倡和詩爲第一集。道光四年甲申季夏月望日。羹夫識。



# 夢境圖唱和詩集

道光辛巳夏。郡有修志之舉。石竹堂潘芝軒兩先生實主其事。余以忝與纂修之列。因訪書赴琴川。於八月二十一日泊舟常熟西門之倉前。天未明時。夢見一空曠之所。竹堂芝軒身凭一石几。對坐二鼓磬。作談詩狀。余自外入。但聞七字句云。不使閒情管落花。寤後足成七絕一首。及歸。再用句中平韻衍之。復得二首。竊思我三人幼學相隨。壯行各異。今以郡志事得陪兩先生後。未始非文字因緣也。爰乞屬和第一首韻。并繪圖紀事。以誌一時佳話云。

黃丕烈

一葉扁舟滯水涯。忽然有夢已還家。夢中記得良朋話。不使閒情管落花。笑而不答心自閒。流水桃花別有天。欲索解人真不易。三神山著兩飛仙。

闔閩城。卽用閒花句詩本事。

和復翁述夢詩韻

石韞玉

欲從道岸問津涯。試訪周官掌夢家。留得一雙清淨眼。世間諸相總空華。萬卷橫陳詠聖涯。此中自有大方家。飄茵墜溷原無定。一種人心護落花。我生有盡願無涯。敢道文章是一家。近爲姑蘇志人物。又攜枯管祝開花。

蕘圃二兄夢予與竹堂前輩對坐吟詩。有不使閒情管落花之句。寤後足成一絕。繪圖見示。奉和第

一首元韻呈正。

不向山巔便水涯。琴川一棹擬浮家。無端拾得清新句。知是江郎夢筆花。  
玉海探奇無際涯。者番詩思落誰家。似邀金谷園中客。同看河陽縣裏花。  
追摹情景向天涯。付與煙雲章畢家。我欲相攜重入畫。西牕圍坐翦燈花。

潘世恩

夢境荒唐詎有涯。千頭萬緒各尋家。先生夜抱殘書宿。寒蝶秋深苦戀花。

吳雲

夢裏尋詩水一涯。清吟恍惚出方家。江東才子郊祁侶。未得無情賦落花。

陳廷桂

闔閭城外卽天涯。夢裏停橈忽到家。二士共談誰悟得。詩情禪意笑拈花。  
河陽春色浩無涯。海上蓉城別有家。若許閒情來管領。看花要看正開花。  
茵溷飄零各有涯。返魂無術問仙家。落時要管如何管。一覺梨雲夢裏花。

吳廷琛

殘月孤篷倚水涯。華胥一枕列仙家。元言秘旨無文字。悄聽清談妙粲花。  
千頃汪洋未有涯。擁書環坐鄴侯家。頭銜博得郎官宿。肯種河陽一縣花。

吳信中



茸城蟬蠹作生涯。風壑雲泉夢裏家。擬與先生叩禪悅。其根無隱證空花。

蔣寅

不爲尋詩泊水涯。夢中清境似仙家。偏疑二士談宗別。月露秋涼咏落花。

詩思禪心合兩涯。空山落葉是專家。左司近掌巫陽夢。郡學堂蘇州詞。新夢韓愈。爲問優曇可著花。

我昔孤篷天一涯。孤篷五字。乃丙寅歲。奉和菊社中句也。旅魂時夢到君家。而今自覺詩情減。輸與神仙頃刻花。

張吉安

月色空朦水一涯。楊枝搖夢落誰家。清新詩句懸然得。文字因緣知慧花。

潘江才並海無涯。剪燭頻煩到石家。江夏多情圖主客。圓成詩夢筆生花。

知也無涯生有涯。年來泛宅水爲家。心空及第談何易。我是人間墜溷花。

紅日博桑照海涯。雲蒸五色列仙家。夢回合與癡人說。一帶隨身掃落花。

誰從煙海問津涯。復見心翁鑒賞家。莫被虞山瞞過了。絳雲萬卷亦空花。

著述千春詎有涯。擔擔佛苑與仙家。文章事業須公等。剩我閒情管落花。志局內分得方外。

尤興詩

琴川濱海渺無涯。尋得仙源處處家。說夢說詩如說法。夢回天雨一天花。  
浩蕩春光未有涯。剡邨春去屬誰家。天香國色君何讓。一枕黃粱一樣花。

飄然一葉水雲涯。夜半尋詩夢到家。家有藏書三萬軸。獨留隻眼不昏花。

彭希鄭

夢境迷離詎有涯。天然好句屬詩家。眼前領袖羣仙客。只是人間頃刻花。未問山巔與水涯。神遊應到廣寒家。試聽雛鳳新聲吐。已兆芙蓉鏡下花。

湯達

擁書萬軸是生涯。著述如君有幾家。夢裏吟詩詩亦幻。羅浮深處有梅花。

不分地角與天涯。同是師門沆瀣家。君負盛名早退隱。讓人京洛看名花。蔣園與余同戊申榜。蔣園名列第三。座師胡豫堂先生以大魁期許。乃禮闈

數上。挑取一等。加捐主政分部告歸。其浮雲之視邯鄲耶黃梁耶。

生也無涯夢有涯。書爲城郭水爲家。題籤盡是扶輪手。喬木叢中看野花。卷中題咏。有鴻公鉅卿大封翁四殿撰。暨諸先達名句。余不文忝署紙

尾。故云。

琴川飄渺瀕無涯。爲訪詩人近各家。夢有奇緣徵瑞應。芝蘭開遍吉祥花。蔣園幼穉。諸孫皆嗜書能詩。厚福正自無涯。

# 狀元會唱和詩集小引

客有見子夢境圖唱和詩者曰。子殆不忘情于狀元。故假諸夢耳。卽真有是夢。亦戀戀于功名富貴。故形諸夢想。殊不知予之夢。其因在聞談詩也。詩之教徹乎上下。談詩者爲狀元。遂謂有功名富貴氣乎。不然也。國家功令所在。凡入仕必科第。人不學舉業則已。如學焉。誰不思爲狀元者。必以狀元爲功名富貴中人。而非我輩所願爲此。不願爲之心。出諸山林隱逸之士。則可。如我輩斷不宜作此違心之論也。狀元何挽我乎哉。予知有詩而已。因刻狀元會倡和詩爲第二集。道光四年甲申季夏月望日。羹夫識。



# 狀元會唱和詩集

新正邀潘芝軒、吳棟華、吳藹人三狀元山齋小集，卽事成篇。

歲籥初更百事安，閑尋蔬筍薦春盤。竹中開徑迎三益，林下逢人有二難。梅解衝寒花信早，雪方獻瑞酒懷寬。偶然觴詠成嘉會，賦就同心興未闌。

並是中朝侍從官，一時鄉里暫盤桓。風清北道方持節，棟華將赴清河道之任日永南陔正采蘭。五畝竹松甘自老，三杯椒酒醉成歡。行藏各盡平生事，留取芳華後進看。

芝軒作

三年一第只尋常，况是三吳第一鄉。容易蓬山叨接席，最難梓里話聯床。天教我輩成嘉會，人說羣仙在此堂。卜夜不須重洗盞，恐驚奎壁動光芒。

大賢經濟冠羣英，衣鉢深慙副盛名。敢向同年說同館，却欣門下見門生。爲霖自養東山望，愛日常殷北闕情。漢世治平誰第一，謂棟華褰帷到處定歡迎。

芝軒和竹堂作

雲水閑情到處安，况逢舊雨話辛盤。田園歸後追陪易，旌節移來會合難。老樹著花詩筆健，清言霏屑酒盃寬。高齋小集論千古，回首蓬壺意未闌。

文章屈宋作衙官。稽古人尊少傅桓。驛路剛逢煙外柳。陔庭喜兆夢中蘭。歌成白雪聯吟暢。案有梅花接座歡。不獨粉榆添故事。瀛洲留得畫圖看。

竹堂和芝軒作

尙書地望本非常。四海欽遲况一鄉。却喜二豪曾入室。棣華護人皆芝軒門下士不辭三友共連牀。杯盤偶設慙粗糲。車

騎同來過草堂。計日杏花消息近。戴篋星可見精芒。

我有嘉賓集衆英。世人未免重科名。盍簪禮在山林簡。揚禪春隨笑語生。輦下看花追昔款。路歧折柳見今情。一篇咏就高軒過。巷曲蓬門掃雪迎。

棣華和作

蹙解行裝住未安。已聞獻歲荐辛盤。勞生哀樂催年易。浮世功名息影難。水木清蒼亭樹古。壺觴眞率禮儀寬。盍簪無意成佳話。雪壓梅梢酒未闌。

勇退無心戀熱官。詩壇酒地尙桓桓。把麾早折燕臺柳。組佩同分楚畹蘭。禁漏三磚猶破夢。宮袍一品快承歡。人間此會論今古。繪取新圖異日看。

鴻迹東西本不常。年來頻喜過家鄉。科名分合春秋榜。位業高低上下牀。雅集試開聽雪戶。新詩爭賦聚星堂。十分一盞神先旺。銀海何愁眩電芒。

記從芸館仰培英。拙宦空成一第名。挾漢分章眞學士。輕裘緩帶舊書生。蓬山挂籍前塵夢。枹社扶輪此

日。整。廟。情。羣。仙。作。高。會。枉。他。候。吏。遠。探。迎。

謫人和作

別墅東山老謝安。招邀勝日對椒盤。門庭似水賓無雜。詩句疑仙和最難。越釀三升經臘勁。蕭齋十笏占春寬。天公爲助林亭賞。飛雪漫空勢未闌。壁府圖書禁近官。騷壇此日會躬桓。一枝紅到尙書杏。九畹香分楚客蘭。衣鉢科名叨末座。觥罍里社奉清歡。廿年四榜初梳在。同向芙蓉鏡裏看。仙班接武舊官常。難得簪裾聚故鄉。促席深談添酒盞。圍爐宴坐擁書牀。花間艷雪疑瓊杵。天上春風望玉堂。手拂蠻牋搖彩筆。夜看珠斗動星芒。講幄深慙侍邇英。傳家芸館記科名。看花兩姓俱同榜。采藻三吳說後生。香火因緣迦葉座。蓬萊延望伯牙情。蘭陔日永春將到。定有仙人駕鹿迎。





# 虎丘詩唱和詩集

虎丘雜詩十四首 并引

潘奕雋 榕皋

蘇城西北虎丘山者。秀挺單椒。體包羣壑。寺宇丹絢。林亭翠交。危磴平闌。延矚引步。嚶聲天采。聞發  
 亂飛。春秋皆有可觀。晴晦迭呈。變態洵四方。人士遊覽畢集之地。亦是邦英彥吟眺不厭之區也。爰  
 有三泖詩翁。停橈振響。治園詞客。授簡繼聲。僕也掩關逃暑。索居眇歎。愜盍簪於素心。慕投桃之高  
 誼。喜生見獵。醜忘效顰。况夫批風抹月。本是弱齡遊釣之鄉。兼之擷笛彈絲。不少上客。唱酬之日。登  
 高能賦。兩美不礙殊姿。即事多欣。同調何妨異撰。書成拉雜。合新愁舊。恨以齊宜。體仿謠諷。彙昔款  
 今情而竝。鬯。慙技道之不兼。進。按宮商而弗克諧。難希子夜新歌。或作獸山故事云爾。

亭榭高低樹淺深。偶移短棹散幽襟。乍看新綠叢祠掩。又聽鳴蜩灌木陰。

昔年山後玉蘭花開。先祖開齋公時。偕客登眺。常命追隨。破曉來登選。

佛場。先祖詩句也。

春風童冠集山塘。破曉來登選佛場。老輩幾人還健在。花時拄策玉蘭房。

禮泉令汪韻三先生名俊號山樵。與先祖為詩友。同遊山塘。有小說怡。

受無多容之句。

桐帽棕鞵雪鬢髭。山光明媚水拖藍。小航遊客今如織。誰說詩人汪韻三。

布衣梅澹香居青山橋。一片冰心託曉霞。澹香詩筆最清華。青衫客子頭全白。何處重尋處士家。曉霞。澹香詠庭前紅梅詩句也。

泉清亭古氣蕭森。汪老詩篇呂老琴。今日挈朋來避暑。荒塔苔合一蟲吟。  
三泉亭地最幽寂。往時汪愛履先生避暑石室。有石老汪老問答詩寫册

貽余。近年琴友呂修林寓此。余爲書修林琴館額。春秋佳日。來此聽琴。

七子才名海內馳。山塘傳唱柳枝詞。靈光一老風流劇。來倚紅闌賦小詩。  
沈歸愚宗伯選七子詩。王述芬司寇其一人也。集中山塘柳枝詞。傳誦

於時。今來寓白祠。賦虎丘即事二十六首。遍貽同人。

招呼閒侶訪毛公。謝客幽探興未窮。話到龍湫詔奇絕。布帆華擬挂秋風。  
陽湖趙雲松前輩。枋舊來蘇。泊舟白祠。拉王孝廉仲璽同遊洞庭。偶

談雁蕩之勝。訂余入秋同游。  
白公祠奉祀香山。自

老手從來便劇郡。老手便劇郡。東坡句也。移家真箇賦閒居。漫吟漁火江楓句。賴寄雲龍隱者書。  
白公祠奉祀香山。自

張雪樵觀察自西泠移寓虎丘。去祠數武。余來山塘常語語其地。今松雲守徐州。雪樵移寓楓橋矣。

溪山勝處月如銀。鬪鴨闌空碧草新。畫舫朝朝還夜夜。尊前顧曲是何人。  
溪山勝處。盛竹軒刺史別業。甫里祠。陸豫齋建中有鬪鴨闌諸勝。昔與

簡齋、夢樓、蕉圃、蘋洲、鵬詠於斯。今日過之。不勝黃公酒壚之感。

五戒誰能認後身。山房不見寫經人。閒繙祕篋消長日。要向三生結淨因。  
半塘龍壽山房。藏元僧善繼三世血書華嚴經。乾隆乙卯春。與西莊、

辛楣、芝岩、立崖諸君子同觀。題名卷尾。

搖碧春晴水潑油。闌前花影漾簾鉤。何當閒喚同袍子。擊鉢飛牋續舊遊。  
豐遠村別業臨河。余爲題額曰搖碧。

云美遺蹤渺不存。延來吟客寄吟魂。溪山風月誰爲主。贏得名留塔影園。  
白公祠爲題云美塔影園舊址。

海燕亭邊燕子飛。眞孃墓上草菲菲。丹青頗憶秦楊柳。小閣山腰冷夕暉。  
錫山秦儀寓千人石下。善山水。尤工寫柳。時人呼爲秦楊柳云。

佛香庭院馨聲殘。一樹梅花覆石壇。曲徑禪房留韻事。竹扉山水墨泉蘭。  
堂。雲浦過訪。墨泉。以所畫長卷見貽。

佛香庭院馨聲殘。一樹梅花覆石壇。曲徑禪房留韻事。竹扉山水墨泉蘭。

怡賢寺老僧竹扉。善畫山水。墨泉善畫蘭竹。庭有紅梅花。時余與見。

黃丕烈題圖

虎丘雜事詩者。潘榕皋先生所作也。絕句限以七言。開先爲王范二老和章。拘于一韻。繼美有尤彭兩君僕也。素嫻遊遨。幾同飛鳥之倦。久荒吟咏。強效寒蟬之鳴。嗟病足兮兼旬。負賞心于八月。笑我庭無叢桂。盼粟影之全虛。羨君堂有三松。聽濤聲而互答。欣風什之見贈。歎步趨之爲難。爰矢口以陳詞。似構思之好異。摹當年石刻。想沈禮明之紀遊。操今日土音。學朱樂圃之記事云爾。

虎丘山志出王賓。唐宋詩名得幾人。百五十篇猶未足。儘容後起步前塵。

州人王賓始撰虎丘山志。所錄唐宋以來作者姓氏。凡一百有六人。爲

詩百五十餘篇。今先生作虎丘雜詩。命同人和之。謂可備後來撰志者採擇。

虎丘唱和有題辭。絕景兼三樂圃知。大句高風不專美。翠珉刊欲付禪師。

虎丘唱和題辭。蘇州州學教授朱長文作也。以爲虎丘之景。蓋有三絕

·左丞蒲公歎賞不已。形於詠歌。樞密章公。使君劉公。通守王公。欣聞嘉製。屬而和之。長老先禪師喜於見賜。而擅其失傳。願刊翠珉。以託不朽。使頽李大句。劉白高風。不專美於是山矣。今先生之意。殆有慕於斯。

元之文正仰遺編。王范而今又幾傳。莫歎題名多漫滅。我尋石室問潘泉。

王元之詩四首。范文正公詩有雲寒不出寺二聯。皆見於虎丘山志文辭

門。而石上題名。嘗見石室中。有刻潘泉同甫等字。見於虎丘山志雜志門。今先生云三泖詩翁。蓋王侍郎也。洽園詞客蓋范太史也。古來王范諸人。皆有虎丘山詩之作。惟潘則無聞。先生真足補其闕。

媿無昭甫劍池詩。虎踞龍潛造句奇。却學應龍來和作。舊遊陳迹費追思。

吾家昭甫有劍池詩云。一劍已飛去。千年池尙存句。應龍有和沈石田

夜遊千人坐之作。中云追思舊游樂。已作陳迹杳。今先生命作。謂須用生平事迹。故此後皆敘舊游。

曾逐羣兒慶老翁。扁舟出郭訝翔空。無端多病身如寄。氣懣凌雲一雪中。

孫觀有大雪同羣兒游虎丘之作。中云羣兒慶老翁。於此氣不懣。余隨

侍免府君於癸丑秋觀燈泛月。頗極從遊之樂。越歲甲寅冬。即遭大故。自後春秋佳日。不常登山。即登山亦不勝今昔之感。此首借鴻慶作比。故詩中皆用其語。

趙忠陪徐待耶遊虎丘。起句云遠陪驄馬覓游蹤。余即用其語以爲喻。

遠陪驄馬覓游蹤。幻迹真成水月同。爲散塵襟藉詩酒。休誇別院有春風。

沈周月下登千人座。獨步有作云。城中士與女。數到不知幾。列酒即

會挈良朋作夜遊。笑他歌舞日喧稠。月明照徹青山骨。一片澄懷萬古秋。

爲席。歌舞日喧市。今我作夜遊。千載當愧始。澄懷永清逸。瓶罍真足恥。余於戊申秋偕諸同年往澄江。夜宿虎丘。步月至千人座。覺石田翁所云夜游之樂。信不虛也。

荷戈萬里此歸來。相遇僧房笑口開。倚樹高吟談往事。申屠千古有同哀。

陽湖洪稚存于庚申自戊所歸。寓一樹園。出萬里荷戈集相賀。因與縱

談往事。知虎丘有異人申屠有涯者。自陽羨游吳。大風雪中脫衣賃舟。沽酒斗餘。飲畢大吐。同載者惡逐之。有涯登岸倚樹高吟曰。仲尼非不賢。爲世所不容。嚙嚙同舟子。不識人中龍。溪雲戴落梅。寒聲激長松。狂來但清嘯。一壺隱塵

蹤。千載而下誰爲同調者哉。

至山飲餞日歡娛。添得山樓語別圖。不是夢魂猶憶此。入朝步武已先趨。

陽湖孫伯淵報闕。將入都補官。同人飲餞於一樹園。吳竹虛爲作山樓

話別圖。此辛酉事也。聞其於今夏始起程。因憶王元之詩云。步武已趨龍尾道。夢魂猶憶虎丘山。伯淵必有類此者。

逸人所樂在琴書。德義高蹤歎孰如。我向白堤尋老友。琳琅經眼固非虛。

名人而隱於虎丘者。唐有史德義。以琴書自娛。號爲逸人。今余所知

有白堤錢聽默。隱於書市。渠所經眼之書籍。有進入天祿琳琅者。倘從此撰集山志。隱逸中可分一席云。

雲巖雅集自年年。不是名流莫浪傳。最愛多情賢令尹。桂花香裏會羣仙。

雲巖雅集志。武功伯徐有良所撰。今日名流雅集。不知其幾矣。而前

邑侯唐陶山恆會飲於斯。文采風流。炳耀一時。亦謂與孝感劉君。實後先輝映焉。

我來憑眺意蒼茫。欲訪新城雉堞荒。白髮馳驅憶南老。枉誇好士有淮張。  
朱竹垞跋虎丘詩集。載表虎丘築城事。以爲人無知者。今余詩亦取表

微之意。

圖經類要復如何。可月名亭孰辨訛。重繼伊人編志草。留存篇什已無多。  
蘇州圖經雲囀類要。世皆無其書。可月亭訛爲可中亭。世鮮知者。太

倉頡涓伊人志後。近又續修。究恐難爲定本。

怒齋字與雪牕蘭。應與游山一例看。却恐詩僧嘲太甚。故尋別徑上峯巒。  
僧柏子庭善謔。嘗爲詩云。家家怒齋字。戶戶雪牕蘭。春來行樂處。

只說虎丘山。蓋皆當時所尙也。今余作詩。不襲人牙慧。獨尋別徑。故於終篇見意。再入山舊路與今不同。張君度畫猶如此。

吳雲玉松

曲徑門開野水深。花津橋下一題襟。而今重泛瓜皮艇。繫纜全非禮樹陰。  
感吳牧庵也。

漁兄漁弟摸魚塘。村婦村姑打稻場。他日有人尋醉石。兩株叢桂一山房。  
予類所居曰醉石山房。仍相州郡齋名。

野航二老鬢鬢。不見遊人賦采藍。同調同心知有幾。更無月影許成三。  
施蒙泉嘗借泛月。空山無一人。並坐千人石。丙夜歸。

霜楓弄色暫烘霞。酒上衰顏擦不華。落拓談兵人老大。白頭未剃已無家。  
胡帽峯屢欲披緇未果。今寄食濱川道院。來訪。邀看楓葉。醉後談兵不已。

鬢首文章氣鬱森。一杯黃土感人琴。魂兮來往真孃墓。夜半秋蟲木葉吟。  
王仲瞿旅寓盈盛一水樓。未幾徂謝。

傲吏郎潛恥競馳。叩門乞食拙言辭。留君無計歸何處。一卷金經萬首詩。  
金華方鐵巖好佛。最工詩。欲卜居虎丘。留三日而去。

賈生未薦愧吳公。賴有清詩可送窮。不用嬉春強分別。一般桃李嫁東風。  
曹良甫詩才甚美。嘗於酒後評花。聊復及之。

扶病籃輿趙司馬。衝泥來訪野人居。藏山沉石吾何有。多謝先生勸著書。  
趙味辛病廢。猶來觀競渡。力勸余著書。謹謝之。

藤杖敲門鬢似銀。鼎彝制古管絃新。雲山一幘貽知己。可是尋常潑墨人。  
宋芝山。晉之老宿也。博古能畫。門人李毅亦晉人。酒狂能詩。兩度過訪。依長輿令延君。旋卒。延刻

山澤風儀土木身。耽詩嗜酒不羈人。能容狂簡唯賢主。或者前生有夙因。

其詩

橋通綠水綠于油。向晚憑欄下釣鉤。擬種紅蕖兼碧篠。扣舷日在鏡中遊。  
予初賃居綠水橋。今遷對酌橋。有小池。紅蕖碧篠之願遂矣。前明周載夫先生酷愛此山。嘗謂人曰。盡於家園一遊。謂其近也。予

文獻先朝手蹟存。仙蹤於此妥詩魂。微言心印三生石。天與吾家二頃園。

亦曾有是言。故蒙泉。謂予恐是先生後身。

繞屋慈烏作隊飛。白雲深處草餘菲。墓田此去無多路。一桁青山障落暉。  
綠桐橋先塋。距所居幾數里。沈文剛女校書。酷好名。嘗置酒山塘。介某生乞爲詩弟子。予不可。

萬緣灰燼卽香殘。多事風騷競築壇。猶有噉名心最熱。校書詭說沈文蘭。

乃止

丁丑十月廿有七日。余置酒花津橋下。翌日羹圃投詩十四首。屬和。先是榕皋丈有原唱。今羹圃乃追和。前詩也。雨隴無俚。繼聲亦如其數。僑居于此。往來多窮愁枯槁之士。寄興無端。抗希作者。而一切雕

紅翦翠浮濫之音汰焉。覽者可以知其志之所存。萍翁并記。

